

國

朝

文

匯

國朝文匯甲集目錄

卷三十九

朱

軾字可亭江西高安人康熙甲戌進士  
官至文華殿大學士諡文端有文集

書張璉傳後

一

書賀烈女傳後

二

毛芝亭墓表

四

葉亦苞

字九來江蘇崑山人國子監生康熙  
己未薦舉博學鴻詞有經訓堂集

金日磾論

六

彼岸禪院記

六

貞惠先生郭侯行狀

七

陳

璜字文煥廣東海康人康熙甲戌進士官  
至福建巡撫段追授禮部尚書諡清端

重刻海忠介公備忘集序

九

送葉南田由樞部出守廣州序

九

方

邁字子向福建閩縣人康熙甲  
戌進士官浙江蕭山縣知縣

平情論

十一

通俗宗祠議

十二

胡穆孟傳

十三

呂履恒

字元素號坦庵河南新安人康熙甲戌進士官戶部侍郎有治古堂集

青要山石鵝記

十五

望水亭觀瀑記

十五

古褒城記

十六

龐貞文先生傳

十七

陳丹亭傳

十七

鍾子文先生暨兩恭人合葬誌銘

十八

張公葆孺墓表

十九

徐旭旦

號西冷浙江錢塘人貢生官廣東建平州知州有世經堂集

擬平楚萬言策

二十一

王立憲

字法之雲南建水人康熙丙子舉人官直隸廣濟縣知縣

開建水巖洞碑

二十七

謝方琦

字應雲江蘇宜興人康熙丙子舉人有東墅集

擬重修東林書院碑記

二十八

姜宸英

字西溟，號湛園，浙江德清人。康熙丁丑一甲三名進士，官編修。有湛園未定稿。

春秋四大國論上

二十九

春秋四大國論下

三十

吳虞升詩序

三十一

陳其年湖海樓詩序

三十二

志壑堂集序

三十二

十二硯齋記

三十三

狄梁公廟記

三十三

劉孝子昇親記

三十四

戶部給事中黃渭王公墓表

三十五

山陰仲淵何公合葬墓誌銘

三十六

文學邵君墓誌銘

三十七

國朝文匯甲集卷三十九

書張璉傳後

張璉以議禮驟貴。怙寵恣睢。剛愎猜忌。屢與大戮。世宗之罪人也。然所  
有可取焉。禮為人後者為之子。降其父母。期何為降其父母。期天之生人。使之上本  
不可以二考也。是故世宗考興獻。則必伯孝宗矣。考興獻而伯孝宗。孝宗之尊親如故  
也。慈壽太后之尊親如故也。不以稱伯而有損。亦不以稱考而有加也。若考孝宗。則  
叔興獻矣。為人子而以父為叔。可乎。繼世之君。臣其諸父。天子之貴。不以屬通。以所  
生為伯叔。是為天子而臣其父矣。若特加殊尊為帝后。則未聞有姪為天子而帝后  
其叔父叔母者也。當日禮官。屈於臆桂之論。乃議加稱為本生皇考。夫謂之本生者。  
對所後而言也。所後者不可不為之後。世宗可不為孝宗後。徒以入承大統。強立父  
子之名。外其父母。以為本生。是亦不可已矣乎。且所貴乎為後者。重祀事也。天子祀  
四廟。皆繼統之先君。不必親祖親父也。親祖父而不為天子。不得附太廟。漢宣之四  
廟。文景武昭也。而悼考不與焉。光武之四廟。元成哀平也。而南頓君不與焉。孝宗假  
不立嗣。固無失四親之饗。興獻既不附廟。自無干正統之嫌。何所取而必以孝宗為  
考。又何所禁而必不以興獻為父乎。廷臣議以益王子崇仁主獻王祀。他日仍以皇

次子後興國改崇仁為親藩。是世宗舍其父而父孝廟。又使崇仁舍其父而父興獻。他日復尊崇仁而以皇子為祖。後父子大倫展轉更置。此何禮也。或云天子以宗社為重。不得顧其私親。是已然。所謂宗社為重者。重繼統也。統不絕。則宗社無恙矣。繼嗣何關重輕乎。宋司馬光韓琦以仁宗無子。請擇宗室子。豫建於青宮。蓋將付以大統。必早定父事之名。以慰臣民之心。是宋人以繼嗣者繼統。嗣子之建。為付託計也。明臣乃欲以繼統者繼嗣。將謂大統之付。特為故君嗣續計乎。試問遺詔迎立世宗。為祖宗統緒乎。抑以天下為孝宗易嗣子乎。世宗之入繼。繼大統乎。抑以其身為孝宗宗嗣。而易天下於武宗乎。從繼統而言。謂父母為私親可也。從繼嗣而言。所生之至性。豈勢位所得而奪乎。天下有死而無嗣之人。未有生而無父之人。羣臣不忍孝宗之無嗣。何忍世宗之無父乎。世宗之繼統。繼武宗也。武宗無子。而以世宗後孝宗。即此可知。繼統之非繼嗣矣。幸而世宗為孝宗猶子。假令憲宗之子入繼。亦將以為孝宗後乎。舜有天下。祖顓頊而宗堯。是亦繼統也。使舜以堯為父。而委替皞之祀於象。吾知舜視堯天下猶棄敵屍矣。衛軌不父其父。而稱其祖。當日國人有為衛軌者。亦持宗社為重之說。而聖人言為政。必以正名為先。名不正。則言不順。以此折衷大禮。可息盛廷之議矣。至禮經大宗為後之文。為大夫士言之也。士大夫之尊。不得加於諸

父故無嫌也。必大宗而為之後者，大宗者百世不遷之宗，亦思世相承之宗也。不幸而宗子無嗣，必以同宗之支子繼之。若兄終弟及，則與五世而遷之小宗無以異矣。此所以為大宗後者為之子也。豈所論於繼統之天子乎？大君者天地之宗子，非族人所得而私。烏有所謂大宗小宗乎？禮曰：別子為祖，繼別為宗。周公別子也，繼別者伯禽也。姬姓世世以魯為大宗，非以周天子為大宗也。今以大宗為後之文為天子繼統之禮，宜乎諸臣之曉曉不已矣。至世室之號，世宗自謂皇考亦當敦讓，且云朕奉天法祖，豈敢有干大廟？自豐坊倡為明堂之說，嚴嵩和之，乃至稱宗配帝，大亂常經，使後人追咎璵桂之濫觴，是則豐坊嚴嵩者又璵桂之罪人也。

### 書賀烈女傳後

賀烈女山西崞縣人。未嫁夫亡，奔喪守志。越三月，偕其婢安氏投繯以沒。賀氏兄生員某走京師，乞言為表章。子傷二氏之死，又追念吾女之守義而卒與賀某，於是執筆而書曰：人情所最苦而甘之者，飢百折不可奪者，莫如女子許嫁夫亡，守志而繼之以死。功今年未三十而寡，近五十得旌其門，獨室女未婚守節，及以身殉者，例勿旌。說者遂謂此說僻之行，願悖乎禮教。至比之異端邪說之為世道害也，謬哉夫所云悖乎禮教者，吾聞其說矣。曾子問云：三月廟見，稱來婦也。又曰：女未廟見而死，則

不遷於祖。不祔於皇姑。歸葬於女氏之黨。夫婚三月矣。徒以未廟見而不成婦死而葬於女氏之黨。則未嫁者之不為夫婦可知矣。又周禮媒氏所掌。禁遷葬與嫁殯云。遷葬謂成人嫁者。嫁殯謂嫁殯死者。不言娶可知也。然則未婚守節固周公制禮之所禁歟。為此說者。讀書泥於文辭而不求其理之安者也。吾得而辨之。昏禮之最可疑無如三月廟見。左傳鄭公子忽如陳逆婦。陳鍼子曰。先配後祖是不為夫婦。夫先祖而後配。是未婚即廟見矣。或云鍼子所謂祖乃告而親迎。非廟見也。信斯說也。既以親迎告矣。婦入而遲之三月而後見。事死如生之義固如是乎。解者曰。三月之內恐有可去之事故不廟見。然則廟見矣。雖有可去之事將不去乎。竊意春秋於親迎書至。至者以婦之至告諸廟而見之也。是至日廟見之明證也。婚三月矣。擇日而祭於禰。亦云廟見者。前以新婦見至是乃以主婦見也。禮曰若舅姑既沒則婦入三月乃奠菜。註云如舅姑存時。盥饋特豚於室也。又云此謂適婦供養統於適也。然則眾婦與適婦之舅姑在者將終不成婦乎。未三月而死者歸葬乎。否乎。即就曾子問言之。親迎在途而婿之父母死。改服布深衣以趨喪。釋云若家婦則主喪拜賓如以為未為婦也。安用趨喪乎。又安得而為之主乎。又曰取女有吉日而女死。婿齊衰而哭。夫死亦如之。夫婦人不出疆而弔。今以室中處子於素不觀面之人。斬衰而哭不謂



之夫婦可乎。周禮禁遷葬與嫁殤語不可解。意自周公制為合葬之禮。遂有已葬而遷柩者。有未嫁長殤而葬於夫族者。此以私意牽合附會。而於義無所取。故禁之以防其流。非未婚守節之謂也。或疑詩書史傳所紀未聞有此。是殆古人所不為歟。抑有之而載筆者擯弗錄歟。曰。正史以格於令式而缺焉。未備其他。雜見於傳記小說。則儒者所不道也。然易詩有之矣。易歸妹之上六曰。女承筐。無實。士刲羊無血。朱子本義謂約婚而不終者。夫不終矣。而猶歸。儼然婦贄於舅姑也。而婦之義則虛矣。柏舟之詩曰。髧彼兩髦。實維我儀。兩髦者。前髮垂眉。本童子飾。成人弗去。示人子事親已長不忘孺慕也。詩蓋曰。彼垂髦者。孰謂非我匹乎。小序謂衛世子共伯妻作比。以自誓。豈有世子妻寡而可奪而嫁者乎。況考史記衛世家。共伯之死已立為君矣。序與史記俱不足信。要之此詩為節女誓志而作無疑矣。且古今禮俗固有未可驟論者。古者風俗淳厚。所重在禮。今世人情反覆。所重在信。非謂信行而禮可廢。不使不信者藉口於禮之未備也。律載已報書及有私約而悔者笞。別聘者改正。豈不以一言許諾。夫婦之倫已定。而終身不可易。夫是以貧富貴賤之中更。以及流離瑣屑。兩不相知。至於愆期而卒不敢他乎。夫生而悔者。嚴其罰死而不二者。靳其旌。國家立制。夫豈苛刻於節女。其謂此非常之事。聽有志者之自為。若樹之風聲。將有作而致。

其情者矣。夫國家無旌法則無所冀幸。詩書隱其文則無所效法。無所冀幸效法而為之者發乎至情而不容自己者也。子長女許嫁李氏既有吉期而婿死女守節十有三年而歿矢志之初有引禮經難之者曰吾知非禮吾志不可強也將歿曰勿積旌本無可旌也吾女自以為不合於禮而不能強其志之所不為若賀氏者則不知有所謂禮而直率其性之所欲為而已斯所謂無所冀幸效法而發乎情之不容已者乎。獨是殺身所以全節也。賀既得行其志矣奚以死為。曰賀欲為夫立後而不可得而族人之耽耽者且以郝老方卜宅於賀氏之比鄰將謂賀氏以節為名而據其夫家之產污孰甚焉。以是憂憤激切而之死以畢其志也。悲夫抑更有異者賀之守為夫也安何為乎。賀之死殉夫也安何殉乎。賀初聞喪以守志告其父母父母不許也。安氏從旁贊曰。惜姑可為誰不可為者。我願偕往相依舉世號咷之口不足聽也。言訖二女瞠目相對激昂之狀形於面顏維時鄰里族黨之愛憐賀氏者一室嘈雜各以不入耳之言相勸勉及聞安氏語舉座凜凜不能置一喙而賀氏父母惟熟視二女款款太息已耳。夫以賀之至性孤行固不待將伯之助而力排姑息之論以成就乎不朽之節者安之為功於賀不少矣。然則賀死而安之志畢矣。即不從死於賀乎何異於安乎。何攝而安之意以為賀之守節而死吾則成之賀死吾生是厚於人

而薄於已也。豈徒事王不終已哉。賀為夫死安為賀死。各行其意之所是而安之。慷慨殉義。尤創前人所未有。實奇而不失其正者也。賀生詣予。得叩二氏自幼至死貞靜幽閒之狀甚悉。漳浦蔡少宗伯已為之傳。予不贅。安氏所謂悟姑者。賀之同里人。未嫁夫死。守志以養其舅姑。以孝聞。

### 毛芝亭墓表

毛公諱澤字元厚。別號芝亭。前戊戌進士。吏部選郎。錦來先生之冢嗣也。公幼負穎。染軍容。不憂弱冠有聲庠序。以拔萃貢成均。時錦來先生方佐冢宰。司銓政。憐才好士。士之出其門者。大都一時俊彥。公於趨庭之暇。時與諸君子遊。詩社文酒。儒雅風流。才名籍籍都下。踰年。錦來先生以疾卒於京邸。公扶觀歸葬。而新昌山寇乘輿逆之。勦半盡。起公方哭踊墓門。羣賊突至。擁公見渠魁。笑揖上坐。曰。願從吾取富貴耶。公張目大罵。賊怒將殺之。賊中有曾受恩門下者。夜半為釋縛。得逸去。詣郡城。涕泣請師勦賊。勿許。乃杖策走。謁撫轡將軍。兩廣制府於粵西。制府進賢。諱宏烈。傳公也。前錦來先生尹平郡。傳公以上書發三藩。奸克配邊。軍過平。先生贈以數千金。咨嗟訂交而別。至是。傳公喜見故人子。又奇公才。公亦樂為知已用。於是留幕府。參預軍務。事平。以功授兵馬指揮。尋改上林令。慈惠廉明。所屬犴狴。頑冥不可德化之人。

皆戴之如父母。民有為豪吏誣陷者，撫軍欲致之重典，公力爭。撫軍怒，公曰：「人命重，情願平心聽之。」殺無辜以媚上官，職不為也。撫軍拍案攘臂，叱左右揮公仆地，乃痛哭呼號，以頭觸柱，流血昏迷。比甦而撫軍已奉 嚴旨就逮矣。秩滿改廣德牧，思連刑部尚書。即嘗平反疑獄，司寇弗允，輒引疾。司寇悟，卒如公議，乃留。出守黔之思南。政績如牧令時。泣政二載，又以強項獲罪，謫歸。自是杜門不出。養母以孝稱。前後居艱，辨踊哀戚，喪葬如禮。為人簡易和平，不拘小節。聞家有道，聞門肅然。僮僕悉奉命，惟謹。性嗜酒，每半醺輒拊掌談古今成敗事，悲歌慷慨，聲徹雲霄。自以一生讀書求志，不獲大用於時，而所在折屈，感憤抑鬱之氣一發於詩。所居官舍，家園種梅數百本。花時把酒長吟。集中所載詠梅詩積數千首。其愛梅較淵明茂叔之於蓮菊有甚焉。或云東野王溪窮長吉天曹望以詩人刻削，撈挾飛潛動植之物，不得隱伏其性情比之淫佃漁者為天所罰。芝亭之不大用其以此幾予謂不然。東野王溪長吉文人已耳。若公之懷才耽勝，窮以道不以文也。當其陷賊中，罵賊不屈，豈復為首項託作令忤大吏至呼號觸柱，假而撫軍留粵一二日，公之死生未可知也。復不自憊。父至老倔強如少時，而卒得保軀命。優游林下以壽終。天之佑公者何嘗不厚乎。聞公彌留時無一言及家事。第曰堯舜在上，士君子建功立名千載一時，兒等發憤自

強無學予溺情詩酒也公卒後諸子讀書勵行恂恂善下可謂不忘先訓公有子矣  
公生於順治某年月日卒於康熙某年月日娶某氏先卒子某某孫某某孫女三雅  
正某年月日葬於某山之原附葬者鴻遠生母某氏也

金日磾論

葉亦苞

父之於子至愛也。大臣以道事君則有所不愛。始或近於殘忍。其究歸於純誠。一念之斷。福數世焉。史載金日磾長子與宮人戲。殿下日磾見而殺之。或謂日磾殘甚。日磾身辟異眷。兩子皆與上狎。同宮人戲罪甚微。當為上所曲赦。何必絕父子恩。君子曰。否。大臣不患其不斷。患其無識。識至而斷出焉。所謂識者。非智數億逆之謂也。其胸中澹然。于富貴則苟且姑息之念。自有所不生。夫宮人者。天子之宮人。殿庭者。天子之殿庭也。自殿庭戲宮人。弄兒必忽視天子。其後將無所不為。使日磾貪位苟祿。且隱覆之不暇。何忍殺之。殺之者。絕大逆于未形。俾子孫守身畏法。不至殄滅。而其殺也不然。日磾之愛其子。豈異于霍光之愛其妻哉。光惟不討顯之罪。幾致族滅。而日磾之後世稱忠孝。則殺弄兒者。所以遺子孫以安也耶。要之日磾之勝光。其識在寡欲。不止于能斷。如光兩進其女為后。日磾則辭之。光之子皆封列侯。猶念其兄之孫。日磾則當身辭之。夫富貴之情淡。則是非之理明。是非之理明。則父子之恩小矣。若光者。廢昌邑立宣。不可謂不斷。而猶不斷于顯。夫亦多欲之累蔽之也。使光無欲焉。則伊尹之後一人而已。豈稅侯所能及哉。

彼岸禪院記

吾邑王公南陽以武進士為總兵者再。貧其老屋數椽。去半山橋二十武。公歿。廢為僧舍。目者降乩於李進士賓侯。言生前事甚悉。題所居曰彼岸禪院。屬進士為王將軍碑文。不能詳。乙酉六月之事。予竊有感焉。因禪院以記之。曰孔子不殤魯童。錄取其志也。南陽公之見危致命。豈以成敗論哉。當是時。羅髮令下。同日發難者浙之嘉興。常之江陰。蘇之崑山。嘉定。凡諸郡縣。其民初附。有司不能鎮撫之。激而走險。愛髮膚。忘首領。愚也。士君子承累朝培養之久。以高爵重祿。崇其妻子。乃優游家食。不及効死於兩都之陷者。其志豈一日忘歟。不得已。乘百姓之愚而用之。事雖不成。當亦興朝之所哀。

聖人之所與也。吾崑縣大而濬為東西街道。其發難也。城堞樓櫓。落然無具。儲峙未有一宿之積。倉卒發憤。嬰城死守。以公習兵事。擁為帥。賞明罰信。身先士卒。雖知事無益。徒引義相激勸。故處一隅而聲勢四達。其時總督巡撫諸公皆南征名將。聞而壯之。率精兵數千。載巨礮數具。力攻兩晝夜而後破。可謂雄矣。公被縛。罵不絕口。既而降。容曰。發難者某也。宜殺某。勿殺百姓。公遇害而百姓之幸脫者。至於今。述公語。淚且箴箴然下也。甲申三月。明崇禎帝哀詔至邑。士大夫哭臨於直指署中。先公賜第在署左。每日來集。敘公齒首坐。見公神氣驚。輒論議剴切。預知其臨難不苟也。然

重刻海忠介公備忘集序

陳瓊

言之不足為世用者不傳焉可也言之有用於世者不可不傳以其言之足為世用也即世無有用其言傳其言者苟得生同鄉居相近必不可聽其言之淹沒而不傳吾鄉海剛峯先生瓊人也瓊去雷陽隔一水耳余垂髫時耳先生仕明以直節著心慕之未得其詳也迨游鄉校欲求先生之書而雷無有數於瓊人求先生之書而亦無有後吾友俊夫游瓊覓寄一本余得之喜甚顧中多斷節不可卒讀缺然者久之歲丙申余奉命撫閩始於書院羣書中見有海忠介公文集急持歸亦多闕失與舊本參校補所未備僅十之一二此先生之書之絕續一大機也按先生書有淳安藁一卷卷首有先生題引有淳安政事藁上中下三卷先生自序下卷缺數頁皆先生淳安令時刻之最先者有備忘集上下二卷續集二卷一刻於隆慶庚辰一刻於辛巳雖中多殘缺然皆先生手訂之書無疑也茲於書院文集得榮哀集一卷補入又於名山藏中得先生本傳冠其首成先生全書總名之曰備忘從先生志也余維直道之難行久矣先生獨於狂瀾欲倒之時障百川而東之自起家南平司訓至令淳安調興國內擢部寺出撫南畿一言一行必規倣聖賢不為苟且不為遽就可不謂能行其直者邪世知先生之政事絕人未知先生之文章尤絕人未嘗不言經



術而無道學氣未嘗不言理學而無頭巾氣古淡初折真能於唐宋八家外自闢門戶者先生之書不可湮沒而不傳也因訂其魯魚次其篇目而授之梓俾學者知有先生之文章始有先生之氣節亦惟有先生之氣節始有先生之文章蓋先生之文章氣節皆聖賢之嘉言懿行聖賢之嘉言懿行即人心自有之天理也人苟不味乎天理則先生之行雖至奇而實至庸先生之文雖至淡而有至味矧予與先生生同鄉居相近而忍聽其書之淹沒不傳哉

送葉南田由樞部出守廣州序

廣為治僻處嶺表去京師七千餘里轄州一縣十有五為全粵領袖蓋東南一大都會也兩廣制府治所設於斯大中丞持憲節按部駐於斯藩臬兩臺之署列於斯滿漢官軍防禦會於斯以至使節之經臨番舶之往來貿易及羣州邑之訟獄賦役丁口提挈而綜理之罔不萃於斯守茲宇者必有超羣之識邁等之才不可易之守三者備然後勝任而愉快宋儒有曰惟天子擇宰相宰相擇吏部吏部擇郡守天下何憂不治有見乎其言之也今歲初夏廣守缺人銓部慎重選擇不輟授厯秋仲乃得南田葉公而委重焉蓋朝士大夫咸為得人慶予忝同曹今又得依鄰治謬以言贈予惟今之郡守即古者刺史二千石之職本成周封建之遺而易其名也自易封建

為守。能其職者。惟兩漢最號近古。如龔遂黃霸卓茂魯恭聲績最著。史氏所稱。當時  
施設。亦惟以勸農田興水利。弭盜賊為汲汲。農田水利所以養之。弭盜所以教之。蓋  
井田學校兩者。居治天下之大端矣。廣州為四通五達之衝。番民雜處。皆棄本事末。  
末利。推埋屠狗之姦。亦時竄其間。厥稱難治。然任無艱易。存乎其人。南田醇儒。哲匠  
原原本本。有靜以制動。簡以禦煩之方。諸如承上率下。戡兵救民。撫外夷。禮遇客平  
庶獄。皆游刃有餘者。余獨於賦役丁口二事。不能不惓惓屬望焉。今之廣。非昔之廣  
比也。有丁則有役。有田則有賦。天下之通議也。按版而徵之。計徒而趨之。小民亦何  
能旦夕緩。獨是賦外有賦。役外有役。小民往往力不克勝。夫役不勝。斯人逃。賦不勝。  
斯田荒。此中萬不得已之情。每抑鬱於下邑窮檐之隱。不能上達於刺史之廷者。亦  
復何限。此嶺表州邑人民之同痛。而廣州所轄地大人殷。所患尤劇。惟簡徵斂。寬徭  
役。合十六屬而一加清。則得不有望於仁人之新政。為覆育乎。南田自冲年服官。即  
熟聞忠節公過庭之訓。與詩禮為家。處詩曰。蔽芾甘棠。勿剪勿伐。召伯所茇。又曰。芄  
艾黍苗。陰雨膏之。四國有王。邠伯勞之。曲禮曰。毋不敬。安定縣安民哉。既口誦而心  
維之。必將見之行事。俾嶺表十萬戶。盡膏陰而沐甘棠之庇。余故執筆以俟風謠之  
獻焉。

平情論

方邁

蘭谿諸生郭兆先父夙邁狂疾。閉之十數年。一日忽逸出。遍索不獲。有告其為金華人所殺而埋之者。兆先具其事於觀察使。下縣推埋驗屍。非真。坐告者罪。兆先以為父故原免。後遂無踪。責兆先者曰。若朱壽昌棄官尋母。竟得母。兆先失父。不能窮探。遠索安處。故曰此非人子所為。即信其已死。亦宜寢苦枕塊。持服終制。不當總總一衿。從吉預試事。忘父之仇。禽獸奚擇焉。其立論甚正。顧竊疑未嘗一設身處地審勢察理。不為平情而失之刻也。夫壽昌之母嫁耳。其人固死。然在也。然母出與廟絕。河廣之誅。壽昌甯不聞焉。其隱忍待之五十年後者。夫亦迫于義而有所不敢也。乃此五十年。壽昌固已有妻子。仕于朝。光顯焉。不聞以母之故。棄絕人世也。今兆先之父。以狂疾廢人。豕突奔潰。杳無形影。茫茫宇宙。何處追尋。必欲其裹糧重繭。索之于無何有之鄉。此固勢之所難為者也。意者如人之多言相傳已死乎。發其瘞而屍未獲。訟諸官而案已誣。雖其信為死。而兆先必不敢有死其父之心。即兆先有死其父之心。亦必不容有死其父之事。乃欲貿貿焉復魂為位。赴親戚告有司而服之。此又理之所不得為者也。夫天下之事。理與勢而已矣。朝廷之法。禮與律而已矣。如兆先之事。攷之禮經。既無明文。按晉建武元年令書有曰。二親生離。吉未分服。喪則凶事。

未據從吉則疑于不存。心憂居素出自人情。有如此者。非官制之所裁。蓋從賀循議也。史稱賀氏自漢以來。世傳慶氏禮。而循為晉世儒宗。朝廷疑滯。皆諮之于循。循輒依經禮而對。其為此議。蓋深得禮意。至大興二年。前組議以二親陷沒。寇難萬無一冀者。宜使依王法。隨例行喪。而庾蔚之折衷其說。以為二親存亡未可知者。宜盡尋求之理。尋求之理。絕三年之外。便宜婚宦。允嗣不可絕。王政不可廢。故也。猶宜以哀素自居。待中壽而服之。若賊平肆害之後。尋覓無踪跡者。便宜制服。似與賀循之議更為詳悉。至唐德宗母沈氏。安史之亂。陷賊。不知所在。代宗世賊平已久。德宗即位。猶遂上尊號。遣使分求。越至憲宗。已歷四世。禮官始奏。庾蔚之議。舉哀制服。蓋以其中壽之服為是。而不從其即便制服之說。故明給諫章格庵于國亡之後。哭別墳墓。祝髮而去。不知所向。其子章無咎于龍山講學之次。流涕相質。其時先輩張南士徐仲山各咨嗟謂。且尋覓數載。計先生八十之年而服喪以葬衣冠。本朝陸梯霞亦以其兄出亡。兄子已舉進士。不能得父所在而死。諸於毛西河。西河亦以為其家人。令且服進士喪。若亡者則當計及亡時十二年後。乃始招魂而葬之。各服所應服之喪。比古禮往事之可比例者也。律與禮相為表裏。不孝之條。列于十惡。內有匿喪之罪。又有詐喪之罪。蓋以祖父母父母未死而稱死。或以祖父母父母舊喪為新喪。皆

同于詐。即皆治以不孝之罪。若親之存亡未卜。執以為亡者。將罪之以匿喪。執以為存者。又將罪之以詐喪。均之不孝。議律者將何所法守而可也。且夫人之大倫。惟君與父。弟子員雖微。亦朝廷之造士也。既養之學宮。升名宗伯。輒復無故自甘廢黜。名曰為父。實無救於父。而迹近忘君。舉一廢百。豈中庸之道乎。許世子止親弑其父。乃曰。我預夫弑者。不立其位。夫不貪位者。許止所以自解其弑父之奸也。然聖人終不以不立位寬其弑父之罪。彼不弑父者。乃曰。不立位者。可以免責也。是將與于許止之甚者也。昔衛輒拒父。夫子猶食其養。匡章通國皆稱不孝。孟子亦與之遊。孔孟豈不知禽獸之不可與同羣哉。君子以眾人望人。則易從。敝蹤天下。惟舜為然。以舜自責。則可。若以舜責人。恐天下之如兆先者。將責之不勝責也。然則為兆先者。宜奈何。執禮秉律。號泣陳情。求折衷于在位之君子。若不得請。心憂居素。以終其身。如朱壽昌之罕御酒肉。與人言輒流涕。雖一生仕宦。猶以為孝也。

### 通俗宗祠議

禮之難行。由來久矣。成周之世。禮制大備。然康王之命畢公。已曰。世祿之家。鮮克由禮。夫周禮專為世祿而制。古自天子以下。諸侯大夫士。皆有祿。下士與庶人在官者。同農夫受田百畝。農夫之秀者。即為士。禮雖不下庶人。而文以義起。則以庶人行士。

禮亦不為僭焉。自井田廢而農無恒產，封建廢而官無常祿，則禮壞自漢以庶人為天子而諸侯大夫士皆出于庶人，則禮廢自是以後升降無常，苑枯異候，有朝為庶人而暮為公侯大夫士者，有朝為公卿大夫士而暮為庶人者，有一人之身而公卿大夫士累時而歷者，有一家之族而公卿大夫士分戶而出者，人異其遇，家異其宜，議禮者將何守而可？夫禮莫大于喪祭，喪禮可以素位而行，祭禮不可以歷時而變，今之為公卿大夫士者，其暫而為庶人者，其常無已，則且以庶人之事通公卿大夫士之窮。古者別子為祖，繼別為宗，皆以諸侯次適得姓受氏者為言。然周禮太宰宗以族得民，大宗伯以飲食之禮親宗族兄弟，則欲得民親族，辨其等而聯其情，必立宗而後可。古者立宗以族人不得以其戚戚君，故為之別，親為貴，屈也。今雖貴為公侯，亦不得以君臨族人，則宗子以賤領貴為貴，屈于親於義無損。但古者大宗必以適重世爵也，今無爵可世，則當論其長而不必拘于適貴，則謂之宗子賤，則謂之長支。主宅合族則必稟以行，庶統緒明而可以長世。至立廟之制，天子七，諸侯五大夫三，適士二，官師一，官師者鄭註所謂中士下士也。今惟天子立七廟，間有世爵為公侯，俸入不足，無財不可以為悅，則五廟或立或否焉。其為卿大夫士者，遷徙升沈，家居日少在其位，既不暇立，位黜則既立復當廢，進退無所據，于是卿大夫士之家多

仍其故下從庶人之禮而祭于寢庶人禮不立廟素封之家不得不可以為悅然禮中士下士得立一廟古雖一命為士而又分為三等若其在鄉曰秀士升之司徒曰選士升之學曰俊士升之司馬曰進士既皆以士名即未命爵亦當在士之列則今之遊于庠入于國學責舉於鄉者皆可以下士之禮行之間立一廟原未越禮今必以為僭而為之諱其名曰祠堂曰宗堂于禮無攷則又不如竟名家廟之為當也第古者士必自立一廟今則力有不能而必合一族之力以為之古者一廟專祀祖禰今既合一族之力以為之則祇可以祀始祖而于三代私親不得不各祀於其寢此亦勢之不得不然而于士立一廟庶人祭寢固可並行而不悖者也古者廟在宅左今則鄉閭可以合族都邑反難萃處必于長支之家闢堂藏主兼以長支三代私親并廁其中毋論長支無力不能任合族之事而以合族助成與長支併祀私親言之不順且無以處夫長支之絕無下士者故不若長支私親亦祀于其寢而家廟之制則專以祀始祖其左則祀合族有爵位及有功德者為不祧之主其右則祀合族十代祧主自高以上者若支庶之寢不得立始祖之主而長支之寢則得兼祀始祖以別大宗每歲元正月朔夏冬二至則于家廟行禮設祭餼餘燕私以收宗族春秋時薦則長支自祀始祖于其寢不合不燕不必兼及族人至支庶有事於始祖必請于

長支而後行支子不祭明其宗也主也之禮則祭始祖必以長支尊祖之義也或族人  
人有貴如公侯者則有加遵加獻所加之數以其人主辨分之義也不祧之主則以  
爵尊者貴貴之義也祧主則以齒之尊者長長之義也慎守完齋駁奔執事則以能  
而有品者賢賢之義也此所謂緣情因時從宜從俗之道也有謂祭始祖合祧主為  
僭諸侯禮者然唐賈公彥謂大夫之鬼薦於太祖壇士之鬼薦于廟則古者士廟固  
有去壇之鬼始祖祧主合為薦享之禮且天子之太祖月祭諸侯時祭今去其春秋  
而止行於夏冬視諸侯殺其二自有差別抑又聞之士有田則祭無田則薦田者祿  
也今雖行禮之家自有祭田然非受之于君亦與無田者等則其所以奉歲事者薦  
而已不得言祭夫薦則何妨併及于諸鬼也哉若夫器用之多寡品物之煩簡則各  
隨其財之有無少而不至于缺豐而不及于僭奢儉中度凶荒殺禮惟其稱與時而  
已如必待備物而後舉則若教之鬼其不至于餒也者幾希

### 胡穆子燕傳

胡穆孟者閩人其先以武功世襲衛指揮父上琛當唐藩亡國率家人朝服北向再  
拜仰藥自盡閩門殉難僅餘二子穆孟其長也穆孟少遭變故孤苦無依右衛守備  
王邦鎮有女素聰明知大義以穆孟忠臣之後因許字焉為經紀其家穆孟將門子



韜畧騎射少成習賢鼎革興隆無以自效勉強應武科捷鄉試而連江沈廷棟以同年友雅善穆孟嘗請書山寺旁有荒寺至夜輒聞人語喧穆孟心異之潛往窺見燈燭煌煌數十人列坐左右分校簿籍若掾吏狀穆孟竊疑荒山中豈有長吏明會簿書如是其急耶微詢故有對者曰適者劫運將興四方有亂民遭兵戈刑獄之厄不可數計凡劫中人悉已定此其籍也穆孟試取一帙就視則已名在籍中倉皇自失眾忽不見穆孟自是始戒心淡然無復功名之志矣甲寅靖南王反徵武甲武科以為車騎驍騎諸常侍穆孟堅辭偽命逃之連江就廷棟家廷棟房師為某縣知縣某以事至省廷棟具書幣修候已入緘未發也穆孟竊視其書中述靖藩舉動乖亂人心不屑難成大事該曰此何等語豈可形之筆札間耶住必獲咎因取書潤色之稍隱約其詞自為吏書入故緘而廷棟未之知也以付使人至城下為門者所誌索得其書涉誹謗發書刑曹逮廷棟窮治伏辜論死穆孟聞之直奔還謀諸婦曰沈七罪固當然其母老妻父楚楚未有後若赦之痛可念為之奈何婦曰沈母春秋高臨年見愛子受戮必無生理其妻寡無依亦必偕亡是沈君一人死而三人俱斃也君素善沈君安容坐視穆孟曰然今惟吾可以代沈君死但未知卿意何如耳婦曰殺身取義此烈丈夫事也君為奇男子妾甘守愚婦乎君忠臣之冑有呱呱在膝下天道

不遠必不使胡氏無後孰與沈君有滅族之慘耶君勉之毋以妾為念也顧策將安出穆孟因語之故即赴刑曹具狀自伏刑曹疑之召廷棟與質廷棟實不知易書由爭死甚力穆孟曰書實吾所為此易辭耳今第使兩人各具書書跡同者坐復何辭刑曹然之使書果穆孟筆乃釋廷棟而辟穆孟論決之日王氏設奠西市哭極哀取其首而縫之具衣服斂且市兩棺屬其子於廷棟與穆孟之弟令撫視之而自縊于尸側觀者數千人莫不感激泣下傷穆孟之無辜而嘆王氏之烈以為此真胡指揮佳兒佳婦也明年王師復闢贈穆孟官陰其子而沈廷棟亦以武科需次授永定門千總云

論曰吾閩素稱忠義之邦靖藩變亂鄉先生爵祿有列于朝或感龍虎千里奔投或僭擬蕭曹一心効力仗節死義者寥寥無聞焉穆孟之死為友非為君也當其不染偽命庶幾乃父之志亦既越境可免矣卒以誹謗代人受戮豈劫數之難逃耶何禍之酷也王氏以大義勉夫復殉其難可以愧當時之鬚眉而巾幗者然靖藩叛逆淫刑以逞行道之人皆知其必敗同時又有林捷使者以私議偽鑄立致之死本朝旌為義民嗚呼逆賊之所為如此而尚可覩然事之乎

青要山石鵑記

呂履恒

青要山者北邙之一支山經所謂帝之密都有黃花赤實者是也其東為橫山以嶺首西南橫故諺稱橫山頭云其川長亘數十里至橫山則山環水曲蜿蜒四塞居民依山厓為陶穴之固皆在東北其西有大溪源出澗池山谷間與澗水絕派緣西山之麓北流去東之橫山僅里許如披面也過溪不數武水劃山開若門闕然有樹可以棲影有石可以鳴琴泉流沙陂上清可以鑑輕條時出秋水灌河時匯為淵凜自縣厓而下淙然平洶矣自是入谷盤曲幾半里有大石兀立如欹屋四據下可立五尺之泉上可坐數十人石上刻碁局莫知其始苔蘚積厚如墨如粉如琴瑟非一狀又有泉當其脣鏗洪鏗豁若聞遠鐘其蓄於石罅而灑於水髮間者靜聽久之復如筑如琴去數里乃不復聞木樛積溪中水沙蕩之歲久融結為石鏗而出之枝葉之側理宛在也其大致如斯斯則青要為北邙之要領橫山為青要之結脈石鵑則橫山之奧宅也昔先太傅實生茲土夢月巖先祠在焉巖上叢柏茂蔚先太傅所植也下有陶室即其誕處自兵燹後邑無完宇家大人遂於茲卜居今長予二十三年矣予夙有泉石癖聞樵牧者說山鵑之勝心竊艷之顧佳日與良朋多不相值壬子別於鄉舉將省親於漢中治所慨然有登眺之意而外兄孟貞甫亦發興成之又以他事

不果。間一月復雨。道海不可行。至重九前一日。始如約。乃攜同人數輩。為竟日遊。辰而畢。集過溪入谷。旋憩且起。徐行至石上。坐談往昔。復入臨下。寒氣侵人。肌骨不可。以久。乃出而披瀝。并登崇崖。各題詩其上。雖山水有清音。復以絲竹佐之。又伐鼓效。吳歈十番。搥響達天表。清風颯颯出叢薄。間既而朱曦告夕。萬象屢遷。青紫金碧。山乃多眾容。回望谷口。雲蓬蓬起。蒼狗白衣。成觸類之形。溪聲喧靜如初。而林巖潛黑。曖曖遠村。人不可辨矣。諸同人曰。此山帝之密都也。奧區出入間。意天所矜惜者。盡去諸乃各咏所述而歸。予為之記。

望水亭觀瀑記

去鎮甯二十里。有懸瀑焉。其源莫究。自黃桂戍北得石梁。嵒巖高潔。已有鳴湍急瀨。飛素流淙淙。瀉梁下。抵戍食頃。雲霏霏承宇。以為雨也。出視之。天氣澄明。東曦向辰。居人曰。此瀑之飛沫耳。嘗激數里。如小雨。餘霖因緣屐跡之。瀑出山家上。匯為小潭。其色黝綠。以石林掩抑。莫知其底。視望水亭。猶在霞表。歸然峙其南也。竊意亭去瀑遠。其睇視良難。及至。曠若披面。僅咫尺矣。乃由山家窮其底。頂踵露。俱在目前。懸流千仞。倒瀉直下。雷轟電掣。傾人視聽。立而望之。若三門然。上有虛宇。覆以晶簾。輕明遠燭。表裏洞達。軒脊凹腹。不外拓而中斂。以故從天而下。高空無闕。日景方中。

變相為琉璃五色冷翠幽光幻入泡影峭石逆之激越四射跳珠霏玉不可悉狀下注犀牛潭色與小潭相似而深不可極或云有靈物潛其中出則有光銀濤碧波互易呈奇其氣上騰非煙非霧綸川彌谷聚而益升時繽紛穠郁若沃饒蒸甑力能更代陰陽吐納雲日其為神異不可測也亭後多苦竹紅蕉間之目不暇給瀑之西厓則有女貞檉栢之屬扶疏高下枝幹盡然葉卷沃若并植而分榮增其氣勢矣厓東無樹石色上蒼下赭有洞孔望之深黑下有碑遠不可辨碑右上有雪映川霞四字其大準諸掌若就視當復什伯相傳為名藩筆或然乃其將至復有幽芳異卉羅生左右霏紅炫綠隱翠約黃因風送氣芳馥襲人自石梁而下凡三四里於是俯仰任放遊目四瞻巖谷移瞬晦明屢變所存既往而來者方新乃思萬物之動靜原二儀之翕闔霍如心悲天海豈獨情移山水而已哉俄而義和弭節叱御將西僕夫輟轡告行忍而舍旃出亭即荒荻蔽虧不復望見其處香色粉葩泯焉歇絕又里許復有奇峯左出峽束兩厓中清瀨素湍隱隱東去

### 古褒城記

國初以重兵駐漢中其散軍獵於山路迷得微徑數里徑復絕行亂山中林木湮塞泉聲激洑出叢薄間與猿狖禽響軍怖甚乃息馬以步約十餘里得一溪深可沒馬

腹乃騎以涉過溪徑漸坦其土皆闢又數里得一闕若廢城然闕旁二古槐高可際雲其陰蔽數畝許槐下有大礮徑丈餘軍行罷忘懼乃羈馬拂礮坐恍恍者久之忽有蓬首鬘面若山精者數輩從草間出逡巡不敢近睥睨遠視移時乃前問其處曰此古廢城也與外間絕吾儕先世以荒逋累遁此今二百餘年絕無人知者子誰者導何乃得達軍告以故眾意怫然其一老者要於家具鷄黍甚謹此中桑麻鷄犬耕耨織作之具悉如外人獨無鹽代以鹵土其俗男子不冠婦人椎髻不笄扶老字幼嬉如也軍心異之問其地廣袤數百里其居眾以萬室計何所統一曰吾鄉之少者皆聽治於其長其尤謹厚者眾長皆長之有弗率其長督之至再則告之眾長之長或終不悛而莠害於眾者眾共棄之其父兄不聽為仇至於弔慶宴會皆取給於中則以器用粟帛無從得金錢盜賊虎噬數十年不一見聞吾儕相習而安不願出也子盍留諸否亦勿洩於人信宿軍求去此中老幼悉送復出他途途多岐不可識別約五十里詐告以前路眾乃去軍既出偏訪於人無知者鹽估聞之曰往有蓬首鬘面囊載擔負粟布者不知何許人夜至乞易鹽將無是耶其後巡兵數跡之迄無所得呂子曰予至漢中有洋川晏生者為予說如此其事頗與桃花源類予聞之是記元亮之寓言也有黃農虞夏之思焉故曰不知有漢茲所傳聞殆不虛以故記之俾

司牧者知所以鳩吾民無使去汝適樂郊乎。暇日閱郡志及華陽國志未有所謂古褒城者。或曰即古褒國也。志失攷。

### 龐貞文先生傳

龐貞文先生克愼河間任邱人。父招俊以尚書名家。母曹氏生三子。先生其仲也。生平多大節。始為諸生時。值崇禎壬午之難。母氏殉節最烈。先生痛不欲生。既而曰。是重死吾母也。盍圖所以不死吾母者。於是乃哀籲當路。事得上聞。列祀典。性友愛兄弟。將析居。悉推膏腴田於伯季。而自占其硤确者。人以此多之。好讀書。家貧不能購。日手錄萬言。積久成帙。以經學教授鄉里。稱老宿云。樂善喜施。不責其報。同邑井安人者。故戶部劉正吾妻先生之親戚。諸母行也。鼎革後。貧且老。先生時周之。過必治具。惟謹安人感而泣曰。吾昔富貴時。戚里受吾惠者多矣。使皆如公。吾何憂饑寒乎。時有責學于束脩者。將質之官。或告之曰。此可令龐先生知否。其人慚而上。初先生之為諸生也。鄉有大璫聞其名。以厚貲屬為書記。先生辭焉。及崇禎癸未。流賊將犯北京。其渠帥有由固關入者。士人多具名紙稱順民以迎。先生曰。賊逆天犯上。凡戴毛髮立天地間者。當為國復仇。奈何順之。獨不往。嗚呼。先生可謂善守其身矣。當熹宗時。天下未亂。璫勢之成。率士大夫為之。吾聞諸耆舊云。璫之初起。懼士大夫議其

後每養贖入則惴惴然恐因稍稍餌之。或染其指濡其首。遂能兒子薦紳輩。使反噬正直。血肉狼藉。北寺獄慘矣。於是士氣奄奄。若死灰敗絮。然而盜賊因以起。則又有忌功議撫以誤國是者。若而人坐視翻城倒戈。如秦越人之肥瘠。以致跋扈之帥。養寇自肥。又何誅焉。假令當時士大夫有見幾守正如先生者。必能謹於禍始。俾天下無事。何至以鉤黨致寇。覆人邦家乎。先生學既成。九舉不第。終不屑以他途進。年八十有六。以疾終。長子嶠。已未進士。由庶吉士授戶部郎。知建甯府。以忤時去官。世稱雪崖先生。

呂履恒曰。予官京師。鍾茂宰聖輿為予言。龐氏世居吾邱。壽王臺側。稱今族雪崖正道直行。有父風。以孝友施於政。尤善為詩。予嘗讀之。思一見其人。不可得。及觀貞丈先生狀中多嫩行。不勝書。書其大節。關治亂者。俾後之君子論其世。知所法守焉。

陳丹亭傳

陳丹亭。名庭桂。字資子。江西臨川人。大士先生之從孫也。高祖愚所。祖石來。皆以進士顯仕。父天一。贈文林郎。丹亭生有異質。讀書一寓目即終身不忘。九歲善屬文。日成數義。贈公教之嚴。嘗終歲不使履戶外。家故藏書。康熙甲寅間。從父避亂山中。猶日令蒼頭輩擔書以供誦讀。常不能給。亂後。湯其業。居貧不問生產。或日夕忘食寢。



意甚得也。父歿與弟士千等友愛尤篤。性端介不妄交遊。自二三素心人外。嘗接席不交一語。甲戌成進士。已卯知湖南之新甯縣。縣古夫夷國也。地臨五溪蠻獍為難治。丹亭設方計以去奸民。興學校。緩催科。甯民賴之。初邑多巨猾。輒營私局聚其中。謀起滅訟。獄持吏長短。科斂以自肥。餘以餌吏。丹亭具牒上官。悉驅之。改其局三棟為讀法所。兼育孤幼。聚學徒焉。甯民相慶曰。吾邑故不甯。甯之自君始。乃今然後稱新甯名矣。時巡撫松伍趙公性嚴正。湖南六十有三縣多被覈。獨廉丹亭治行數加紀錄。至是上其名列為五部主事。嗟乎。令之為吏者。亦孔棘矣。簿書期會。目督過之不暇。而欲移易風俗。革薄而從厚。誰復為之。故其能者務為赫赫名。善事上官求速化去。而廉謹者或怯懦視民間一切。當興除事。無不敢置齒牙。以故奸宄為神叢。而胥吏且憑之以相恐。幸而遇上官能執法。不名一錢。如丹亭之於趙公。亦云奇矣。而又齋志以歿。豈不哀哉。丹亭以丁丑至京師。明年卒於邸。貧無以殮。其友李如黃元鍾蕭大經三人者。經紀其喪。醵金以歸葬。因共誄之曰。凡民之生。莫不有死。誰其碑諸口而傳諸史。或生榮而歿則已。或厚實則無而顯名終起。有志者莫取焉。甯為此勿為彼也。嗚呼。丹亭古之君子出為廉吏。處為貞士。舍不充口。衾不掩體。儻舉其棺友為之誄。天乎人乎。誰使丹亭而止於此。蓋實錄也。呼。即其生平可知矣。

呂履恒曰。予與丹亭為同門友。己丑十二月。共治吾師宋子善先生之喪。時大風寒甚。丹亭衣敝絮無裘。正容色不少怍。日步詣喪所。可十餘里。弔者咸嘆異之。同年輩招飲食。恒不佳。狀謂其多介少通良然。卒之夕。以母謝太孺人未葬為終天恨。曰。亟語吾兒。以畢我志。勿以分累吾弟也。因泣下。已而談笑如常。論生死夢覺之說。言皆有倫脊。且誦王荅堂虛生劇數曲。氣甚舒。若一無所苦者。其縣解者耶。予聞諸其三友云。

鍾子文先生暨兩恭人合葬誌銘

先侍御戊子舉於鄉。出鍾子文先生門下。嘗稱先生之賢。教履兄弟。誌之不敢忘。其後四十餘年。始奉教於嗣君聖興。聖興綽有父風。教廉節。多才能。文章以先生合葬誌銘。委履履思先侍御之教誨。又感聖興不徇名位而屬之鄙樸無文之小子。遂受命不辭。乃隳括其狀。誌其大者。先生諱性。機子。文其字。元配黨恭人。繼趙恭人。長子輓。壬子拔貢。泗水教諭。次輶。乙丑拔貢。廣西某縣知縣。即聖興也。俱趙恭人出女。二孫男。二。聘娶詳狀中。先世江右吉水人。明正統時。始祖泉以武功世襲錦衣百戶。遂隸大興籍。父國相。贈朝議大夫。先生由進士任濟南推官。與巡按御史力爭。可否必平。允乃已被召。官禮部祠祭司主事。歷贊諸大禮典。試河南。督學山左。所得士如

湯潛菴王阮亭田漪亭皆民譽也。先生居官廉介。督學時。閱文不假幕客。備兵曾濮間。討平榆園大寇數千人。歷官至江右兵備副使。甫三月。海寇悉平。嗚呼。士以盤錯別利器。虞詡之在朝歌。冀遷之於渤海。豈嘗侈言經濟哉。平日志有所不為。而一旦臨事。毅然不知有身。乃能建非常以成大功。何者。誠積於中。而不可掩也。先生於學。無所不窺。制義宗王。唐詩歌本李杜。所著太平經國書及大觀等集。行世。世以為名士風流。而不知其戎畧若此。歷官數十年。家無尺土。猶以一園被謗。不能免茲多口。夫勵志絕人。則負俗之累益深。然而千秋萬世後。富貴有權力者。行就湮沒。而若人皤然表出。獨與日月爭光。亦安能復從而遏抑之。悲夫。悲夫。有志者可以興矣。先生生於年月日。卒於康熙甲辰十一月二十九日。山左祀名宦。將卜吉。暨兩恭人合葬秣陵山新阡。以歷官山左。山左人思之。因留葬焉。黨恭人生卒別誌。趙恭人生於天啟癸亥。卒於康熙辛巳。性不佞佛。尤善教子。命聖與師事漁洋山。蘊兩先生狀。謂以母兼父道。信夫。側室賈以苦節終。恭人悼之。若同父。先生之葬也。李少保黼菴既為之表。履又何加焉。姑舉其大畧若此。銘曰。

我生之初。趨庭有聞。先生之德。允武允文。孝於親。割股而辭。極故其官。潔已而忘身。見阿堵物。則蹴之。於困窮人。則畜之。不責其報。善則欲之。不愧於心。行則篤之。惟兩

恭人克相夫子象服是宜淑慎爾止百歲之歲牛眠龍起同穴孔安以利其孫子

張公葆孺墓表

嗚呼此有清節士張公葆孺之墓也予嘗聞公之行事不獲見其人其孫漢出吾門讀所為公狀慨然想見其生平未嘗不激昂奮發興起其志氣而嘆士節之不可不砥也公諱良伍葆孺其字也又字允侯號黃石其先蜀之巴縣人始祖均德為元明威將軍入滇家石屏州世有隱德曾祖汝橋舉鄉飲大賓祖煜然歲貢生官訓導父一甲明崇禎庚辰進士累官太僕少卿贈大理卿妣王淑人公生而岐嶷篤學有志尚入郡庠食餼性善飲可一石至醉則豪吟睥睨旁若無人教子若孫講讀遵大理公家法足不履公門士以此重之吳逆之變建偽號開科趨仕者如鶩公避居山村中飭諸子勿應試偽有司過之力告養母不出後五年王淑人卒論者高其節且服其先識云今夫平居談節義章縫輩類能津津齒頰間或語及逆節輒裂袂詆罵不使齒於人此非必盡偽亦天性然也一旦時窮力迫搖搖然視其身如懸旌惟風飄所左右齷齪者無論已即一二自好者亦不克反眾獨立矜然自拔於塵垢之表然則士之克以節見者鮮矣至若分符守封疆為天子死其職如顏魯公之使李希烈段太尉之擊朱泚前史亦難之況以天末儒生去京師萬里官籍未通身家可念且

際乎顛沛之頃者哉。予所以表公之墓。不禁三致意於士節之難全也。公年四十。應明經。至七十。恂恂如童穉。嘗以善退為學志。不欲上人。若無有甚異者。顧其於忠孝大節。確乎有不拔之操。而天亦若善佑之。俾其兩全無遺憾。非積善有餘慶者。而能若是乎。往聞吳逆變時。甘忠果公文焜。及馬文毅公雄鎮先後皆致命遂志。至胡尚書兆龍。初為漢中副使。道聞難時。匿其印於稻畦。身為酒家傭。卒用自晦。以全臣節。斯亦奇矣。易曰。過涉滅頂。不可咎也。曾子稱臨大節而不可奪。若忠果公三人者。或以死事成仁。或以匿身免亂。事不必一轍。然皆表暴於世。荷國家殊恩。封馬鬣。晉通顯。可不謂榮焉。若我張公。一介砥節。不求聞於當世。世亦鮮知之。顧使其名湮沒而不彰。非後死者之責哉。公生明天啟甲子。卒康熙戊寅。得年七十有五。葬鄉飲公墓側。卒後五年。始授南甯訓導。配許氏。有淑德。與公同穴。子五人。德宿。景宿。吉宿。台宿。元宿。女一。孫十二人。自景宿出者曰漢。

萬壽科進士。由翰林院庶吉士授檢討。嘗為子述公軼事。乞表其墓。且曰。公承家五十年。不替先德。易箴時。謂子孫曰。吾今乃然後可見吾祖若父於地下矣。其守身以事親如此。嗚呼。此其所以為節士與。

擬平楚萬言策

徐旭旦

世祖奄有九有據一統之鴻圖我

皇上從而光大十餘年來民無風鶴之驚野無澤鴻之歎成康文景之盛將復見於今日矣不意負恩逆臣抗命反叛分據土地囚困人民雖朝廷德教暫時而阻指日可以蕩平第未免勞我兵驚我民而傷我財耳夫使諸賊萌亂之始翕然亡命而來當是時城池未修兵甲未備將卒未訓練設也彼借我之兵搆資我之夫馬用我之糧草藏形隱跡長驅深入所到之處不待攻擊可得也而賊知天心眷顧我清民心愛戴我

主且禁旅精銳足以外援而有餘內帑充盈足以支給而未乏彼即易於得其地勢必難於久守不過擄掠遁去吾可以邀擊其歸賊知之而弗為也今據險竊偽以統其眾交連諸逆以樹其黨因而先擊其附近一二易取者以示其威隨即固守要害訓養屯積為自衛而後攻人之計時而來也或勝不前或勝反退乃誘我兵而勞我耳或忽然攻此地或忽然攻彼地乃分我兵而勞我耳或倚山誘敵或傍水進攻乃欺我兵而勞我耳吾欲進攻彼有險可恃坐而待戰彼又不來久而久之兵漸疲矣民漸窮矣財漸竭矣設有水旱之患內亂必生將若之何哉幸賴

祖宗之靈天心之順連歲豐亨盜賊不起俾朝廷得以併九州之力討此叛逆也但兵已疲民已窮財已竭若於此時而不急為之計將來之患有不可言者矣何則今日之弊諸事皆有名而無實策今日之利者惟有因名以責實而已我

皇上遣禁旅以外援宜乎天戈所指無敵不推何故以如熊如羆之師攻此羣醜而損折甚多也蓋千里趨戰兵法所忌百里餽師不宿飽寇起不測而乞師於數千里之外以數千里以外之師越山渡水披星戴月赴此卒然不測之寇決機正在須臾恃敵乃在旬日之遠其勢已不相及況往來道路火速救援奔馳勞苦莫此為甚我

皇上慮此奔馳勞苦之兵不足以進取凡遇臨敵之時休養是諭非畏敵也愛兵以期必勝

聖人臨事而懼之意耳無如兵視敵為兒戲一領錢糧不自養不養馬而養婦人將朝廷餉銀使人見之薰心熾欲此等隱奸甚於顯盜既下害百姓之婦女又上耗三軍之錢糧況行伍之中有婦不揚而奔馳勞苦者之精力何堪此暗裏消磨耶毋怪乎兵不壯而馬不騰此一弊也兵之所恃者器械耳當初出兵之時干戈非不齊整甲冑非不鮮明年餘以來風雨淋漓血汗浸漬壞者居其半日涉月沒人困馬斃

棄者居其半。將不察所用之不堪。兵止求有器之應數。人見其披甲戴冑也。實無異赤身露頂之夫人。見其稱戈比干也。實無殊執挺持竿之眾。嗟乎。以酒色虛弱之徒。騎皮骨僅存之馬。而執頑鈍不堪之器。欲期其百戰而百勝也。不亦難乎。此一弊也。從來募一兵。思得一兵之用。乃不虛此一兵之餉。今綠旗新募之士。不問老弱。不問病怯。不問短小。投者一槩收錄。千百之中。竟無一強健之卒。夫既係老弱病怯短小無用之人。加之主將者。非將兵之材。所教者。非旗鼓之節。兵無勇敢之氣。將無訓練之方。一旦驅之衝鋒破敵。惟伸頸待殺而已。不獨徒害愚民。兼且挫我之國威。何為乎徒糜有用之金錢。而募此無用之兵哉。此一弊也。應募之兵。大都游手無賴之民。平日之負債無窮。新募之廩給有限。法當於招募之時。即申嚴禁之諭。凡應募之兵。從前逋欠私債。刻下不許強人索討。如是則應募者必多。而天下之窮民。何莫非我之富兵乎。不然。以朝廷之錢糧。而下代窮兵完私債。欲望其器械精良。衣甲齊整。必不可得之數矣。此一弊也。江湖之上。安瀾無虞者。賴我之水戰備耳。我國家自海氛揚波以來。防守之具。無不畢備。以十餘年禦海之舟楫。分而攻此小醜。宜乎其有濟也。但去歲調發救援之沙船。雨浸日暴。板爛桅折。朽壞不堪任事者。宜早命江南地方。豫造以防軍用可也。江南地方安堵如故。百姓樂業如故。商賈往來如故。且



也。匠出於此。木集於此。釘麻等件。無不充裕於此。若舍此而他求。正恐匠非其匠。木非其木。釘麻等件。皆非豫備。必難告厥成功。此一弊也。兵以練而始熟。熟乃精。精乃勇。勇乃勝。馬步皆然。水師為甚。故開蓬駕舵。必須素習水性者。而水師之兵。尤必挑選勁卒。寢處舟中。先使之坐臥得甯。然後站立漸定。久則張弓試銃。施展如意。使士卒在舟無異於在地。庶可飛帆直搗賊寨也。今之沙船名號水師。非步卒即馬兵。除江南調來者之外。總無一慣習水性者。故一遇風波蕩擊。手足無措矣。嗟乎。如此水營。徒費朝廷之錢糧。而糜朝廷之工料。無濟也。此一弊也。若夫用兵之道。莫大於賞罰。賞及無功。不足以勸。罰失有罪。不足以懲。興兵至今。官之無功當罷者。仍然尚居原職。三軍見其如此。誰肯用命。違誤軍需。棄城失機者。或暫貶而即遷。或待罪而依舊。三軍見其如此。誰肯立功。此一弊也。我

皇上用將甚急。求將甚殷。然陞用一將。偏裨未必服其畧。士卒未必服其智。逆賊未必服其威。今天下受我朝廷雨露之恩。已三十年。豈無勇智之士。願效力於皇家者哉。第豪傑之人。限以下位。而不得用。智畧之英。短於弓馬。而不節用。恬退之士。恥於援引。而不顯用。所以求將雖殷。而名將未應者。以

皇上求將之路大狹也。此一弊也。我國家以戰守之權。專責將士。而守令不任焉。

賄縱容商之貨。兵通之耳。若於商貨普通之要口。設一將一官以守之。凡一應軍需。毋許出境。各貨任其往來。往者上稅幾何。來者上稅幾何。止令其貨之往來而不許。其人之往來可也。如是而商稅亦可以少助軍供之萬一。不然能防於此而不能防。於彼。商之貨利。徒歸於兵。而賊之地利。借通於商矣。此一弊也。天下之財。取於商。以資國用者。莫如關與鹽。關鹽利甲天下也。乃近日之關。商賈既少於往時。鈔稅自減於常例。加之隨征員役。設得一批一牌。討關而過。不知其何官何職。不知其是滿是漢。不知其已用未用。不知其公行私行。交通奸棍。包攬民船。搶載客貨。不惟分毫關稅不納。如斯情弊。殊非朝廷設關差官之體。通商裕國之道也。此一弊也。至於鹽務之弊。種類甚繁。大約收使用公夾帶加重硃。其大端也。然當此軍需緊急之秋。我

皇上准鹽臣之議。行改折之法。因地銷引。愛商之心至矣。乃上有改折之名。下無改折之實。收使用公夾帶加重硃。更甚於往時。嗟乎。此等情弊。昔日朝廷之上言臣已陳之。小商亦叩閭以告之。但未毅然革去其弊耳。倘果能清查其弊。足可以上佐國家一年之兵餉。如以為弊久難除也。

朝廷未始不可以分商之利。即以楚地而論。如湖南等處。為賊割據。鹽引難銷。改折

之允宜矣。而湖北地方大兵雲集。不知多幾千萬人。軍前食鹽。猶下仰給於商家。何也。昔有餉鹽之例。今何不做而行之乎。此一弊也。贓賄者。法外之仁。抑不得已之意。而入之於官耳。乃為民上者。逢人爭訟。視為奇貨。可居先得。長夫之例。而後因情問理。以曲為直。以是為非。援引新律。擬成罪贖。嗟乎。以國家之律令。問自己之囊橐。一分報部。數分入私。欺隱尚不知幾許也。其餘又皆紙上之虛名已矣。此一弊也。採買軍需。至緊急之務也。奚為乎商賈之業。竟以採買名之。而採買為之耶。營一採買之批。而為細利之符。本省之所產。而需之外省者。採買者需之耳。民不得而需之也。外省之所有。而利本省之所無者。採買者利之耳。民不得而利之也。大而鹽穀小。而雞豚。何莫非為採買者之所壟斷。而舟子腳夫。行頭小民。無一不受其害。嗟乎。人第知採買者之害民已耳。不知害民即以害國矣。此一弊也。他如錢法宜講也。銀七錢三之令。何以不頒之於軍伍之中。屯田宜舉也。足食強兵之策。何以不行之於久守之地。有此八弊。無怪乎其有理財之名。而無理財之實矣。進兵之有名無實也。如此安民之有名無實也。如此理財之有名無實也。如此如此。而欲其兵之不疲。民之不窮。財之不竭。也能耶。否耶。但願諸執事大臣。以實心而行實政。革其習久之弊。而宥其已往之愆。舉其當興之利。而勉其將來之圖。庶弊去而利自生。馬行見禁軍要。

而兵馬壯驗器械而武備修擇招募恤窮兵而軍伍皆富強之卒造沙船練戰艦而水營皆精銳之師明賞罰以示懲勸之道廣求將以招豪傑之人以守責令而人人可為兵以功敘爵而人人皆自奮而國威於是乎振矣賦役平而窮民沾恩刑罰當而冤民戴德毋擾失盜之家而盜可弭毋縱為盜之兵而盜可緝毋許假隨征之名而擾民之風自消毋許收逃逆之僕而叛主之奸自泯而國本於是乎立矣神明乎一定之例而援納少僥倖之望盡一其通商之途而奸宄無託跡之虞救司關禁私載而稅利歸於公除積弊行餉鹽而鹽利歸於上清贖罪以申律例之法禁採買以便貿易之民通錢法以佐軍需借屯田以為戰守而國用於是不充矣以之削平叛亂恢復舊基成康文景之盛豈足專美於其前哉旦竊更有進焉國而忘家公而忘私君國之事全而身亦未必不全見利苟得見害苟免君國之事危而身亦未必不危任事者其加意乎至於攻取之宜必內察國家之勢外料敵寇之謀神明乎遞速緩急之機而不僅在區區以力勝者耳旦在楚當止言楚然言楚必合言天下天下之安危視乎陝西之治亂向不幸誤陷術中為奸所賣今大半為賊割踞矣然乘此人心未附之時全力急擊之不可緩也廣東雖有忠

君報國之親臣可為中流之砥柱但四面為賊環困孤軍自守且不暇焉能分力攻

人加兵速助之不可遲也。荊州雖係益州門戶。宜以攻為守。而不可急於攻。岳州雖是湖南咽喉。宜以守為攻。而不可緩於守。遲速緩急之機。當如是也。福建之眾。假威抗命。援引海寇。以為羽翼。但地僻人微。糧不足餉。兵窮民怨。勢難久撐。殄滅亦易易也。江西一帶。因激潰亂。大兵掃蕩。玉石莫分。火其室家。遷其輜重。擄其妻子。窮人無歸勢。不得不倚草附木。嘯聚偷生。近聞城郭之外。偏地綠林。依山作窟。兵至則四散奔竄。追覓無蹤。兵撤則勾黨復聚。公行劫掠。旋撲旋起。旋散旋聚。旦恐明季流賊之患。殆基於此。且是役也。不惟結怨於江西。兼令遠邇聞風。阻其向化。為今之計。速悔已往。曲誓將來。予以可信。示以無疑。內格其心。外安其身。勸撫並行。而後可以轉移其黨。不然。江西雖治。而必貽福建之民。死為耿守。廣西之民。死為孫守。雲貴之民。死為吳守。各霸一方。我師四面夾攻。水陸並進。而渠魁恐難授首矣。若夫或因時或因地或宜攻或宜守。或用伐交之策。或用反間之謀。或行誅心之計。或行解體之策。又各有遲速緩急之不同。要在為將隨機應變。而非筆墨間所能顯陳者也。如果旦言不謬。伏乞鑒其近於迂。宥其過於激。擇呈當事。以備採用。

開建水巖洞碑

王立憲

少保大司馬西林郡公奉命來制斯土也。視三省如其家。雖邊方異域。事苟有濟於民。不為不已。為之不底于成。以不朽于後世不已。矧其託諸宇下者。臨安古响町國也。崇山大澤宅其中。長江巨河環其外。每夏秋溪漲。四望如海。故以建水名。水大而能利民。亦能害民者。莫甚于瀘江。其發源也。則始於石屏之異龍湖。合塌冲象冲暨六河九涵諸水。皆會于瀘。以奔赴巖洞。巖洞者。所稱石巖山之水雲門也。瀘水從眾流來。合東至于巖洞。伏流十餘里。出阿迷。入盤江。以為歸宿。此其性也。而石磴嶙峋縱橫。巖洞口細流。則峽道曲入。洪濤則湍波四潰。復多石埂。截中流。十有三重。唯伐石鑿埂。使無壅遏。順流而下。則水利興。水患息矣。自少保公至。召我郡縣告之曰。瀘水之患。溢臨境。巖洞之障。厥宜屏刊。乃石斷。乃埂民害除。農力省。功惟速。志惟猛。我憂以紓。而汝是微。屬吏聞命者。咸唯而退。故老相傳。洞口有神物憑之。動一拳石。輒大風驟起。煙霧迷離。咫尺不相見。所擊砂礫。飛數十步外。能中傷人。以故久不鑿。雍正八年正月十七日。郡守東萊張公無咎。與總鎮張公應宗。州牧祝公宏。奉少保公疏。河命甫至。令伐巨石。雖不能入。強入之。未寸許。而風起。石飛。擊工人手。落一指。眾驚。數諸君子相顧錯愕。聞于少保公。公曰。神庇吾民者也。吾惠吾民。而神不許。謂

神何唯子之誠不足以感神故神弗靈吾其祭以文通以誠神必許我太守乃瘞文以祭祭畢天大晴霽于是督工鑿石而向之剛者柔堅者脆觸手而動經旬拔十三重壩自此水湧沙流無復礙下流疏則上流得肆其力于是湖眾水所經按一江所入凡河之淺者深之滯者通之岸之低者崇之薄者厚之易浮沙以茅塊運淤渾於園苑又復伐木為檣編竹為簾為兩岸障像如壁平如削堅如石滑如漆風雨不能摧波濤不能入功成之日計程不二百里地不三萬丈簾數千檣數萬工數億官勤勞役奔走無懈心下無惰志有水利無水患雖積雨經旬而沿流循渚隄以永固永以永豐歲書大有矣于是郡人士相慶曰此少保公生我也請書以勅石貽我孫使後之飲若水服若疇者咸識公惠焉爰為之記又歌曰雲門鑿壑水瀆龍湖來阿迷進遠盤涇往而逝水安流敷豐潤恬河伯熙田畯困倉盈鱗介物億萬歡百神順官升康吏治振古禹稷翼堯舜理水土欽且慎今其誰維公僅

擬重修東林書院碑記

謝方琦

泛五湖溯三江而西。梁溪錫山綿麓萃岿。故多奇偉特立之士。豈山川秀傑瑞氣所鍾歟。抑亦鄉先生教澤之遺。而縉紳耆老之所漸濡而沐浴也。訪其舊蹟。故有東林書院。為宋楊龜山先生讀書處。書院之復。則自前明邵高顧諸先生始。方其盛時。歲聚講學於其中。大江南北之士。聞風而興起。實繁有人。迨嘉宗末。奄禍蔓延。而書院亦廢。久之。僅復數楹。學士大夫。東西行而過者。欲求當年皐比巍然禮樂雍容之盛。而斷碑橫草。古砌封苔矣。

今天子崇文治。敦教化。詔州郡葺學舍。凡嶽麓白鹿先儒講幄。咸煥然更新。獨錫之東林。傾圮如故。豈不朽盛事。固有所待耶。大中丞宋公撫吳之明年。叱馭登錫山。過東林故址。輒俯仰太息。傍徨不能去。夫玉華蒼鼠。壞道哀湍。瑣瑣無關。至治懷古者。猶馮弔而流連。矧龜山高顧諸先生。風流未墜。所為紹往詰振頽靡。立懦廉頑。胥于是乎在。實以輔黨庠序。所不逮。詎等諸遊觀之所。無當緩急而置之。用是飭屬員。鳩工庀材。以慎以勤。凡五越月而竣事。森如翼如。燦如輝如。名公鉅卿。將倣先賢之遺業。模範當世諸生。以時肄業於其堂。行見風教四訥。奇偉特立之士。肩相隨趾相踵。而開府作人之澤。且將與三江五湖同潤千古也。爰簪筆而為之記。



春秋四大國論上

姜宸英

春秋之大國四。內則齊晉。外則秦楚。齊晉至春秋之末。俱相繼亡。而秦楚延世。又數百年。及楚亡。而秦卒得天下。其故何歟。語有之。木再實者。其根必傷。則齊晉之謂也。齊自太公表東海以來。其勢固日趨於強矣。及於桓公之霸。臺率同盟。南征北伐。兵車之會三。而乘車之會六。一匡天下。九合諸侯。天子致胙。命無下拜。蠻夷君長冠帶之國。無不東面而朝於齊。其自謂與三代受命之君。無以異。可謂盛哉。桓公死。晉文繼霸。子孫之主盟中夏者累世。諸侯以國之大小。歲受貢賦。庭實充溢於公府。貨賄交賂於私室。天王召會。而即至。侯伯見執。而罪已。是時天下靡然不復知有天子矣。夫始之有霸。以尊天子也。至其後。乃奪天子之勢。而自予焉。而天下不敢以為事。然人臣而擅天子之勢。此豈可以為常者哉。齊桓公沒。歷世不振。至康公而國篡於田氏。晉用六卿。亦移其祚。非齊晉之國。至是而始亡也。其始之脇制諸侯。討貳舍服。所以耀吾軍實。以奔走讐伏乎天下。而恣睢以享天下之奉者。其力固疲而氣固已竭矣。一旦大權既去。蹶然顛仆。何足怪哉。若夫秦楚。則不然。春秋莊九年。書荆敗蔡師。楚僻在夷。至此始通中國。二十年伐鄭。始稱楚。僖十九年。始得與諸侯同盟於齊。方其未與中國接也。楚特岷殭於江漢之間。耳。王室之所不臣。擯之。而中國之諸侯。非

類畜之者也。及其得志，爭盟中夏，征車四出，則楚之禍西連於晉，南結於吳。平昭之間，羣臣奔命不暇，而國之幾亡者再矣。然其所以宜亡而不亡者何也？吳滅於前，而晉分於後也。自三晉之分，力不足以支秦楚，則楚之危者以安，而秦之弱者以強。故晉之存亡，此秦楚安危強弱之繫，而春秋之一大變革也。由是觀之，楚之延世之久，長者以其為中國後起也；楚雖後起，而猶幾不免於亡者，以其威太盛也。故盛者必衰，強者必折，自然之理也。秦國尤僻小，雜於西戎，穆康之世，與晉構釁，見於春秋。至于他國所用兵者，鮮矣。傳稱穆公并國十二，開地千里，其所攻取，大抵皆在戎翟之界。方是時，泗上之諸侯奉盤敦，歃血而爭長者，慨然於壇坫之上，喜而朝，怒而叛者，紛紜於晉楚之境。其視秦若不甚可畏也。秦亦漠然無所與，擁峭函之固，迴翔熟視，而不敢以爭一日之雄。左氏曰：秦穆之不得為盟主，宜也。不知盟主非秦之所欲也。秦唯不自為盟主，故能蓄積其氣勢，徐以待諸侯之衰，而乘其弊，厯於孝公之初，辟土益廣，然河山以東，強國六，猶以夷翟遇之，擯而不得與盟會，則夫秦之所以終強而六國之所以或微或滅者，其必以此矣。或曰：吳越之興，亦後矣，而驟滅何也？曰：吳越之君，純用夷禮，而無法度紀綱以維之。此如水潦之暴漲，何足與持久哉？秦不妄慕乎中國之盛，甯自棄於僻陋，以俟時而後用之。故齊晉與六國亡，而秦不亡。秦又不

純以夷翟自處而法度紀綱秩然有以維繫其上下。故雖其後起之強大如吳越燕  
皆以驟盛而滅而秦不與之俱滅。且此非獨於秦楚然也。詩曰。縣縣瓜分。昔周之中  
世嘗微矣。不窟失官。竄於戎翟之間。歷夏商千餘年。天下幾不知有周矣。公劉遷豳  
稍稍生聚。與其人執豕于牢。舉輶尊而酌之。此其自視與天下何如者。然太王一出  
岐山之陽。伐柞櫟。走昆夷。勃然起剪商之志。不數傳而得天下。是何始之微而終之  
盛耶。不知使夏商之世而周即能強大如桓文時。則其後且覆亡之不暇。何暇以天  
下為哉。故曰。其微也。斯其所以為盛者也。然武王既得天下。散馬放牛。繫弓矢。包干  
戈。以示弗用。使天下若仍不知有周者。而後民安之。而始皇日驚駑馬。出師強胡。加  
誅勦。越窮兵黷武。以外市其強大之形。強大之勢震於外。而危亡之機成於內矣。則  
亦異乎其始之所以立國者矣。

### 春秋四大國論下

齊晉秦楚歷世之修短。吾既已言其故矣。然此猶論其大勢也。非其所以受病之處。  
夫人之稟命於天。壽夭不同。然其將死也。必有其所以受病之處。知其病而消弭之。於  
早。則病者可起。死者可生。不知其病而預為消弭之。則亦已矣。晉之六卿。齊之田氏。此  
其受病之處也。國之有強臣。如身之有痼疾。齊晉之君。不知消弭而聽其塊然於胸。

隔之間方其未發手持足行耳目便利視之猶人也及其既發而塊然者已不可復圖矣秦楚之君之治其病也唯不待其既發而圖之故其治患也不勞及其患去而國之元氣亦以愈固蓋權臣之竊其國也類非一世之所能為也其積之有漸故其治之有因且其初非必皆國之小人也彼陳敬仲趙文子之徒豈逆知其子孫之有是事哉勢之所趨極重而不反則雖有賢明之君忠正之臣常不能保其後之不為亂夫秦楚之君之善治其病也亦揣其勢之所必趨而逆折之無使之至於不可反斯已矣楚之有令尹也比大權之所萃也令尹之佐有大司馬左右司馬政出於令尹而兵柄則分掌之司馬子木為相為掩為司馬使具賦數甲兵既成以授之子木故曰司馬者令尹之偏王之四體也昔者子元闢椒俱嘗為難於國中矣發不旋踵身被禽滅其時之家臣宗老不聞有擁甲以觀變者兵柄不屬故也令尹之權既分而其制國也尤有法分國為縣縣設公以處之內有變則入而靖亂於內而強臣不得縱恣以為內之大患子元伐鄭還處公宮而申公闢般殺之白公稱兵而葉公諸梁自蔡入而討之是也外有患則即發其縣之賦以征討于境外救郟之役申公子儀息公子邊以申息之師戍商密繞角之役公子申公子成以申息之師救蔡陰地之役司馬販起豐析之眾以臨上雒是也齊晉大夫之有采地以封殖其私家故曲沃

據而襲盈叛邯鄲入而荀寅叛晉陽修而趙鞅叛狼邱封而雍廩叛而楚則不惟使之不可叛而反能因其力以外備諸侯而內制其強臣齊晉之衰以家之有藏甲而楚以令尹之權欲舉國而唯吾用之而且有所牽制而不可動其制使然也楚令尹之權既分其制國也有法而其因事杜害也尤有漸昔者子南為宰其士觀起無祿而有馬數十乘康王聞之車裂觀起尸子南于朝遽子馮繼之所寵者有馬八乘聞申叔豫之言謂之生死而肉骨夫宰臣之寵士而使之有馬自常情視之非甚大罪也然楚之君臣涕泣相告若危亡之立至而誅殛隨之則其慮患也不亦密乎秦公子鍼出奔于晉有車八百乘謂晉大夫曰若能少此吾何以得見乃知秦與楚同一意也公子鍼親景公弟終景公之身不敢以反國則人臣而富者是秦楚之所深仇也其後秦昭王一聞遊士之言逐穰侯華陽君之屬而出之境若去毒螫夫秦之日夜思芟鋤強臣而欲已其病者如此其至也故封建之不得不廢亦其勢然也秦之祖宗固欲廢之矣且此豈獨秦之意使秦不得天下六國之君得之吾知封建亦必廢何者強臣者在一國則一國病而在天下則天下病也自漢以還封建廢而天下未嘗不治秦廢封建而以無道行之焉此其所以得而復失之也

吳虞升詩序

吳門吳子訓自弱冠從其舅氏京師。其為詩雄麗排宕。與作者上下所至。名公宿儒多樂與之游。相唱酬。若兄弟然。然其意默然。殊不自得也。予聞之。其先曾祖都諫諱之佳者。當萬厯朝儲位未定。有旨冊封上所受鄭氏為皇貴妃。時宸英曾祖奉常公給事戶垣。首抗疏力爭不可。且請早立東宮。上震怒。謫雲中尉。從此淪落三十餘年。而都諫同時亦相繼與張公棟葉公先春論儲事。削籍歸伍。世所稱東吳三諫者是也。然先奉常至光宗時。被召內遷。雖不久復廢。而都諫竟以黜死。惜哉。自國本議起。朝論各有向背。門戶之見紛然。於是閹豎寇氛伺隙萌。弟相為煽張。迹其終始。雖罪有攸歸。而一時匪躬諸臣亦未免過為張皇。以激成清流之禍。況其間依聲附和千百為輩。此與異時諸公建白之意何如。卒至矢沒寢陵。薦及京闕。而光廟隆準之子孫與向所謂愛子如意之子亦且與盈廷水火漂灑俱盡。迄今鮮或存者。悲夫。獨先奉常以垂老復起為璫黨薛鳳翔所擠。亟奉身退。而都諫亦以早歿得脫於鈞黨。至今喪亂之餘。兩家子弟猶幸不失其世守。風鐙雨館。感輦相對。追數數十年來君子小人互為消長之故。與其所以勝敗日累月積禍所從來。宜其皆可拊膺扼腕太息而見之於詩。不獨誌游覽之壯觀為一時之唱酬已也。夫稱先民述祖德以相贈答者。詩人之志也。昔子美贈閭邱僧詩。盛稱其祖番言與閭邱之祖均。同年蒙主恩為

榮然審言倖進女后之朝。諂事張昌宗。易之兄弟。以罪死。宜也。即均亦無足稱。若今以吳子之才。發而為詩。使其屢為之不止。何患遽不如甫。子雖瞠乎後哉。然其家世亦足以誇於子美矣。吾與吳子勉之而已。

### 陳其年湖海樓詩序

詩雖所以吟咏性情。然亦可以考其人之里居。氏族。與其平生遭際之盛衰。君臣交遊之離合。而人之一身。有先榮後辱。有始困終遇。若此其不同也。則其性情之所見。亦各異焉。余歷觀前世詩人。自建安王劉輩。遭漢季失馭。羈旅。歷落。有憂生之感。下逮六朝分裂之餘。衣冠失職。往往播遷。為羈囚。唐自乾元。光化以後。則一時文士。抱其卷牘。以外依方鎮於幕下者。所至皆是。其間強弱吞并。出彼入此。曾不容瞬。士生其間。譬如墜秋風之籬於狂波萬折之中。轉展洄狀。及於淪胥。而不可止。此其可悲者也。自余之讀陳子其年之詩。識其所遇。以想見其為人。而及今之邂逅於廣陵也。已十五六年矣。其年生長江南。無事之日。方其少時。視家世鼎盛。鮮美。怒馬出與五陵豪貴相馳逐。狂呼將軍之筵上。醉卧胡姬之酒肆。其意氣之盛。可謂無前。故其詩亦雄麗宕逸。可喜。稱其神明。及長。遇四方多故。夾江南北。殘烽敗羽。驚心動魄之變。日接於耳目。迴視向時笙歌促席之地。或不免踐為荊棘。以棲冷風。故其詩亦一變。

而激昂歔歔有所愴然以思愴然以悲以時入於少陵沈鬱之調而不自知亦其遭時之變以然也其年起謂余曰余所哀次自十七八歲始更今幾三十餘年始得詩凡若干首然則其年之性情見乎此矣既而反思前代之人其遭時不幸至於顛隤失所及天下始平干戈不用而文士出而斯人者已窮困以老或死不及見矣豈非其命歟然陳子則年始強仕足以身遇太平遂其懷抱夫志和者其音樂也於是又將變其激昂歔歔者比於朱絃疏越以奏清廟而備鬼神而出於前代詩人之所不及見則陳子之於詩殆將終身焉已

志堅堂集序

余嘗欲條疏古今賢臣建言者分而為三彙成一書三者一曰宰相一曰侍從其一則諫官也蓋古者諫無專官所最重者宰相有輔導之義侍從有啟沃之任其責任與諫官等耳獨怪今之言事者專以其責屬之臺省於輔弼講讀之臣未有所與焉而為輔弼為講讀者亦遂寬然自弛以為非我之所有事使諫官之能盡其職天下之事有諫官之所不能盡言者矣而況於今之官名為諫者其能盡其言責者十不得一二而能盡其言者其言之又有行不行行者嘗少而不行者嘗多也然則如之何而不以責諸宰相與侍從者也順治間有詔命辭臣修玉匣訖元帝化書時則



檢討淄川濟武唐先生上言以為不宜崇此非聖之書妄費紙筆為

聖學玷又爭御史張煊給事中陰潤事忤旨歸里本朝之能以翰林共諫職者  
自檢討始從此考繁般水之陽發憤著書垂三十年以今年七月訪友四明索其文  
數卷以示余余讀其經世之言所為籌餉積穀銅鈔改漕諸法其計謀碩實可與賈  
長沙陸宣公相上下惜其雖能言不得試之實用且身之用不用命也并不得自見  
其言於朝以待有力者之上而舉行之焉良可悲矣則夫以檢討之文為窮而始足  
自列於後世者豈通論哉檢討當放廢之餘愀然以天下生民之事為己憂顧其中  
若有所不暇者而當任其憂者反營營終日亦若有所不暇於天下生民之計備是  
以往斯民之患將安息乎此余之所以不禁三太息於斯文也

### 十二硯齋記

余至京師交汪舍人蛟門聞有所謂十二硯齋者輒欲一至其處舍人曰無有也硯  
者吾夢也而齋者吾所假於大司馬梁公之館以挈吾妻子與奴婢所朝夕而處者  
也自吾之來京師攜一硯粗理而不受墨其旁緣缺然吾挾資以僦人之居則朝至  
而夕徙然而硯者吾之所癖好也嘗夢得之其數十二故以名吾齋即以寄吾生平  
之趣而已余曰善哉子之所託也今天法法而生者其所需於物者實有涯耶膏澤

取於天。貨財取於地。日用玩好耳目之養。取於山川雲物鳥獸蟲魚草木之繁夥。若是者。何一非假之於物者哉。及其事去時移。則向之所需。泯然無一存焉已。夫且與物而俱化。而愚者妄信之。以為實。然且執之。以為己有。庸詎非大惑歟。夫日中而行。索夢乎途之人。指逆旅而號之曰。吾廬也。則人必溺然疑之。而不知吾生之孰非夢。而吾所居之孰非逆旅也。不亦悲夫。若知凡物之本非吾有。吾皆得資之以為吾用。此其為樂。豈不大哉。其處也。仰而採於山。俯而汲於泉。煙雲足以資吾之懷抱。琴書足以供吾之嘯傲。其達也。宮室帷帳。以為安。黼黻旗游。以為飾。鐘鼓篳絃八音之備。以為樂。肥甘以為吾之飲食。而與臺以為吾之使令。彼其初皆非有與於我也。而吾皆得而有之。其得之。以為固然。取之。不知其為誰予。終身享之。而不可以厭。是尚不知吾身之為吾有也。而況凡物之自外至者乎。故曰。身者天地之委形也。知身為吾之所本。無與物之原。未嘗為吾有。以無有遇無有。則泯然而若歸。充然而不居。若是者。以語于道。則幾矣。然則舍人疇昔之夜。殆非夢也。予之硯固在。而予之齋固不待假而有也。予以舍人為知道。

狄梁公廟記

甚矣。賢者之流澤遠也。八月予道東鄉。歸避雨古廟廡下。仰見題額塵埃中。曰唐丞

相狄梁公祠按唐書梁公嘗以冬官侍郎持節江南巡撫使而唐貞觀制分天下為十道明州屬江南道為公使事之所及其私被德而尸祝之于其鄉理或然也予既揖而降謂其里人曰若知茲祠所繇建乎神何為者曰不知也相傳其為宰相時挈女后之天下而致之唐豈古之忠臣耶予曰然則其廟食于茲也其亦有靈否予曰是惡得無靈往年有不敬于其父者見有神若殛之不旋踵已有不義而謀人之貨及其身者神殛之亦不旋踵其為善者則否吾春秋薦享無後時者是惡得無靈予聞之憮然按公生平一為甯州郡人立碑以頌德活死罪二千人相率哭碑下三日乃去再為奸臣誣貶彭澤令邑人復置生祠奉之遷魏州魏人亦德之為立祠其所至得民如此當其使江南時毀淫廟以千數僅存者四詎意其身更一千餘年後瀕海遐僻之鄉村落之聚復有所謂狄公者而俎豆之如數邦且為之賞善懲惡降威福于其地哉亦可異矣里人曰是祠幾毀行謀葺之子盍為之記予乃指謂其人曰夫公太原人也其服官足跡疑未必親至于此然汝祖父以來皆祀之無異辭者何哉以其忠于君而澤于民也夫忠于君而澤于民雖非其地之生與未嘗親至其處而民爭廟祀之不衰其為臣則反覆不忠其為民上則貪且暴則雖其生長之地與其身親恩之處民愈加疾怨害之唾棄之焉是不可為人臣者之明鑒乎非獨

此也汝鄉有善人焉。即使而之他所。鄉之人必曰。某固某生也。其他所人亦必曰。某地某之所經。思與其葬處也。夫孰不愛而欲引之近乎。即其違道悖德。為不善于鄉以沒者。不獨其鄉之人疾之。雖其子孫亦以為恥。問其姓氏。則諱若不聞。指其室廬墳墓。則變色疾趨而過也。夫孰不惡而欲推之遠乎。彼與公為難者。來後臣霍獻可之徒。今皆安在。居其土者。奚待其善惡之善禍福之及。是尚不可入廟而知警也哉。里人曰。善。遂記其辭于石。

劉孝子葬親記

初順治乙酉五月。王師破建昌城。明益王遁去。長史劉君某。率家亡匿山中。卒其伯子龍光。即孝子也。為諸生。先赴試歸。吳未得父耗。憂泣成疾。戊子歲始決策至盱江。時亂後。藩府殷廢。舊人無在者。邑有張令公祠。宿禱焉。夢中恍惚如聞神語曰。寄居石滌者。醒求其地。不得。傍徨道左。遇一尼。謂曰。石滌在閩廣交。今方阻兵道塞。有徑潛行。七日可達也。遂如其言。取道往。所過藤峽通仙一縷天。皆山谷窮絕處。蒲伏晝夜行數百里。不見人煙。最後至白石嶺。嶺陡切霄漢。阪道隱者纔六七寸。俯臨不測之谿。捫壁絕險。既上復下。履巉巖。衝虎豹。攢棘被膚。血流殷足。每仰天一號。則陰風颯然。山水悲嘯。瀕於阽危者數矣。嶺盡得村。尋得父所依姚氏居。母管孺人在焉。既入

門母子相持而泣已間知父喪行一年所則號絕仆地久之始甦居數月間闢與觀復踰嶺侍母而歸歸十年母卒當母寢疾孝子侍湯液不解衣帶四閱月也初長史避難數遷獨攜先世系圖冊一篋自隨至歲戊子母時聞有聲窸窣出篋中啟鋪無有閉則復然一日母見緋衣人數輩冉冉從篋中出益大驚逾宿而孝子至矣其所居村見娘堡舊傳宋王龍山者於此見母得名異矣哉鬼神幽明之故君子之所慎言也而父子骨肉之間顛沛流離之際徵應巧合又往往若有陰相之者非苟然而已也其子某因婦翁金進士報似屬余傳之余嘗慨自明季中原兵起延蔓四五十餘年其間父子分散各所夫婦生死異路抱忠孝節烈名填溝壑者何限其幸不相隨以沒而間著於通臣逸士之手者又多避忌諱不出或文辭蕪漫不足以傳而表孝子之墓者有韓閭學之辭在特工又綴以余之文則所以不泯君於後世者庶在乎此也孝子字夢蕭蘇之長洲人

戶部給事中黃湄王公墓表

戶科掌印給事中黃湄王君以今年三月日卒官于京師其孤幼也越月而其仲弟明經又繼自關中奔喪將以其孤奉柩還葬于邵陽之某原而哀不自勝過余請曰吾兄行治吾已謁竹垞檢討銘諸其幽矣吾懼無以表諸道謹伐石為碣待子之辭余

曰可哉。給事之于余厚也。是惡得無言。君諱又曰字幼華。黃涇其別號。世為西安郿陽人。順治十三年。以經魁其鄉。明年戊戌。舉禮部。己亥。殿試成進士。需次選人。而南遊吳越間。與余邂逅廣陵。是時君年甚少。見其精研詩律。分判節度。辨入毫芒。謂再遲君學力。當于古人中擅長不難耳。已相別十年。許聞其為令晉江。有治績。如古循吏。又數年。聞其入為給事中。論事大廷。不激不阿。惟事之宜。如古所稱名諫臣。以是悔吾向之以詩期君者。尚未足以盡君之能事。而君之好詩也。亦愈甚。益工。自京師士大夫上舍名宿。遠方遊士。以詩請業者。君與之辨疑送難。獻酬竟日。無倦容。經其指授。皆有家法。雖

天子亦聞之。時對侍官稱其才。僉以君當得大用。使其聲施烜然。然不幸以死。故聚而哭君者。愚時有餘哀。是亦不足以見君之賢矣乎。君初筮仕。當得推官。後例改為縣。始至潛江。親履畝。定賦。杜豪強侵占。葺長隄。柱漢水決。噉建傳經書院。築說詩臺。興起蓬掖。以禮讓。值寅卯方事之殷。縣居孔道。征調遽午。君糗糧芻艾無所缺。臺司倚毗。民忘其勞。既為言官。復疏湖北隄工。協濟之害。令荊郢分界治隄。絕委卸而專責成。得旨報可。已改戶科掌印典試。粵東還過南海花山。建議于其地設縣治。奪盜淵藪。旨又報可。君之盡心于所職。雖去不忘其民。雖其暫時經思之地。猶欲為

國家計久遠如是。然君當試事之竣也。邀屈山人大均。登羅浮極頂。訪白鶴峯址。蘇子瞻故居。還泊彭蠡。躡匡廬。眺望五老峯下。久之乃去。皆有詩數十首紀其事。其意方自快極耳。目所未經有。飄然遺蜺塵埃之想。而視世之一切建功立名者。若不足為君又自言。吾所居芝川舊廬中。條當其前。龍門太史公祠踞其左。山水奇勝。晝日讀書其下。及為縣。案牘倥偬。中畢不廢。以此記誦日益夥。而恒苦于無所自得。夫詩小道耳。不足事。吾行謀告歸。先人之敝廬。益陳書而觀之。以求古聖賢者之用心。而致力焉。庶幾求其自得于己者也。其未寢疾前一月。猶秉燭為余言如此。今君既不幸以死。則夫世之所交口稱君者。舉非君之志。而君之志之所欲為。一旦奄棄。子不及為者。又孰傳而孰信之哉。此余之所以尤悲。徒致數千天者之無可如何而已矣。君儀觀豐碩。胸中廓然。無滯吝。與人交。披露軒豁。既貴二十餘年。兄弟尚未析爨。明經君每言及。必涕雨下。則其生平友愛可知也。父圖南。誥封文林郎。母康氏。封孺人。娶范氏。繼張氏。封孺人。子鵠側室崔氏。出。君前年自嶺南歸。喪其七歲子。憊以此積傷致損。而鵠今纔五歲。君沒年亦止五十有一。則造物者之于君。誠有不可得而知者矣。

山陰仲淵何公合葬墓誌銘

甲寅歲余與山陰何嘉延同客揚州郡署每言其先府君御史公事輒嗚咽涕淚不止而是時去府君之死已二十餘年矣今年復會於金陵得見故人魏冰叔所為公傳畧而嘉延亦自以所撰行狀遺余拜求之銘當丙戌五月江上師濬公棄官至剡之白峯自恨不及從亡則作詩投崖而絕久之復甦為土人守之不得死隨逃入萬山中披薙從方外遊晝夜作苦猶自謂去人境不遠復瓢笠往來縉雲義烏諸山與樵翁衲子侶行歌獨哭顛顛枯槁終至于一死而後已推公之心蓋無一日不以生之可悲而得其死之足樂也然公初嘗有意于用世矣其釋褐始令建平也邑故無城郭前令興築之未就公曰是東南門戶也不可以無完功城之決月而功罷民不知役歲久旱大江以南飛蝗食禾殆盡獨無入建平界者未幾以憂去蝗遽入北鄉於是民益以為神補任高要端溪受黔桂諸流夏潦屢為災即躬巡隄圩增卑倍薄而蓄洩以時遠近反受其灌漑清權關之假手吏胥得上下其手者掣視有定期商無滯賄官有裕課蓋公之所欲見於政事者方銳未已此特其一二不幸又丁父艱歸隨遺亂未得盡試浙東事起強以御史召不得已就職建白數萬言或行或不行而事勢已不可支矣墮白峯不死後入陶介山事山主雲藏禪師鋪捕不繼隨眾樵汲同事者皆為公難之公曰吾視出沒風濤間瞬息生死者何如而敢自言勞苦



哉自此遊益遠入山益深崎嶇崖壑鹽醢并絕所過皆留詩紀歲月遇高僧郭蓮峯  
徵君李秘霞喜之結塵外之交館留崇聖寺黎牀風雨三人者相對嘿語終日人不  
測其所以居數月而病作先是己丑四月公謂李徵君曰居此久幸少安顧此中常  
有戚戚者行別子飛錫白雲之鄉耳今留一緘與家人進其來則示之至是病困令  
出所緘書讀之曰吾如荼磨殿齋志至此忝厥所生毀傷莫贖於君為不忠於親為  
不孝死後切勿棺殮我當暴野三日以彰我不忠之罪三日後火化入塔不得祔葬  
先隴以彰我不孝之罪讀竟而絕然其家仍以殯歸葬於會稽上窆之玉几山者以  
公本非出世者從公之初志也公娶商氏大理卿為正子中書維源次女有婦德所  
刻苦佐公吏以成其廉隱以就其節者夫人之力居多後公十三年卒公諱宏仁字  
仲淵初中萬厯乙卯科副榜天啟改元覃恩以貢士試吏部得州守不就中庚午北  
京鄉試丁丑成進士六世祖詔南京工部尚書高祖鏞曾祖昶皆贈長蘆運使祖繼  
高江西參政父光道贈御史而母贈孺人陶氏禮部侍郎文簡公望齡之妙也公性  
至孝未遇時事親能先意承志所求無不獲人不知其貧然知其能貴而盡節於所  
事也少不為俗學所師友皆賢者既習聞外家教後劉公宗周講學里中復執經其  
門癸未進士余公增遠者字若水志節士亂後躬耕山中自匿迹不與人接公之歸

葬玉几山也。公子拜求其題主。余公即許諾。至期以舟迎之。來不起。頃之自棹一小艇徑詣墓側。取舊衣冠拜墓上。事訖下山。賓主不交一辭。主人使客追之。固留之。飲食則舟中已皮粥一盂。羹菜一豆。取吸畢。急挈舟延緣去。會葬者百餘人。皆目送歎息。謂非公之賢。余公且不易得致也。予三人嘉迪嘉建嘉延俱守先志。不求仕。今存者嘉延最賢。有文行。與余善。女三人。長陳次略次魯。其適也。孫五人。思永愈永惠永。嘉迪出恕永。出繼嘉建。亦嘉迪出。懋永。嘉延出。曾孫三人。經鉦。經銓。經錫。銘曰。墮於崖不死。歸以息於此。嘿嘿乎誰與為徒。生棄厥家。彼縞而髡。奚別矣。終返其室。有鑒於縣。孰鬱不宣。孰謁不虔。御史之阡。

文學邵君墓誌銘

君諱儒榮。字仲木。別號懼叟。無錫人。君歿後。予嘗讀君之遺文。而歎後之學者。自科舉制興。而古文之道衰。其患莫甚於今之所謂八股者。驅天下之聰明才智。以從事於無用之章句。終身濡沒而不得出。故其間能以文章自見者。必少年早達之士。而老生宿儒。或不暇以為。即為而不能工。與不及俟其成。因以湮沒無聞於後世。如君此者。何限也。予來無錫。從君仲子紹棠。讀君文財三十餘篇。觀其所為。顧太學子方傳與陳太守墓碑。私謂漢太史公之法。不傳於今久矣。顧獨於君得之。惜當時有司無

知君才者。而君儕輩間亦未有商榷古今。以斯文相砥礪者。故君亦不能以功名自見。即所得文。旋亦散失。不自愛惜。以是益落魄。放棄其文。亦不甚名於時。以終邵氏宋康節先生後。元末有科貢士諱偉者。來居無錫。是為十世祖。明太祖定江南戶籍。無錫獨虞邵二氏得占儒籍。故其家世業儒。八傳為諸生諱某某。生贈參議諱士宏。士宏生壬戌進士山東右布政司使諱名世。即君父也。君少為貴公子。文采姻襮所交盡一時名士。以其間選伎徵歌。而觥籌交錯。投壺蹴鞠之戲。以為常。既屢及省門。不第。視天下雲擾。乃日與其徒勒習騎射。為鄉里守禦計。自是無意於科舉之業矣。連歲崎嶇。兵燹家益落。亦不復能為向時豪舉。日閉門誦經史子集。常五六終卷。其郤帙行次前後皆可舉覆。故其為文。悉有根柢。自君死後。人稍知學為古人文。字乃鮮留意於經術。而規模近似。轉相標榜。其風漸繁。漸熾。浸以成俗。君信能文章矣。然生平不自炫鬻。及歿而猶無所稱於世。而獨予竊歎賞之。以為遠過於今之作者。予之言果足重乎。其或者不足以取信。則君之厄於前而伸於後者。亦未可必也。君才略個儻。天性尤至孝。初亂起。獨走數千里。抵山東。從羣盜中扶掖方伯公歸其家。已邑中諸少年乘亂欲劫掠富人家為變。君密數其豪數人。給之粟。而以好言餌之。謀益解。邑以無事。丁酉友人以有事逮獄。君聞至京師。經營之事。得末減歸。而鬚鬢

為之盡白。諸相往來。遇緩急。傾身濟之。終以此竭其貲而不悔。亦不以矜於人。晚棲心禪寂。常布衣蔬食。日坐卧一榻。雖文字之緣。亦不復作。然君年未老。其氣力猶未憊。宜可久視。徜徉於世。一旦患左腋微痛。鍼熨不得施。五月而卒。豈其所見者遠。而其中猶有未盡平者哉。君卒於康熙乙巳某月。得年五十有二。元配唐孺人。與君同庚。先十七年卒。子五人。曰紹聞。紹棠。紹祖。二孀女五人。皆嫁士族。紹聞等以今年卜吉合葬。君於小嶺灣之新阡。君之屬纊也。家人泣問以後事。曰。吾不孝。不能為八十老父計。何暇計汝等哉。終無所言。後三年。而方伯公卒。方伯公為吏廉。歿時幾無以為殮。其父子之間。有足悲者。銘曰。

其才以窮。其命以逢。嗚呼。命兮誰司之。雖不吾以昌厥辭。我銘其幽。君當知。

國朝文匯甲集目錄

卷四十

孫寶侗

字仲愚山東博山人文定公子諸生歷六品京官不就有惇裕堂集

春秋論二

春秋論三

故明戶部尚書白陽畢公墓碑

代文定公

嚴虞惇

字賢成號興庵江蘇常熟人康熙丁丑一甲二名進士官太僕寺少卿有嚴太僕集

胡趾明禹貢錐指序

安徽巡撫高公墓誌銘

特進光祿大夫勇略將軍趙公神道碑

汪士鋐

字文升號退谷江蘇吳縣人康熙丁丑進士官中允有秋泉居士集鈔本

史蕉飲先生過江集序

送巡道楊賓實先生序

贈佟君申之序

昨非亭記

十四

十三

十二

十二

八

六

六

二

一

一

國朝文匯

卷四十

目錄

國學扶輪社印

東園記

十四

兵部尚書范公神道碑

十五

曹耀珩

字鳴城號梅菴湖南益陽人康熙戊寅拔貢官甯遠縣教諭有聽濤園古文

陳繹思和本初傳

十七

陳仙掌傳

十七

夏雲卧傳

十七

梁份

字有懷人江西南豐人有懷堂文集

送張方伯往山海關序

十九

茹公渠記

十九

鄒節婦傳

二十

康乃心

字太乙陝西郿陽人康熙己卯舉人有草野集

路東山道詩序

二十二

重修蘇子卿祠記

二十二

重修董子墓祠記

二十三

雷園記

二十四

孫將軍傳

二十五

路節婦党氏傳

二十六

李向若墓誌銘

二十六

張

遠

字超然福建侯官人康熙己卯解元有九問堂集

春秋論

二十九

破山集序

三十三

周青士詩序

三十三

余生生詩序

三十四

黃巖觀瀑記

三十五

陳處士傳

三十五

國朝文匯甲集卷四十

春秋論二

孫寶侗

左氏真得聖人之心者也。其為傳也可以經矣。蓋經者職要。觀其所書而美惡之辭明。傳者職詳。即觀其所不書而褒貶之義見矣。傳之所紀莫詳於魯宋晉鄭齊楚之六國者。其國君與其執政代立之際。薨卒之年。未嘗不詳哉。其言之也。獨楚之穆王。晉之趙盾。樂書齊之陳乞。則其卒不書。嗚呼。何用意之深且嚴也。蓋曰。此弑君之賊。而竟以天年終者。天道人事之變。不可以為訓者也。則削而去之。若不足以汙吾簡冊者。所以不正其終也。而亂臣賊子可懼矣。蓋春秋弑君三十八。而陳慆不與其賊。或見誅於國人。或見誅於異國。或見誅於所立之主。鄭之歸生。新棺廢族。晉之荀偃。惡疾目出。楚之平王。身死未幾。國破而不保其妻。亂以報亂。如影響然。左氏於此。書之惟恐其不詳。著之惟恐其不切。所以示天道之昭明。人事之感應。以禡亂臣賊子之魄。而扶倫紀於無窮也。而楚穆以下三四人者。無說焉。求其故而不得。則誠世道之深憂也。於是見絕於聖人之徒。所謂左氏得聖人之心傳。而可進於經者也。或曰。莒之僕。薛之比。何以不詳。則又微乎微者也。或曰。襄仲殺嫡立庶。晉於是乎失政焉。此變之大者。而於其卒也。聖人竟書之於經。則又何也。曰。聖人者。有天道焉。有帝王



之道焉。天之於虎狼或生之。帝王之於刑辟或宥之。而左氏者素王執法之吏也。故必求聖人所未及誅者而誅之也。抑亂賊多矣。而其無說者僅此三四人焉。則後世之為亂賊而思倖免者亦庶乎其少也哉。

春秋論三

國有與立。親與賢二者而已。親不親則本危。賢不用則政亂。此天道人情之極。而不可偏廢者也。是故一於用親者。其國可久。而勢必流於弱。一於用賢者。其勢必強。而國不免於先亡。觀於春秋之諸國可知矣。用親者。魯衛鄭宋是也。魯之大夫無非公族。卽有一孔子而不能用也。衛事不詳。大抵視魯。鄭之七穆與國終始。宋之六卿無異姓矣。之四國者皆僞國也。而鄭亡於春秋之後。猶垂百年。而宋次之。而魯又次之。唯衛為最久。然則用親之效可知矣。其政也必尚恩。而其敝也則以姑息情之所治而相睦。繫之所激而相忍。其君臣上下大抵聯絡願望才足自全。不能就功。亦不敢始禍。如人之尪羸而壽考者。唯從容以盡其天年而已。用賢者。齊晉是也。齊之同姓前有國崔。後有樂高。而桓公之所以首霸者。則管氏之力也。又自樹一陳氏而卒奪之。齊晉自獻公盡殺羣公子所用皆異姓也。韓欒疏屬僅同行路。文悼繼霸天下莫強。卽三卿亦文所自樹也。而卒奪之晉。然則用賢之效又可知矣。其政也必尚功。而

其敬也則以詐力欲專其威則去親之偏而不疑欲廣其地則滅人之國而不憚其君臣上下唯務勝人相傾以力相上以謀而其禍適反中之如人之元氣脫而暴亡者雖良醫之所憂而胥力方剛勢常足以自豪也然則兩除其蔽而獨收其利者其惟楚之為國也乎抑楚者聖人之所絕春秋之所擯也而何以許之蓋明天討者則不可不正其無王之誅而衡圖是者則又不可不權其用人之法也夫子元子玉子囊子庚子馮子木子西以及春秋以後之屈原皆親也親可用則用之觀丁父彭仲夷關戰於荊孫叔敖伯州犁然丹沈諸梁以及春秋以後之吳起皆賢也賢可用則用之賢以代親則同姓不偏親以參賢則異姓有所顧忌於是親疏相維恩義相濟無畸重之勢無偏蔽之情謀易以盡政易以舉而國勢以長振矣是楚之所以負罪過疎而竟能岷強荆蠻據天下之半而延九百之祀者豈非此道之得也哉然則立國者亦惟親賢並用而可矣

故明戶部尚書白陽畢公墓碑代文定公

往年余以侍郎佐計時王師方下楚蜀煩於征調余以職司憂之每咨議朝列間兵部尚書張公東臾曰公鄉有真戶部畢公可規隨也又何訪焉昔余嘗以曹郎事公久其端廉精力有夏忠靖郭湯陰所不及惜遺末造處橫流而曾不得比烈也非

其不幸哉。後二十年。余罷政里居。通州知州畢君際有公仲子也。以墓碑請。余以不詳公事辭。仲子曰。公得無以前代事不錄耶。恭惟我

世祖皇帝躬東大誼。褒揚忠節。以順治九年。特詔錄甲申死事諸臣。范景文倪元璐等立祠京師。贈諡有差。於以策厲臣勞。不遺異代。思至盛也。先君子忠於所事。勞於其官。視死事諸臣無後先。公何疑焉。余乃受其狀而次之。公諱自巖。號白陽。淄川人。曾祖恪。祖忠臣。皆不仕。父木。有名諸生間。皆贈光祿大夫。太子太保。戶部尚書。以公貴也。公年二十。舉於鄉。又四年。中萬歷壬辰進士。授松江府推官。陞刑部主事。丁光祿公艱。服除。補舊職。改工部。歷都水郎中。簡淮西參議。丁太夫人艱。服除。補冀甯晉副使。分守河東。引疾去官。再舉卓異。起參政。備兵臨洮。以按察使調榆林。加右布政使。內陞太僕卿。以僉都御史防海。天津轉戶部侍郎。都津餉。尋省津撫。兼領之。加右都御史。移南京。掌院。轉南戶部尚書。再引疾罷。崇禎初。起戶部尚書。加太子太保。在位五年。致仕卒。贈少保。公為推官。年最少。有能名。抗於僉人。不得與考選。僅以部郎量移。公不以介意也。既居方面。遼都薛三才疏請與俱。而晉撫留之力。公以副使引疾者。蓋難於去就也。其在臨洮榆林。皆以威信行邊郡。而卻贖銀以實倉粟。核撫賞之。濫額數千金。尤其卓卓者也。時萬歷之末。百度咸弛。廷臣以門戶相傾軋。巧宦

者皆託與後規速化公獨淡泊自如嘗曰擇官而仕非人臣所敢出也吾盡吾職而已以故歷方面者十三年不得召泰昌新政稍勤乃有太僕之命是時我

太祖龍興遼海已奄有盛京進逼西河中朝震恐以天津咽喉犄角地設海防巡撫即以委公公拜命疾行衆心以定而建牙之初部曲草創公請調浙直水兵而造戰艦部議不從再請募二萬人以成軍需五十萬又不從僅許馬價甲仗四萬兩而三部互設不即給公曲計補苴置鎮海前後奇兵四營親都試於直沽諸口而葺故墩臺以傳海上烽軍聲以振公至日水師舊伍僅二千及晉餉部則合行營兵得二萬一千人馬千匹戰艦甲仗火攻具稱是蓋受事纔歲餘而所費縣官七萬而已山東之平徐鴻儒也公簡師會討至德州而妖黨于志宏起武邑行營將董世賢還軍賊之賊平而保撫之兵始至既破鄒縣妖賊悉平而手擒鴻儒者實公行營將來燕禧也諸撫鎮皆受上賞公僅晉右都不言功也初津門之設鎮也一侍郎督餉侍郎邊去公代之居二年乃兼餉撫自公始時天兵再取廣寧邊守僅山海一綫關軍需米豆歲百二十萬草六百萬為關運而別將駐師皮島歲需二十萬為鮮運皆倚辦於公既海道期程不可常而鮮運道尤險惡米豆或載漕或招買必預集河干伺便發而運價領於戶部不時給芻草則輕浮不可以舟皆依買邊縣價重則妨國價輕

食則病民。愆期則病軍。議者齟齬不一。公獨權衡精當。每流涕上書以爭之。歲甲子。開門呼餉。島帥亦告急。公以便宜截漕粟十萬濟之。廷議莫能難也。在事四年。權宜樽節。所省累億萬。而餘銀且五萬。米豆二萬餘。其精覈如此。既位尚書司南計。有請歸楚賦疏。格於部議。再以漕折呼籲。乃得請。南中賴之。其疏略曰。國用方匱。而借南濟北。顧不至厲南可也。天啟四年。南倉臣委曲圖全。實借解南糧之始。其時倉粟尚多。石值六錢。以六錢給北軍。則不足。給南軍則有餘。故以吳越之漕折二十二萬解南京。而以江西之南糧三十七萬改北運。今南庾僅支一年。而復以吳越漕折盡起北解。轉眼告罄。數萬饑軍圍視而起。其禍尚忍言哉。公之辨析利害。持正昌言。皆此類也。會魏瑞欲賣南京草場。公持不可。先是公之在津鎮也。瑞遽廢升。公不為發。及地震。陳言以慎內批。節思澤惜人才。罷內操。四事請已。重忤客魏矣。至是再三阻之。慮撓其害。乃引疾歸。時莊烈帝在信邸。久以名德知公。崇禎改元。乃詔起公入掌國計。按朋初九邊止有官軍無主客名。其餉有屯政有鹽引。有近邊民運而戶部之太倉不與焉。自客軍設而客餉增。及邊商本色改而屯政盡壞。乃發太倉銀以贍邊。曰年例萬歷以前僅四十六萬。至是三百八十萬。而關詳密剽通津新餉又五百萬矣。其太倉庫銀萬歷初積至一千二百萬。後四方用兵耗費略盡。及客魏盜帑藏。

以結邊帥羣小竄窟其中而累朝之積掃地無餘天啟六年尚得十一萬有奇比公受事不滿三萬自是左支右詘歲入不敷出者三百萬於是加田賦增鹽課減官吏生徒優免祿食一切之政不能復罷人主焦然時中夜召公問計公曰國用不足冗冒多而吏弊滋也惟核汰一法可乃下九邊督鎮詰問士馬之數酌戰守以為厚薄而改通倉輕齎以歸京倉稽汰西邊撫賞歲省數十萬香蠟芻豆舊以京商採買隸中官公改官買又省十二三而京商無抑配破家之患一日召對平臺首問公及兵尚書天下兵餉數兵尚書惘然不能對公為奏某某地兵幾何最悉乃自陳所司餉額某某新舊幾何今已發未發各幾何一代軍實衆如指掌百僚聳聽皆歎服不可及會軍興旁午中旨日夜嘗數十下公立奏成手中一一中機宜朝右倚以安危馬前天啟中尚書郭允厚請預徵明年遼餉三之一至是復遣京卿守催壓徵舊餉十之五公疏曰軍興孔亟不得已而催舊餉實於本年完京邊之五非索於本年之外亦非全徵大糧之五也遼餉敵加九釐預徵僅科此餉若衆徵夫大糧三分則民病矣請列其目頒天下橫征者罪之時四方饑旱羣盜蜂起供億煩難怨咨不可止然而公之意亦足白於天下矣故事朝審錄囚吏部尚書定案士申歲特召公主之蓋異數也時東林浙黨構既久即所稱中立者亦別樹氣類為一部日窺伺爭勝負國

計邊防一不問於是人主益孤無倚思欲復委中涓張彝憲者一日來總戶工二部  
踏上座掣公肘時撫細微激帝怒公引罪而已先是溫體仁訐錢謙益黨事帝召羣  
臣切責不已公慨然曰臣知籌國計盡職守耳不知黨為何事蓋公立朝一以公義  
為可否豈立冰炭無所附麗諸公皆心知其賢以不己助莫為推援也體仁既入閣  
專事文深內求人主微旨與俱上下時軍需益急更嚴考成法即循吏以尤異進者  
核不及額不與也於是吏部之考選並關戶部而體仁所欲進退者每授意公公不  
應乞骸骨奏上溫旨慰留再三上乃留中不出最後累疏上辭益切帝度公不可留  
頗責望蓋公持國計六年所凡京邊出納酌劑盈絀權衡不失錙銖先是諸軍脫巾  
無虛歲而終公在位無聞者故帝不可一日無公而公實病日增劇於是君臣交難  
而鄭友元之事起友元者新授御史也與體仁異體仁患之乃摘其前令青浦關金  
花額臨考補解為欺謾而公核考成不即發為黨激帝怒逮友元而下公於理南北  
九卿監寺科道前後九十餘人連章論救不已得放歸尋以壽餉功予原官致仕銀  
幣嘉養焉崇禎戊寅公考終於里壽七十撫臣以聞得贈廢葬祭如故事公生平無  
所嗜好得專一思慮於軍國計案牘旁午神理豁如執簡御繁應機立斷所歷卿貳  
皆劇職錢穀浩漣緒散絲勢皆手自會計老吏退立而已奏議一百三十六卷文集

編類書又三百卷。張尚書又言公每視事畢。人吏退散。獨局戶取會計籍目。選除之。納夾袋中。次出史籍羣書。凡有裨時政者。手錄竟日。以為常。此立言之所以富也。初公既以微罪去。其繼公者。心計不如操履。又異。徒悠游養處。好用浮薄口給之人。或以書生奏記一言而合。輒引拔要職。得領大農金錢。督糧市馬。譁張紛拏。迄無成效。以至於亡。天下於是乃思公。配胡氏累封一品夫人。三子長際壯幼際孚俱廢官。未仕而通州君以文學吏治世其家。舊史氏曰。莊烈之世。求治太急。嘗厲法禁。用伺察。以起偷窳。平臺便殿。召對無時。未謂不精勤也。然其長偽者。徒以大言敗事。而文巧者。又用苛察。以中人主之意。即一二老成黃髮之臣。勤其官守。著有勞績。將以圖實效。計久遠。而卒以苛責疑形。困頓阨塞。以去。如畢公者。豈非遇而不遇者與。銘曰。公序鹽莢。利安可盡。神明昔駭。茶法之論。上下兩等。去泰去甚。計可經常。惟中等近。結估騰口。願先輸錙。聞者色喜。若饑得糧。使者亟請。余不謂臧力。絀情見公私俱傷。窺使伺急。墮我紀綱。用絕新議。以守舊章。某後公生亦掌國計。論說勞繁。鹽莢實最先輸。而訟致煩。廷議羣公見逼。瞋目攘臂。某惟守舊。得公遺意。質之先民。庶幾無罪。作為銘詞。以示來世。



胡肫明禹貢鉅指序

嚴虞博

昔鄭漁仲有言禹貢之書深於道者也。書深於道非後世言地理者所能及。余嘗題其說以為自禹治水至今四千餘年地理之書無慮數百家。莫有能越禹貢之範圍者。亦莫有能疏通證明晰其源流而抉其異同者。時人習於所見。學者溺於所聞。洵乎其難哉。德清肫明胡君著禹貢鉅指一書。余受而卒業。慨然歎曰。偉矣哉。此禹貢之功臣也。自古著書之難有二。一曰博而不擇。山經海志茫昧而無稽。方志輿圖錯迕而失紀。太史公周行天下。其作河渠書曰。斷為二渠。復禹舊迹。說者猶以為與龍門大陸故道不相合。何況縷觀掇拾。誇多炫奇。彼此漫無折衷。前後互相衡決。此其失者一也。一曰固而鮮通。山川則消長不常。土宇則廢置無定。或一山而更數名。或一水而經數處。九河之跡至漢已堙。三江之稱訖明未定。泥古則廢今。信今則疑古。此其失者二也。莫要於班固之地理志。而史家但以為記載之書。不知其條綱正目。州次部居。約而不失之疎也。莫詳於鄭道元之水經注。而文士但以為會輦之書。不知其沿波討瀾。支分派別。瑣而不失之雜也。今肫明之書。簡而核。精而賅。網羅攷失。而實事求是。摘抉微渺。而融貫古今。兼班志鄭注之長。而去其二難。洵可以不出戶庭。而指畫九州。目營四海矣。昔之釋禹貢者。孔安國之傳。蔡仲默之註。皆立於學官。

蔡氏因陋就簡無所發明僅以資料舉之業而已孔傳頗多抵牾先儒皆以為魏晉間人偽託非西漢筆也自南渡以後儒者高談性命而忽於實學易之主宰象占也禮之不考器數也詩之不詳鳥獸草木也禹貢一書保殘守闕承訛襲繆幾千百年得是書而闡明之其有功於經學豈淺鮮哉君為人氣專而容寂平居以著述為業不接人事益有道者也其成是書也研精覃思凡二十年不惟區明地理之學兼亦窺見古人財成輔相之精意漁仲所謂深於道者庶幾近之今

天子道河周嶽灑沈澹災此書陳廣廈細旃之上豈徒贊水土之績而已行見立之學宮傳之誦習正孔傳之偽而訂蔡氏之訛尤後學之所深幸也已

安徽巡撫高公墓誌銘

公諱承爵字子懋別號一庵先世居山東之高密明萬歷中有諱有者遷遼東之鐵嶺遂為鐵嶺人有生良輔良輔生景時景時生尚義從

世祖皇帝入關勛亂有功世襲二等阿達哈哈番公之皇考也以公貴贈光祿大夫光祿生子五人長曰天爵官江西南昌府知府陞兩淮鹽運使耿逆之亂抗節死贈太僕寺卿諡忠烈次曰膺爵曰錫爵公其第四子也次曰陰爵高氏歷世隱德不仕至光祿而大公之昆季皆位岳牧著聲績而公之功烈為尤顯公初以門陰補蒙古

都統七品筆帖式。年雖少有幹略。選授河南衛輝府淇縣知縣。遷西城兵馬司指揮。出為江南淮安府同知。管理邵隰靈璧河務。陞揚州知府。康熙己巳。大駕南巡。擢江蘇按察司使。督福建布政司使。到任三日。特命以都察院副都御史巡撫安徽。未十月復命巡撫廣東。丁內艱。歸服除。命分修南河高家堰。明年南巡閱河。復奉命撫皖。旋以事解任。仍赴河工。又明年南巡。事得白。尋命督理靜海漳滏漳沔等處河務。公為人精明強力。臨事果斷。不吐剛。不如柔。不畏險難。不避嫌怨。所至發姦摘伏。興利除弊。或他人選。愼愼縮不敢出手者。公應機立赴。莫為持難。若庖丁之於牛。養叔之於射。王良造父之於馬。嘉然沛然。無不如志。以此收民譽而亦以此結。

主知至今論封疆大臣之以才幹稱者。必首及公也。三藩畔渙。淇當兩河之衝。軍需絡繹。民困輸輓。騎兵悍卒。稍失意。則撞塘叫呼。官吏多竄匿。公先出庫帑採辦。而後徵之民。第焚糗糧。悉儲境上。至即給發。檄出境。無有稽留。逗撓者。其尤無狀者。申憲以軍法從事。莫敢齟齬。民得安堵。而事益集。民有訴其妻亡者。三年矣。莫得其主名。公悉逮其鄰里。及常所與往來者。閱視之良久。指一人曰。汝何敢匿某妻。其人色動。叩頭曰。某非匿亡者。乃知匿亡者耳。即繫其人。蹤跡之。果得匿亡者。寘諸法。民咸以

為神京師多大猾而指揮官卑制於御史不得專決事豪右相率侮慢以為常公受事之三日諸豪有挾妓羣飲而譁者公命吏執之吏曰此諸豪恐及禍公曰無恐率眾掩捕之無脫者公念此曹皆怙勢少遼緩之即不得行吾意乃佯目吏曰此皆白丁耶抑職員耶白丁無大罪職員當請黜革耳頃之皆以白丁執即予杖而逐之甫畢而憲符下業已杖亦無如之何當是時諸豪大猾皆斂手避高指揮高指揮之名震輦下邳睢歲有河患夏秋之交風雨暴作洪濤怒波擊蕩隄岸一壞則萬姓魚鱉公呼召徒役舉土卷掃隨方捍禦而以身當其衝僚屬切諫不聽隄卒以完論者比之王尊周甲富而懦王乙糾亡命劫之書券而悉苦其資甲訴之州不為理以訴公或曰河官不宜與民事公曰吾既分治邳邳民即吾民也民冤不得直矣官為卒具獄寘王乙於法揚州例供草四百萬為防河而揚方罹水災草價騰躍費且十餘萬公請總河寬其征至以去就爭之遂得請於時元日有鶴來之瑞遂以來鶴名其堂而公廉能之聲播於遠邇達於畿甸

天子器其材遂有江蘇臬司之命公益勵精勤矢志平允以副

天子刑期無刑之意每當獄獄多所平反先是有私販鹽者以拒捕悉論大辟公親鞠之問防兵幾何曰二十七人犯盜幾何曰百餘人拒捕傷人乎曰無傷鹽犯三人

公曰以百餘人拒二十七人兵不傷而反為兵所傷何名拒捕哉論其魁餘悉滅等楊氏父死而訟父妾與人私生女某月日送育嬰堂者復有要人持之公曰子當為父隱父死而暴揚其私非情也且真偽未可知一日以事至揚粹入育嬰堂檢其籍無某月日送女事其子覘知之遂囑院移其獄於藩司公曰治獄吾職也吾能越職而問錢穀乎即日親鞫以籍為左證其子詞屈遂伏罪欽犯賄解役佚去而解役亦逃拘其父訊之不承公飭吏密伺之有與其父相聞者執以來得一人公曰此即解役也一訊而服人問其故公曰獄有五聽吾得其情耳無他術也粵東歲大飢公至即發常平米賑之而後上聞上嘉之州縣舊派里民荷擔承應過客名曰過山夫役使勞苦公嚴其禁令自募糧役舊任里長因之侵蝕花戶輸十二於官而私其八更以奴隸畜之莫敢與抗公立按糧均役之法盡革其弊民大以為便刑具舊用鐵梨木藤約其下而貫以鐵以是訊獄鮮全活者公命易以杉木麻約之而貫以竹願其式於州縣至今用之舊制凡監斃三人止罪印官而不及司獄公請與均罪又請罪人配潭泉者得冬月發遣以免羈禁皆報可公在粵凡舊政之不便於民者悉訪求其實大者奏聞小者檄罷聲生勢長陽施陰設大約以剛決為主而濟之以仁恕故民畏其威而感其德去之日老幼扶攜遮道奔送自羊城抵梅嶺蓋千餘里不絕也

公凡兩治皖皆不久而去其治如在粵民至今思之初公自揚州即以才見知於上有清廉之褒親瀝宸翰賜馬後遂疊蒙恩奏非次拔擢中雖被誣而

聖明洞鑒終始保全再委河務軫念勞績眷注弗衰尚將有以用公而公以不起聞矣初公之撫皖也以監臨當往江甯念太夫人年尊不忍離朝夕遂奉以行江甯人榮之及再撫皖而太夫人已沒顧瞻堂宇涕泗潸然痛親之不再至也公忠孝天植內行純備少負大志不屑紆綺徵逐平生尚意氣重然諾讀書通大義每論古人成敗則抵掌擊節垂老猶手不釋卷好學其天性也公生於順治辛卯某月日卒於康熙己丑某月日年五十有九配楊氏繼配納拉氏俱贈一品夫人子五人其偉庚辰科進士翰林院庶吉士其倫候選通判其健太學生其佳其人女七人孫一人公既卒之幾月其偉具狀來請銘銘曰

高世隱德發跡從龍公承其先實大聲宏始以才顯號能治劇弛張隨時導窾批郤於江於淮閩粵之充風行標馳除莠鮮苗名徹九閭懋嘉乃績六飛南幸疊荷恩錫汝平水土克成厥功無替前勞保其初終民有口碑史有載記揭於貞珉用告來嗣

特進光祿大夫勇略將軍趙公神道碑

康熙三十六年三月特進光祿大夫勇略將軍趙公以疾薨於甯夏之里第時天子西巡朔方聞訃震悼特命皇長子親臨其喪諭扈從諸大臣赴弔閏三月六日御製祭文遣大學士張某賜祭如禮其孫子宏燦宏煜等先後赴行在所謝恩

上復召見慰撫所以褒崇寵錫之甚厚於是宏燦等撰事狀以隧道之石請銘於余先是十五年春公以甯夏提督奉命朝京師余時官翰林始識公之為人後公凡四人朝余待罪政府與公相周旋悉知公忠勇大節歷官制軍勝敵之略與其生平慷慨質直強毅不撓之氣未嘗不景仰歎慕以為古之名將所不及而

聖天子褒崇寵錫推心置腹眷注之重與夫自初及終卹賚之隆尤足以獎勵勞臣為國家宣力効忠者之勸故於燦等之請輒條次其梗概不敢以不文辭按狀公諱良棟字肇之別字西華先世自陝西綏德衛遷居安邊及公官甯夏因家焉故今為甯夏人公少倜儻有大志讀書不事章句好觀古人忠孝節俠事常慨然曰大丈夫當為國家出死力定禍亂安用儒生佔畢為遂以順治二年從英王入關制軍蒞公為方署潼關守備時賀珍武定大等構亂秦隴從都督劉芳名討平之又從定甯夏署甯夏屯田水利都司四年帥師征河西克之單騎縛偽總兵丁國棟以功補高

臺遊擊十三年經略洪公承疇薦授雲貴制府中樞從征隴納水西諸苗保山谷峻險糧運不給諸軍多失律公獨號令嚴整所向克捷所俘獲悉頒諸麾下無私留者積功陞雲南廣羅鎮總兵官今上御極之元年也鎮府初設軍旅草創公振肅綱紀仁威並行伐叛柔服動合機要故能建威消萌烽火不警吳三桂尚制滇南調公為貴州總兵官勅令進攻水西時公已丁外艱力辭不允墨綬即戎水西平乃聽終制再丁內艱服除八年補大同鎮總兵官加左都督考核軍政嚴而不私積弊為之盡革十一年調天津鎮總兵官天津素稱盜藪旗丁鹽販通行囊橐白晝大都攫人而奪之金吏莫敢訶問公至則申法制立程約張設耳目窮治根柢務在鉅強暴以惠孤弱於是奸宄屏跡部告無事十五年奉 旨以提督撫安甯夏入 朝陞辭當是時三逆煽亂遠近響應甯夏叛兵戕殺主帥勢益猖獗公見上詞語慷慨忠義激發請以家口移居京師使得專意擊賊

上為之動容 特賜第宅銀米貂裘鞍馬弓矢之屬公即日就道直抵延綏西路之定邊謀報賊兵由甜水河來刼餉左右請少卻公叱之晨夜兼趨搶入橫城賊不意公卒至遂宵遁公厲兵秣馬修器械屯餉糧訓練士卒以勇以義購倡亂者熊虎剋得閭閻賢陳國忠四人請 旨正法軍中肅然無敢譁者在任三載威信大行關中



已略定矣。公念漢南巴蜀未入版圖。天兵稽誅。民罹湯火。十八年。上言。臣願以所部練卒五千。獨當一面。規取漢興。恢復川蜀。

上下公卿議。議者謂由興安棧道入堵山。小川子四路前進。須滿漢兵五萬人。前後接應。輜重不與。公曰。兵貴精不貴多。遂率甯夏本操漢兵五千。自齋行糧。由八堵山徑進。遂破密樹關。取徽州。復略陽。分遣裨將急趨陽平關。覘賊虛實。十九年正月。兵至白水壩。與賊夾江而陣。江水暴漲。波濤沸天。岸無舟楫。賊矢石如雨。將士皆懼。公誓於衆曰。此臣子報國之日也。視我鞭所向。敢退者斬。於是一軍皆奮。呼聲震山谷。遂攬甲浮江而渡。江流為平。賊錯愕奔潰。師乘勝逐北。過青川。大敗之。於石夾溝。再過青青山。舊州。明月江。屢戰屢捷。勢如風雨。不十日而抵成都。先鋒奪門。無有阻者。遂入城。城中人不虞我兵之從天而降也。先是。

上以公老於兵事。詔問公收川事宜。公條奏兵調發若何。糧輸輓若何。剿撫大勢若何。經畫詳明。言極剴切。

上是公。悉從公議。是役也。兵雖兩道入。而諸將方略悉公所預定。公既入城。即下令禁剽掠。市價不變。男女不簪。赦脅從。撫降附。開誠布公。宣布威德。於是東西川及天全諸土司烏斯番族等。皆傾心向化。民樂更生焉。捷聞。授公勇略將軍。仍管甯夏提。

督事曾雲貴總督缺人

上曰趙某謀勇懋著操守清廉雖係武員通曉文義其改為總督遂以勇略將軍授兵部尚書兼都察院右副都御史總督雲南貴州等處地方兼理糧餉時雲貴尚阻兵也公在蜀聞命以年老疏辭不許即自蜀入滇二十年三月追剿胡國柱於觀音崖五月破關山象嶺渡瀘江七月復建昌九月抵雲南時湖廣廣西兵已圍城數月矣公閱視壁壘謂營陣太遠賊得休息故久而不下恐師老糧匱法當移營以逼之乃自帥五千人急攻親冒矢石諸將益用命凡八日城下蓋公為將善料敵識地勢勇氣感發不避險難其教士悉用紀律信賞必罰臨陣對敵勸以大義故士卒皆樂為之盡死所向有功平滇平蜀皆以此也是時公年已六十餘矣海宇蕩平案弓歸焉

天子念公久勞於外特准入朝掌鑾儀衛鑾儀使事優老臣褒舊勳也公結髮從戎四十餘年大小之戰數十百功勞奏最莫與為比

聖主深知其忠特加一等精奇尼哈番每寵以殊禮其方定蜀也御書存誠扁額

秋興賦命公子宏燦馳至軍前賜之其既定蜀也命宏燦再至軍齎賜弓一張馬六匹及宏燦以甯夏總兵陞辭也復賜公御製詩太極圖說刀一撒袋一其平

滇而歸也。遣使郊勞。賜茶其掌鑾儀衛也。時天寒。賜懸狐裘帽各一。其奉召入見也。

天子停驂勞問。呼將軍而不名。其就醫江南也。命昇至觀德殿。

聖躬親視。憫惻者久之。念其疾也。則撤尚方珍物。人參鹿尾以賜之。念其老也。則擇內城寬大第宅以處之。或手書存問。或畫日三接。大官賜食。便殿命坐。隆恩殊錫。近古未有。有大事必就公諮訪。或召至京。與諸大臣錯議。必待公而決。而公亦殫心盡瘁。不為依違在。

上前知無不言。無所隱避。三十年師征噶爾丹。命公巡行塞外。公相度地形。施設營陣。日以私財椎牛饗士。馳驟沙漠。據鞍顧盼。英風銳氣。老而不衰。大駕親征。公又扶病入。朝口陳兵事。侃侃諤諤。皆可見諸施行。

上方深倚毗之。而公以不起聞矣。公學問通達。才思警敏。每奏兵事。皆躬自操觚。不假手於幕客。曰。軍國大事。非他人可代也。日教子弟以忠義。曰。君恩深厚。汝曹宜盡力。居喪哀毀骨立。若不能勝者。治家嚴而有法。門無雜賓。蓋其內行。醞備又如此。公生於明天啟元年十月。卒於康熙三十六年三月。年七十有七。娶郭氏。封一品夫人。繼娶李氏。贈一品夫人。再娶白氏。子五人。宏燦。左都督。管浙江黃巖等處總兵官。宏

雙山東按察司副使管天津道事宏煜內閣中書舍人宏煒宏煥尚幼女三人孫六人銘曰

天翔聖運篤生人傑桓桓趙公威武惟烈早歲杖策從王於征塞旗奪獲目無堅城爰制中權爰總戎律嚴明有威卒伍齊密畿輔之地奸宄是區挈持維綱以鋤以誅關中叛渙將驕卒狂風馳颶驅迅掃樓櫓巴蜀梗化滇黔阻兵

主憂臣勞抗章請纓遂率所部練卒五千鼓行而南搗其中堅腹敗支披莫敢齟齬整旅入郛前歌後舞市不易肆農不輟耕烏言升寰壺漿來迎蠶叢既定揚旌渡瀘環城三市拉朽摧枯賊首朝授降幡夜監氛祲溢滌復我疆土凡此大功帝曰爾庸告於文人勒堯銘鐘大官授膳尚衣賜服彤弓盧矢驂騶驪駟公之在朝

天子是毗公之既歸

天子用思固有大事爰詢爰謀公徐一言奉為圖球公之材武如熊如虎公之智略如風如雨公之精誠如火不滅公之亢直如鐵不折恃其孤忠以報

一人至老不悔厥聲斷斷惟

天子明獎其勳勞生有殊恩死有厚褒以勞定國以死勤事臣忠主聖古莫與二歷觀載策此為不朽我作銘詩垂示永久

史蕉飲先生過江集序

汪士鋐

頃寓直 禁苑。獲見澤州相國為蕉飲先生詩序。述其嘗以能詩名。稱於

上前。竊歎相國之知人。而又多其雖有薦拔。而人不知。以為深得古人薦賢之體。夫世之一長一技之士。咸欲得有大氣力者為之先容。而名相壓勢相軋者。又不勝其忌且嫉。是以文人詞彥。多至老死巖穴。而無聞。即或幸得一官。而隨人進退。湮沒不彰者。何可比數。如先生之詩名。垂二十年。天下之士。方樂誦而習之。而相國復於稠人之中。傾心愛慕。微名當展。是相國之有容。而先生知遇為不可及也。余往在太學。即從先生遊。而先生舉京兆。余亦廁名副榜。辱先生不以為不肖而棄之。同時一榜諸豪雋。如西崖元朗。皆朝夕相聚。論文飲酒。以為笑樂。其後先生與西崖俱出入承明。而余方自憐其駑馬下乘。顛躓長安。後十年始繼塵詞館。中間浮沈上下。踪跡稍疏。比年來復遭罹荼苦。牧馬岷山。旋被恩命。校書邦上。東西奔走。靡有定居。而先生與西崖元朗。皆改官諫垣。未得相見。昨歲始得侍。內直。晨入暮歸。欲一求先生之詩讀之。而不可得。日者扈行塞外。倉卒南歸。遇先生於汶上。艤舟待閑。岑寂無聊。先生始出其過江集一編。即相國所為作序者也。尋繹玩索。溫柔敦厚。所謂發乎情性。止乎禮義。於先生之詩得之。宜相國以為風雅之本原。詩人之極致也。今先生

暫爾告歸不日還朝以載廢補衰之什西崖先生則視學中州清苦刻勵不異太學  
整鹽之日而元朗乃不幸逝矣悲夫余素不能詩得交於先生與諸君子後近復日  
侍相國之側嘗竊聞其緒論因承先生命序於簡末并道其曩昔歡會之樂如此云  
送巡道楊賓實先生序

歐陽子有云翰林學士非文章不可故登金門上玉堂者咸祇以為文章之官而無  
所事乎其他不知文者所以載道者也文而不本乎道則文為空言而道者乃致治  
之本道而不施於治則道為虛名道也文也治也古者合為一而今則區為三惟我  
賓實先生固合道與文與治而為一者乎先生之在翰林也樸直自守其文皆體道  
之文其視學畿輔也辨正文體崇尚經術一切請託苞苴以非道來者悉屏不行而  
又不自表暴形人之短以成己之長其供奉內廷也將之以誠敬處之以忠實內  
無所援外無所耀守其道不懈於文惟先生為能盡翰林之職者也是以  
天子信重之已而直隸巡道需人

天子特破成例簡用斯任巡道一官畿內刑獄之總彙保佑善良抑挫豪橫職至重  
也先生始下車折斷滯獄期月間踰數百餘事行徑皆空牘無留案其政不嚴自治  
而又申明職掌整頓綱紀不屈己以自下不居高以傲物穆然有道之容眾皆稱為

長者不知先生以道自傳施之於政事之間以及於待人接物之際悉由誠敬篤實之心而勤於其業不猛不弛實有合於古先賢之所行昔朱子在南康時有躍馬於市傷小兒者不以衣冠子弟縱而不問其在潭州論斷獄事以為不可不論是非善惡務從寬厚惟考其實情輕重厚薄付之當然其在漳州防胥吏沈滯公事邀索於人則嚴立程限使一句詞訟應時都了蓋威則使人畏而不敢犯勤則使人信而不敢欺政事之間莫非至誠惻怛之所流衍而民有不化者乎先生以文章之官居政事之地一皆本於朱子家法於以立身行己於以對揚王休無所施而不當矣鉉於先生為俊進且在弟子列因本先生之志而書之所謂合道與文與治而為一者也

### 贈佟君申之序

善為治者必察天下大利大害之所在而經營措置於以成不朽之烈而垂功德於無窮如江西湖口關在洪波震蕩之中商旅輻輳皆泊舟於此猝遇風浪磯石相搏則靡爛潰敗不可收拾雖有救時之士建議遷徙而仍襲既久莫可改易以是為行旅之病余昔往來江湖間目擊險阻輒形為謠詠然亦苦於無可如何之勢余中表兄吳商志先生以布衣能言天下事嘗欲於左蠡之地別開港口以殺江勢以平磯

石之怒時抵掌而談復繪為一圖以授其子藏之行篋其當途君子有大力者主之而未得其人前年余友溥君聿修視學荆楚於湖南北制府公所遇今江西中丞佟公之子申之申之制府公壻也英年挺拔豪氣直上妙能為文章工吟詠所著有潛修軒集而又明於大義每以忠孝廉節之事相鼓勵故於范忠貞公之盡節歐閩也則追紀其事以志嚮往西郵用兵也則有慷慨從軍之思而又襟期闊遠其登衡嶽也則有海天縱目圖之作其他清詞麗句不可枚舉既與聿修相見驩甚輒上下古今論當世利弊聿修因為言左蠡之險并及商志未竟之志申之慨然曰家大人節鉞江右有封疆大任是宜為言於是即草家問次第其事并郵前圖以告其尊甫中丞公爰集僚屬往驗其地相山川之險易度工役之費用事在必行會昨歲稔未暇以為而中丞公之謀國久遠與藩臬傅公楊公皆當代賢者同德比義必能相與有成以活湖口往來之民而要其立心矢志視天下之民如己饑溺則申之有以先之也余因高申之行誼恨不得與之往還相與乘風鼓枹聽石鐘之聲覽姑山之勝而一抒其心目今幸讀其文辭與聿修之言恍如相遇於一堂也異時申之通籍貴顯成天下之務活天下之民秉旄建節以繼中丞之後不遠矣申之已歸豫章在中丞公前朝夕奉侍必數數為公言知左蠡之役必有成也因為之序并系以詩曰



維木有根。維水有源。中丞之子。節鉞之門。克己勵行。則維其真。忠義斯慕。經史是親。朝吟夕誦。其書等身。託身稷禹。交結雷陳。慷慨世務。畢見於文。左蠡之險。天下所聞。磯石搏擊。江水吐吞。行人過之。悸心驚魂。公子感動。見義當仁。從容趨庭。以告嚴君。別開港口。全活斯民。一言之德。萬世之恩。濡翰吐詞。行勒貞珉。敢辭不敏。用播芳塵。

昨非亭記

長蘆運使孔君彝仲。以按實鞫獄忤上官。一朝去位。人皆是孔君。而惜其去。君獨蕭然自樂。略無幾微得失介於其胸。孔君亦賢矣哉。君家閬里有竹數百竿。將歸而治亭其間。益教子弟以讀書為學。因屬余作大書榜其亭。名之曰昨非。昨亦何非之有。耶。即其理之所在。以行其心之所安。而甯為其拙。無為其巧。甯獲戾於上官。而不敢以人命為草菅。不賢而能如是乎。然人之毀譽何常。是非甯有定哉。當世所號為才且能者。往往武健嚴酷。一惟上官意指所向。以是為非。以非為是。雖致人於死。不少顧恤。假使如其所為。則君且不去。彼方居其官。享其用。出入烜赫。儼然有覲面目於斯民之上。而君乃歸矣。夫是其所非。非其所是。君子不為也。故曰孔君賢也。昔淵明作令八十日。拂衣高謝。其著歸去來詞曰。今是而昨非。蓋亦有慨乎其言之也。君在職未久。去非其咎。而君益虛其心。平其氣。與人相見。不作世俗一語。惟論文講藝。以

為子弟法其致豈出淵明下又何必今者之是而昨者之遽非也君子以是益賢孔君而為斯人之徒惜也雖然非孔君意也孔君欣然而笑曰有是哉無多言且歸去

東園記

去年秋七月京城大雨壞民屋廬余居日南坊西偏其東則卞氏廢園也舊有池一夕水漲毀我垣墉乃請於卞氏乞地數丈築之作東軒於其上今年夏卞氏地將他歸余以昨歲之勤也乃併購之袤三十餘丈廣五之三南鄰廟陂地最下為作隄以障之又前後繕垣樹門平其隆者湮其窪者復疏廢井得泉而甘凡土石工役之費其勤有甚於昔者焉客謂余曰斯地也其土可以殖其水可以灌是宜為園因名之曰東園有客笑者曰斯地也無花木之繁無臺榭之飾是嚮者糞穢之所積而馬矢之所填也何園之可名余曰苟吾意之所適雖屋角半弓室中方丈皆足以為娛若夫名園大宅高臺深池極富貴者之樂其廣袤有什伯於是者而達官顯人拘牽職守求一顧而不可得茲之閒園曠壤為他人所棄置者而吾以不才之身得散步於其間朝可以觀初陽之升暮可以眺夕嵐之映風雨之晦冥煙雲之繚繞皆得望而即之且也門臨池水宜於種柳長隄平衍宜於植槐而桃李果否凡賤而得實者皆可月栽日殖數年之間安知其不遂蒼然深林鬱然高阜乎而何不可名園之有容

笑而去。因書之為東園記。

兵部尚書范公神道碑

惟兵部尚書范公為文肅公之子。忠貞公之弟。服勞王室。厥有成績。

天子懋功明德。御書世齋其美。四大字以賜。蓋公之忠孝天篤性成。而洞達政體。其勘亂救民。威懷慈惠。輒被滇黔江淮間。厥功偉哉。公之葬也。婁東相國誌其墓。公子時繹屬銘書之。且請作墓隧之碑。謹按公諱承勳。字蘇公。號眉山。裔出宋參政文正公後。自江右六傳而隸籍遼陽。其世次官閥載公墓誌中。文肅公諱文程。

世祖朝官太傅兼太子太師翰林秘書院太學士。公其第三子也。年二十四授工部員外郎。遷刑部郎中。擢監察御史。調吏部郎中。時吳逆餘孽未靖。譚宏等叛走東川。公往護征。累督楚餉。譚宏死。復監鎮安將軍噶爾漢餉。益遠。公自歸。至陸路抵雙門。以達重慶。持四十日糧。援大軍之駐瀘州者。軍無匱食。還京補文選司郎中。康熙某年兩江總督于公成龍卒。

上篤念之。命舉如其人者以奏。廷臣薦公及陸隴其等七人。明年遂擢內閣學士。又明年以副都御史巡撫廣西。又明年遷兵部侍郎。總督雲貴粵西。蠻獠雜處。非時竊發。滇黔新創於兵。瘡痍未起。公一意味。乃酌廣西九郡糧米。或徵或拆。及請蠲蘇。

賀二縣糧之無徵者至滇首除藩莊偽標之害藩莊者明沐氏田號曰勳莊國朝  
畀吳三桂吏稱藩莊逆平莊歸有司常賦外復徵莊租公請還為民田而平其直逆  
藩既定其標下幾遍滇城時議盡歸之旗羣情危懼公藥請免發人得安堵如故二  
十七年七月湖北裁兵譁變滇卒潛謀煽亂移駐尋甸之兵亦脅眾鼓譟焚燒民廬  
城中又復告變將以其夕舉事公偵知其情不得發翼日就縛斬其渠帥餘釋不問  
復逆擊尋甸叛兵於交水擒其首惡二十餘人斬於轅門諸反側悻怖褫魄兩逆數  
萬眾帖安公以便宜奏聞上優詔褒嘉謂微公則變且不測遠都察院左都御史  
抵貴陽以本官總督兩江江南財賦甲天下民疲征役公至即上言三吳賦重宜復  
稅秋糧例至六月開征又除江西運糧腳耗又請江蘇廬鳳諸屬積欠地丁漕項分  
年帶征又請存貯米麥以振江淮被災飢民并蠲淮揚徐泗所屬漕項舊欠皆紓江  
南積困丁太夫人憂去服未除拜兵部尚書尋督修高家堰平廣西猺變獄乞休慰  
留再請乃致仕里居十餘年遭疾卒年七十有四公前在滇九年尤熟諳彝情土異  
素事殺掠自吳逆徵其兵助叛復假以爵秩榮驚尤甚於是黔之龍天祐欲以土總  
兵世其子滇之安世基殺人以祭鬼公諭以禮法結以恩信頑梗悉服魯魁山渠率  
楊宗周踞滇萬山中與傑目尚義等合謀犄角數掠新舊蒙元景楚諸郡縣公遣土

升入其巢。為陳禍福。宗周等感悔。籍其土田。以獻公。以朝命授為土官。環山州縣。遂以安枕。已而尚義等背盟。出掠。公用宗周為嚮導。縛其衆。尚義走死。磔其尸。以徇。探奚茂著構釁。殺其主魯姐。姐妻其黨阿所。地近蜀。遂犯姜州。

上遣官會勘。阿所逃匿。東川公密擒寘獄。時會勘官將貴奚罪。公執不可。乃按以重辟。金沙江為迤西屏翰。環滇八百餘里。與紅黃二喇嘛接壤。藉麗江土府以扞江外。中甸吳逆出窺湖湘。恐蒙番躡其後。割地賂之。蒙番始與麗江共有金沙之險。麗江地去賦存。公請蠲其賦。以恤土奚。又劍川協地連蒙番。汎兵單弱。宜撤內地四汛。以益之。北勝州治江外。為金沙下流要隘。而永甯土府又在其北。五百餘里。逼處蒙界。目丁五十人。不足為備。土州高贊配最孱弱。優恤之。責以扞衛城東。永北宜改協為鎮。以流土並守。始格部議。卒如公言。忠貞公諱承謨。總督浙閩。以耿逆狗難。

天子眷佑。官其子時崇。令仍督海疆。公卒之年。適陸見來京。執公之喪。一門忠孝。有由然哉。娶穆奇覺羅氏。繼娶沈氏。一子時繹也。銘曰。承相業兮。先後裔。樹麾幢兮。兄及弟。篤忠貞兮。千萬世。

陳繹思和本初傳

曹耀珩

陳確字繹思。金陵人。從父官長沙之湘鄉。遂家焉。為人尚大節。不治生工。詩字所居一茅廬。書數卷。竹數竿而已。長沙之能文者。皆豪之。相往來。然特與北方人和本初友善。本初者。繹思里人。彭警菴妹婿也。其父由武舉官守備。而本初事文藝。隸善化庠。名藉甚。胸無城府。人有過而爭之。扶人於危。口不市德。產於南。慷慨悲歌。尚有燕趙風。繹思好遊。歷九疑。登滕王閣。走山陰道上。歲以為常。本初連試有司。不得志。亦下舟淮揚間。康熙癸未春。有官粵者。羅本初幕下。本初曰。吾有友陳某。客永新。不相見數載。能迂道訪之。從公遊。其人許之。中途易小舟。逶迤入永新。未至。誤墮水。死。時繹思從夏葛民幕永新。意忽忽無聊。移寓蕭寺。日買酒爛醉。醉則吟。操筆如飛。間狂歌拔劍呼故人。姓名葛氏莫省其故也。本初計至。疾走撫棺大哭。氣幾絕。家人救復。甦。有間曰。本初為我死。吾何復求活。吾將從好友地下矣。不食卒。兩主人各厚殯之。買舟送歸長沙。人無識不識。皆太息云。

陳仙掌傳

陳君載華。字仙掌。又字豫中。年二十二。中武舉。不自喜。鍵關益力。刻意為詩古文。瀟灑不同俗輩。交蜀人李雪樵。而學益進。藻翰駕一時文士。放浪湖陰。嘯傲自得。顧性

闊達輕財如土家遂落故人官南陽往依之復蕭然以歸貧益甚乃投帥府得洞庭標舟年四十有四矣余嘗往候見仙掌七尺昂然鬚下忽生髭數寸漫繫刀劍束帶上馬謁大府既食短衣獵山谷間帶禽三五以還夜燒燭陪坐止酒不飲亦不復論詩文縱譚天下形勢關隘西征戎馬事指畫掌上對余鬻強弓椎傑自喜余笑語曰此固吾十年前之仙掌也曩仙掌孱疾一書生葛巾絺袍一卷自隨不識時事歲乙酉余過汾湖同泛舟菱荷間舉網得雙鱗烹以佐酒嘲余不飲一傾盡數盞與余各賦詩一首返棹天微雨余乘屐仙掌跣足負酒枕浩歌景象依稀而豈馬上之人哉仙掌亦大笑俛首不語後量移于戎忽忽以死家薄田數畝如故終於貧然其生平絕不一日齷齪自安世之文人武士卓然古今者多有而各專一途如仙掌者世入其何以命之與

夏雲卧傳

夏君光洛字禹書號秘菴年十七為諸生食餼為文縝密有法度然未嘗一試鄉閭好填詞吐屬入妙工書飛白遠近爭購之初居城後徙邑九里之河塘茅屋數椽號雲卧道人堂前梅一株巢其上為坐具又號梅巢居士梅巢側開莽通山為馴園怪石修簷杉松綺錯小逕盤曲而上翼亭於巖亭之中茶鐺木榻劍匣書籤俱有致又

有石磬鐃鐃然。縣亭角。層峯細澗。俯呈於几席之下。雲卧安之。不問世事。天倫中至。性過人。侍母疾卧牀下。年餘不解帶。友愛二兄。兄子貧。讓其分宅。年踰三十。展視一衿。以母卒。悲思不已。其長兄先卒。亦痛甚。自是意常怱怱。不樂。深夜行階除。捫胸甚歎。儔衆偕處。獨歎歎於邑。問之終不言。聞戚友不如意事。旁皇慘澹。至泣下沾袖。遇積雪尺餘。服羽士衣冠。帶劍。早登山椒。狂走數十里。投止楚人家。人以為僊。夜獨宿亭中。虎繞亭。輒略無懼色。憤激輒豪吟。絕叫。夜半起。擊石磬。聲徹里許。知雲卧者高之。不知雲卧者怪之也。暢庵曰。雲卧生平所遇。坎壈不稱意。宜其自處有然。然士遭窮如雲卧不少。且有過之者。雲卧何自苦若是。是其明於憂患者乎。嗚呼。今得志於時。任天下之事。憂當若何哉。



送張方伯往山海關序

梁份

太行之麓。歷居庸。連山東。走忽。轉而南。滄海之水。自直沽排空東注。忽放而北。山南轉若趨而入海者。峙於北海北。放若吞吐於山者。潛其南山海之會。踞其雄而屹然者。為關。若囊之括。鉗之口。以屏京畿而扼全遼者。於是乎在。不如是。不足以重於天下也。羊祜曰。自有天地。即有此山。易曰。王公設險以守其國。關之險。自明洪武間始設。昔之委為蔓草荒郊者。其世其年。蓋已不可考矣。隋置臨渝於西。唐為榆關。東北古長城。燕秦所築。距關遠。皆不足輕重。金之伐遼。自取遼民始。李自成席卷神京。敗石河而失之。天之廢興。人之成敗。而決於山海之一隅。以一隅之地。決勝於一戰。而天下遂定。以天下之大。而定於一隅。荒榛千百世之上。而偏重於三百年間。如茲關者。薄海內外。曠古以來。未有也。明正德中。守關纔百人。今省屯戍。用關吏。譏行旅出入。備非常而已。民生不驚。烽火休養。熙恬相安。於用武之區。則會際昇平。天下統於一矣。先是數十年。屯兵且數萬。統以宿將大臣。往來絡繹。樓櫓無甯日。竭天下之金粟。輸於關。而天下重困。關內外虔劉靡遺。不關益固。而人心益危。然後知天下定。則山海安。山海困。則天下舉困。相為安危。一至是。其重可知也。三百年中。事變不常。時重時輕。又可知也。而古今視此矣。關之得名。當全盛之日。山若增而高。水若浚而深。

而山海自若也。三百年而上牧豎之所躋漁人之所泳而山海無損也。時重時輕者人也。非山海也。此山海之所以重也。份嘗薄遊塞上徘徊山水間顧未嘗一至山海魯庵張公往往為份言間請志地書具知其彷彿公世家山海而生長直沽往來數是行也某樹某水某邱公益賦詩請解裝以讀公益面命之份所知有更進於今者則雖未嘗遊而玉份於成與秦塞無以異此份之所厚望也。

拓公渠記

秦塞之遠出三千里為河西極西地環堯幕東通僅一綫者惟肅州為然開則嘉峪通西域貢道順則以賓來庭逆則以絕交關路用捍全秦而釋西顧憂者亦惟肅州為然肅之為肅既孤懸天末而又繫中外之安危則為之計者必地加開粟加多而民加衆甲河西五郡使之為樂土以固苞桑而後可余嘗讀禹貢至聲教被流沙西戎即敘數唐虞治化之遠乃在弱水既西厥土黃壤田上上之後今流沙在哈密地而合黎弱水在肅東境上然則肅當唐虞之世固已奏成平不自漢武開五郡置酒泉始矣國家撫馭萬方而肅則自哈喇灰之福雖休養生聚於今六十年邇來增置大鎮而民生起色猶且遠遜甘涼兵備始公來肅兼理屯田水利甫臨即下教條勸課開墾夫肅當祁連弱水間廣二百七十里袤不及百里山澤居其半地狹民希

而塞雲荒草。彌望蕭條者。大耕水種。擐甲荷戈。一民而百役也。豈非屯田水利之不講。則民物不殷阜之過與。余嘗問於肅州卒成用曰。今之肅何不古若。卒生曰。祁連雪溶。則討來河水可灌。廢久跡湮。今因故渠而疏鑿之。自臨水至雙井。東西六十里。南北二十里。墾地五千畝。增國賦利民生。闢荒蕪而田上上矣。先是吾儕六十四家分地八區。倣八卦也。八家任一區。倣一卦為八。又八家同井也。輿論同而合力為此。此吾儕六十四家之幸。尤吾肅百年之利也。然非渠之先疏不至此。而留心民事。相原隰。授方略。非姑公其誰實為之。於是命是渠曰姑公渠。志不忘也。不甯惟是。今紅水壩開東洞子渠二十里。溉田千畝計。皆公躬督率成之。以次而及。將肅無不治之水。則無不耕之地。必無不庶之民。若夫漢之屯墾中。歸美趙充國。唐涼州粟客。一鎌數十斛。史稱郭元振之功。以視公今日。又何不古若之有。余曰。有是哉。用是策於塞上。則中外治平可立效。區區秦中兵農兼事務一而兩得者。又何足云。用次生言以為之記。公諱儀鳳。字子庭。宛平人。

### 鄒節婦傳

節婦姓吳氏。名珏。京口吳萊公女也。京口枕大江。山區水聚會。太平極盛時。人文蔚起。節婦生。更代先六載。父兄蚤有聲海內。鄒夸一世。而特愛節婦。節婦天資淳厚。特

顧異襁褓受教輒不忘稍長好弄筆硯兄笑曰汝亦欲作女博士耶凡刺繡織紵見無不能若所素習者諸技巧類是率非所好雅好古書洞晰大義時時為家人講說神解若天縱是時年十七歸邑子鄒肅翁父季淑念肅素庭藏好學窮日夜不寐往往惠之比合盃益讀書不輟疾復作節婦侍湯藥衣不解帶者經年肅竟死節婦痛哭欲殉婢覺以告翁姑防特峻志不得遂即絕不飲食家人進糜粥即舁去號蹕震畏次母亞往省視姑具以告於是母氏曹姑氏鄭同辭語曰我兩人老矣汝今死兩老人能生耶汝夙孝今以夫死忍令兩老人亦死耶語未既兩老人同哭舉室聞者皆哭當是時節婦絕復息聞母同姑疾聲哭輒復視母同姑更語曰待我兩老人死汝行汝志未晚也節婦乃鎮會守益密不得殉強起旦夕臨哀號失聲鄰人聞哽咽聲涕輒下母欲且歸甯節婦曰守志者不聞歸母家也母鎮之於是盡撤珠璣編衣蔬食和柔聲色以承順翁姑翁姑忘失其子也以是閭里益知其賢賢者爭效慕寢以成俗服闋同里有問於鄰嫗者嫗曰我固微感之曰守志良苦曰此定命矣苦固所甘也無積聚奈何曰守志豈在家之貧富耶未舉子奈何曰守志豈在子之有無耶有子則守是守子非守志也於志何有語既忽怫然曰我與若鄰也宜知我若所言云何汚我耳禽獸含靈從一而已更二庭之婦為禽獸蓋若所言云何去毋復我

見問者張其口不能閉。尼有款門請謁。指柱間琴曰。無絃不理。幾何時。曰。未亡人不理久矣。不計其時。曰。長齋甚善。不事佛。不剔髮。無益也。曰。未亡人不舉酒肉。為吾天非為佛也。尼膜拜反走。於是時年纔二十。姑與母謀置嗣。以成其志。會族子鵬生立之。甫彌月。鵬歸哺乳。保愛甚於出腹。念翁姑老子幼。食貧無資。非治女紅積貲。微無以為生計。初學繪事於兄。工特甚。乃布繡紋點絢。增華人人爭購得之。以是持鍼綫往往達旦。睫不交倦。不自支。鐙火燎椎髻。稍覺。僅僅拂去。絢繡如初。會歲餘。自食雜糠粳。舉精糲奉姑。餘以飯兒。曰。就學舍固不可。飢也。兒偶違命。輒自怨艾。淚淫淫下。里媼曰。與為慈母。何如。嚴父曰。非不知慈且害之也。之子後者也。易失於嚴。不忍也。里有新寡。日詬詈其伯氏。節婦問何故。曰。伯催孤兒租。自便其私耳。曰。汝子伯之諸子也。伯庇諸子。日方長。租幾何。而傷世父心。不可。且子幼。必假手他人。利他人。與利伯氏孰善。自是不復聞惡聲。廡下有悍逆婦。姑躬炊奉湯沐。惟謹。小不愜。意婦吼聲不少止。居有頃。習知節婦孝其姑也。愀然曰。我罪上通天矣。節婦數十年寡居。其嘉言善行。足以感人心。而正風俗。多類此姑。一日病。醫弗效。剝臂肉以進。姑霍然愈。婢氏范從飾衣中稍稍見創痕。詢得其事。驚嘆起。熟視痕。且有兩蓋。在室為母割者。曰。痛何似。曰。不覺也。嫂曰。宜乎。兩老人痛汝矣。為女為婦如此。而深自秘藏。歷年數十。

國朝文匯

卷四十

二十一

國學扶輪社印

雖古史所載無以加矣今年己卯節婦一周甲子而顛毛盡白老於兩老人云

贊曰余遊瀟湘間鬱鬱久邂逅交吳西潭雅相善朝夕過從其得節婦生平事西潭蓋節婦兄其言之詳也固宜天之生人衆矣婦人之性陰柔不剛與物而遷其乖人道之常者何限不幸而失所天能守禮義寡醜以終身足表見於一時憂憂乎難之况貧而養其親死而為立其後百折難難以興衰繼絕此託孤寄命不少概見之君子而得之深閨少女之中其所遭雖不飭而勁節高風與世之幸而與匹偕老飲食男女遂其燕婉之私不幸而天閼良人屹然自立於人紀淪亡之日其得失難易相去之遠必有能知之者自古志士仁人存天地之正氣不過盡人道所當然不自欺其志而名或湮沒不傳或爛然天壤法天下垂後世立懦廉頑其初念皆不及此此其為難能矣荀息曰使死者復生生者不愧於其言陳亮曰五十年間無一豪傑若節婦者豈其人哉豈其人哉

路東山遺詩序

康乃心

路君東山七年前曾一晤青門旅次爾時年已六十餘鬚髮皓然譚論訶訶如洪鐘與余言詩隋台僧舍晨夕互為過從相得極歡李子章木亦時時在座蓋兩君皆教授會城感歎無聊不平之氣時或見於篇什然章木尚潦倒諸生為干祿之學東山且落拓老矣生平績學苦吟上下古今自為一家間誦其所作有風霜金石之聲而又負英雄略喜譚兵往仗劍走朔方勇略公一見傾心延入幕府為上賓未幾別去家酷貧淪落不屑人知人亦竟無有知之者比余再走金臺則東山已溘然物化矣余友李子天生窮年著書與東山居比鄰相善也哀其老而以貧賤死殤其筭得遺詩數首讀而太息曰此庶不朽吾良友矣將授諸梓人以廣其傳而天生又不幸死會章木自青門歸弔於其家悲舊遊之不再哀大雅之無繼遂與其從兄叔清計之叔清愴然曰此吾叔父志也善為先生謀身後者其在斯乎遂相與較錄而刻焉適東山嗣君慎過我山堂因遂得讀東山此詩長吟短歎一如坐東山於長安市上而聽其笑語而上下其議論也嗟夫士貧奚足病老奚足悲唯貧而喪氣老而無能為可病而可悲耳東山以英達之姿堅處士之節困約終身不厭而殘編蠹簡存乎荒山老塢寒煙落照間豈其憤世嫉俗意有所託如伯鸞孺仲之流耶今遺詩寥寥止

數首耳林滿鏗錚音節之雅幾近中唐所恨隋台高唱猶隱隱在胸次間而劉草無存可知其放失尚多矣然則以先生之窮老而死與世之富兒車馬綺紈誇耀於婦人孺子顧盼自雄而目不識丁者試一連類比之其相去為何如也余嘗謂世道江河日下今日匡時要務非如晦庵所云罷科舉返本復始決不能為國家得真才收實用蓋非妄語亦非激語也不然世之賢人君子砥德礪行通經學古身湮沒而名不彰漫焉渺焉如東山天生其人抑亦何可勝道哉

重修蘇子卿祠記

古今來忠孝節烈事足以感人心而動裔夏者雖其人既往而懷古興思猶使百世以後誌其都邑居處山川草木雲物泉石愴恍於風煙黯澹之餘如或見也而況其在衣冠劍佩為陵墓之所存者乎韓古夏陽地邑西北五里許高原斷續有漢典屬國蘇公子卿墓稱蘇山焉墓左有廟所司歲時修祀所以愉神明崇古蹟也顧日久而圯崔鼠不庇經數十年無有起而更新者安邑康明府鞫園公泣韓四載間與賓客遊謁其上瞻仰大節親茲廢墜捐俸構材謀所以修之遂詳讀故碣知墓在昔漫沒為牧豎所踐見斷石出土中乃公藏骨處遂封而砌焉有柏成林枝柯皆南向往時萊陽左公令此邦修治之自為記且弔以詩墓忠孝仁義之氣相感者深也今明



府述往思來。有事於此。可不謂深觀化源。識當務之急。而得風教之本乎。有莘氏曰。嗟夫。未易一二言矣。世代茫茫。河流萬古。由西漢以還。生斯里。客斯邦。車塵馬跡。所謂五陵三輔。將相王侯。富貴顯赫者。何可勝數。不旋踵而零露寒蟬。殘岡斷隴。使行人俯而過之。不欲一眴。獨茲蘇山。抔土雖田。夫野女無不以手加額。愛戴瞻依。寒食拜埽。如其私親者。然風雨晦明。與太史司馬公高冢。南北相望。豈非十九年之浩氣。孤忠。貫金石。陵星嶽。振萬古。而長存者哉。或曰。子卿京兆武功人。此不宜有墓。然昔賢高視遠觀。以六合為一家。卒葬不必其土。如有虞之在九疑。夏后之在會稽。董仲舒之在杜陵。杜甫之在耒陽。蘇軾之在郟城。累累而是。况龍門內史名地。實漢家畿輔邑也。歿而瘞焉。亦故鄉耳。奚為而疑諸。若然。則河梁之詩。麒麟之畫。上下千古。實在此矣。明府名行。開字鐸。霜號韜園。甲戌進士。晉安邑世家。其在韓也。劾司馬太史之冢。新少傅香山之祠。重建國覺禪院之浮圖。特起巖石左公之書院。暨今蘇山一舉。殆庶幾於古良吏之遺風矣。

重修董子墓祠記

昔者堯舜文武周公往。而道在孔子。孔子沒。而異端興。斯文絕續之會。必有一人焉。起而紹述之。如陰陽晝夜。寒暑短長。互為消長。所云為天地立心。生民立命。為往聖

述絕學萬世開太平者。蓋利極而復剝之終。即復之始。而待後守先。肇修人紀。每於世遠年湮。禮崩樂壞之日。一起文明之運。是殆有天焉。豈人力之所能勉而致乎。若漢之董子仲舒。鄭公康成。隋之王氏仲淹。唐之韓子昌黎。宋之周子濂溪。張子橫渠。程子明道。伊川。朱子元晦。元之許公魯齋。皆其人也。而吾嘗推論其源流。難易。則惟董子之於吾道。其功為尤鉅。云當周之末。楊朱墨翟之言盈天下。孟子闢而除之。及夫暴秦崛起。殘虐生民。廢先王之法。用治獄之吏。焚燒詩書。天下蕩然不復知仁義之說。六藝之文。斯道不絕。蓋如綫也。夫子獨尊孔氏。下帷誦說。治春秋成。一家之言。跡其當漢之隆。遭遇孝武。表彰六經。不遺餘力。以故天人有策。名田有疏。災異有對。一皆推本經術。以王道匡君國。雖歷相驕主。不足以竟其所用。然而兩京以還。稱醇儒者。必以江都為第一。今繁露之書。猶未散亡。可致也。故長安城東南二十里。尚有墓曰下馬陵。蓋武帝幸芙蓉苑。曾於此下馬。馬光祿詩所稱芙蓉苑外深埋玉。一代醇儒是此人者。即其地也。下馬又名蝦蟇。見於唐詩者不一。訛語也。墓前舊有祠。在人家聚集中。地稍卑。幾致蕪沒。朝廷崇儒重道。表彰先賢。此祠亦屢經修葺。未久就圯。今咸甯明府董公來治斯邑。下車不移時。治春秋修祀事。覩其剝狀。慨然曰。夫子明聖學。正人倫。著書立說。為尼山氏功臣。其於吾道若星嶽然。而祠墓一區。辱在我

邦者乃聽其迷漫榛莽乎遂下令新之以城以築煥然改觀夫而後登其堂拜其墓者不至興茂草之感也河山子曰余嘗如西京游茂陵躡終南太乙之巔登唐慈恩寺浮圖望咸陽鴻固諸原荒冢累累不知何世何人夫自秦漢隋唐以來陵谷變遷歟若朝暮卑者無論其間之身都將相赫赫奕奕在人耳目者亦復何限而身後一坏零落於寒煙蔓草為樵夫牧豎所上下而嬉游真不可以勝紀也惟此一邱經歷千載春秋俎豆久而益新叔孫豹曰太上立德其次立功立言是之謂不朽然則前有千古後有萬年守先聖之道以待後之學者紹姬孔而啟濂洛與天地生民相為終始秦漢以來夫子一人而已他如富貴名磨滅奚足道哉奚足道哉明府為政事治民安能及於是蓋知所以表率以化為先者亦豈其董喬耶且新工部之祠表東陵之躋信乎其能行古之道也會夫子裔孫廷獻將刻石以記而徵說於余遂為述之如此明府名宏彪字明遠壬子科舉人家山西之萬泉并書以告來者

### 雷園記

雷園者宋尚書職方員外郎太簡雷公歌詠讀書之所也公字太簡諱簡夫馮翊邵陽人父孝先曾祖德驥即初趙韓王普者蓋公家三世官耀云始太簡隨父之郡中有園居詩二十二首景祐間通判張遠為刻石郡壁太簡後復自為州吏目史稱其

少不樂仕進以祁公杜行薦舉為大郡官耀時治白渠先是歲役六縣四十日稍木數百萬水竟不足公役止三十日稍木減三之二而水有餘及守雅州討彭蠻之亂拓地五百餘里蘇氏父子久未知名洵攜軾轍來謁公大奇之語於張方平又薦之韓富歐陽諸公昌言於朝眉山由是著聲得舉制科老泉始欲行納拜禮以師事之今嘉祐集中與太簡書蓋顯達以後言耳而此園固其侍親燕居優游嘯傲舊所託跡者也園大幾十畝在刺史堂西坦夷間蟻履其中可以望遠南嶺東山城頭出沒暮雨朝煙如鬟如黛太守穆庵李公游而快意焉為葺舍宇作公書院暇日與賓客宴坐其中彈琴讀史相與為樂已而太息曰天下事其為廢興顯晦者可勝道哉雷公忠孝文武為時名臣顧去今未幾其所為亭臺池榭見諸歌詠者已迷沒於寒煙蔓草之中不可復問即官於茲土亦多驛舍跡之無從知為誰氏故園迄今遂廢為菜園人生百年前不見昔人後不見來者今古茫茫能無悲歎於斯乎客曰盛衰者時也感人者德也不朽者名也宋去今幾百載矣世運消沈人物代謝郡當孔道其為治亂興亡兵火沿革顛垣敗瓦出於夕陽榛莽間者不知幾世幾人而此園片土依稀如故則其所以長存固不在竹塢石徑高柳長楸之末矣太史公曰富貴名磨滅不可勝紀惟個隙非常之人稱焉將無近是耶不然秦州自昔繁華五陵三輔所

云北堂南陌燕遊歌舞之盛。炫赫一時。亦復何限。而戚里侯門。曾無纖毫之足述。則  
園在今日。正未為不幸也。太守喜曰。信哉言也。吾過矣。吾過矣。遂相與賦詩言懷。適  
朱王孫二玉來自青門。為圖以傳好事。而余為誌其大概如此。

### 孫將軍傳

孫將軍名守法。字繩武。陝西臨潼人也。家居王谷口。韶配讀書城內。府君祠晨起赴  
館。至東門。遇一相士。見而奇之。曰。鐵面劍眉。他日必握兵權。長而家酷貧。廢書務農。  
然多智謀。膂力絕人。性復任豪俠。喜交游。嘗飲於市。酣醉兀兀。輒撫膺奮歎曰。不埽  
妖氛。死不休。市人皆大笑。以為狂。時流寇猖獗中原。九重之上。晨夜焦勞。命將出師。  
旋撲旋熾。將軍遂仗劍入行伍。為制府洪承疇戎旗健卒。每出輒敢當先。宜君之戰。  
以單騎擒賊首點鐙子。不沾泥。斬獲甚眾。授守備。又與關王高迎祥力戰。迎祥敗。棄  
馬入溝中。公亦棄馬逐之。迎祥故壯悍。將軍與之手搏。卒生擒。以歸。收其軍。餘賊為  
之氣奪。授參將。轉陞護藩練營副總兵。威望日隆。所向無前。高傑者。號翻山鷄。雄勇  
有才略。為賊羅汝才副將。將軍知其可用。單騎入傑壘。慰降之。傑感將軍恩。為泣下。  
以父事焉。歲時必西向拜誓。死報朝廷。終身不敢攜貳。後封興平伯。皆將軍力也。當  
是時。流寇遍河洛。羽書紛馳。王命或梗。隔不行。秦藩微弱。官吏凌虐。至有過王門不

下馬者將軍嚴守禦法行不避權貴境內肅然孫制府白谷去討李自成於河南會  
久雨糧絕師潰潼關失守賊蟻至外竭內空勢不能支自成僭號西京將軍仰天撫  
哭棄家保秦世子以孤軍退守興安之五郎壩自成招降將軍數殺來使聲義旗舉  
兵約總兵賀真為恢復計遠遁響應會我朝定鼎孟公喬芳督關中悲其志節廉  
以書招將軍將軍以未得手刃李賊抱志不出慷慨悲歌有妻子可殺君父之仇不  
共戴天等語聞者哀之尋為土人所害始將軍鎮長安時歸葬其父偕里中父老浴  
溫泉解其衣遍體創痍幾無完膚人為將軍泣將軍意落落也為人嚴重雄威而和  
平坦易性至孝篤於友誼每好與儒者遊及臨陣遇敵則猛如虎兕見者以其面黑  
稱曰孫鼃君云用兵如神善撫士卒能得人之死力廣西提督吉公孫畧副總兵孫  
公麟皆將軍義兒胡廣提督胡俊子瓊州總兵高進庫皆將軍門下裨將其他千百  
夫長以功名起者蓋不可勝紀也而將軍竟以抱志死悲夫

論曰吾為童子時聽人言孫將軍戰功忠勇事甚悉及後讀諸家記流寇始末乃若  
不知有將軍者甚矣史傳之缺也將軍事今關中人人皆能道之蓋其出身似狄武  
襄敢戰如李英公而退保深山孤軍誓死則又田橫之客五百海島者也而泯沒無  
聞忠臣之血千年化碧可勝慨哉

路節婦党氏傳

節婦党氏。開中鄧陽人也。世家城南莊頭。邨曾祖時元明歲貢。祖擢邑諸生。父煥。萬歷壬午舉人。仕懷仁令。以清節著。節婦生而端介。通孝經論語。工楷書。及笄。適澄城湖南別駕一元路公。從廣次子世榮。未幾。榮以疾不起。時節婦年十九。痛哭不食。以死自誓。孀居凡七十二年。年九十一。以壽終。其歿也。家人發遺箒。止孝經列女傳數冊。及其翁一元先生自任所寄手蹟。皆勉以守節事。諄諄至不忍讀云。節婦生萬歷甲申。卒康熙甲寅。守義之年。為壬寅。子女無一出。康乃心曰。余邑蓋古有數也。聖母之故里在馬孜。於詩稱大邦有子。在洽之陽。在渭之渙。及劉向諸書所載。湯妃禹母。皆有數氏女。故自三代而降。如漢之任季兒。明之李生光。被妻秦。任朝宣妻魏。以及近代之史生。記魯節婦雷。趙臣兒妻節女玉田。光謀妻秦。何烈烈也。豈聖母遺墟風化固殊耶。路節婦之死。余適在潞。亟往弔之。荒游窮鄉。棺停破甑。室中雪積成尺。一經明滅。如縷。哀動鄰里。余徘徊瞻次者久之。曰。為人當如是。是亦女中之海忠介也。然余聞忠介之死。吳人朱良佑哭以詩。有蕭條棺外無餘物。冷落靈前有菜羹之句。至今為人豔稱。茲觀節婦之靈。並菜羹亦無矣。太史公有言。人莫不有一死。或重於泰山。或輕於鴻毛。節婦當孀居時。年方少。使或見義不明。稍易絃轡。安必其寒落荒

涼至生無以為生而死無以為死也。節婦年踰耄而婉雅嚴正。余猶及見之。蓋余妻路為節婦從孫。故知之頗悉云。嗚呼難哉。

李向若墓誌銘

歲丙辰。故孝廉李向若先生以疾終於家。越八月季冬。將歸幽壟。先生之弟雄飛。攜所為狀一帙。策蹇過訪曰。吾兄作古有日。今且襄大事。謀元石。馬願子一言以誌僕小子。再拜伏辭。謂先生曠代高賢。異時史氏將有特書。蓋棺之論。非海內名公如道隱。豈山蘇門二曲。不足以彰有道。示來茲。小子末學後進。雖獲侍琴履。而卑微陋劣。昧焉聞之。是為先儒增辱也。固謝不可。徘徊累月。竟弗獲已。遂奮筆而為之記。公諱濬。字向若。一字連璧。關中郃陽人也。世居邑城東黃河大岸之坂頭村。吾邑自三代以還。為有華國。漢置郃陽封城。皆瀕河。後始移今治。聞其先蓋城南廓人也。今城村李姓者。稱同祖。歲時且拜掃云。曾祖父尚貴。力勤稼穡。起家河南盧氏山中。祖父福長。父時顯。皆忠正長者。先生幼警敏。讀書不尋常。日盡數千言。時望草車公以憲副投簪。負巨名。號關西夫子。先生每從之學。為制舉義。雄古奇崛。純以秦漢行之。年二十即入庠。越六歲而食餼。累冠諸生。名馳三輔。督學使者賈公校秦士。奇其文。拔置第一。歎曰。閩生文令人振懾。但恐子才大。地氣不堪任耳。其見器如此。癸酉登



賢書戊辰兩上公車時國家多故王事孔棘先生感慨賦詩和旅壁中韻有浴日壯懷擁帝閭瞻雲客淚點征衣癸未逆閹入關僧據西京徵兵調賦所在騷然及甲申三月賊臣誤國神京失守烈皇帝身殉社稷先生一聞十九日之變即伏首北向號哭不食且與己卯孝廉呂公得璜慷慨流涕誓同死王事會呂以嚴慈之命不得以身許國而先生太公亦為之垂泣勉慰計無復之遂棄家東渡終以路梗不克北上至南北寺牢騷放廢遂披剃為僧所寄書有風波自險吾心自平之語太公持而痛之屢使招歸

### 皇清革命

聖主當陽窮閭幽微微天下巖穴有道以備側席先生堅抱盤石數以疾辭不應時偕同志李廉管希聲呂公兄弟元佐仲佐往來太華賦詩招隱或累歲不知所向或竟著黃冠披緇衣哭歌山林行乞都市人之見者以為此必李子向若跡之即去已而訪之果先生也自是飄泊抑鬱多寄跡於僧房梵宇山巔水涯間又自結茅菴於河澗雖兒童父老微笑終日時而採藥負薪行吟道旁若不知有人世者性至孝承志色養終身不怠妯雷以疾暴卒先生適他出聞喪而奔一慟幾絕哀毀骨立父或稍有憂色率諸弟姪班闌戲舞務得其歡心而止兄弟之間自相師友至白首無間

言家居三十年與物無求與世無爭不激不隨無諂無驕性簡易接物坦易略無崖岸然極捐介非其人不友絕跡公庭至長吏求一見不得妻子短褐終歲屢空晏如也鄉鄰小有鼠在必為之反覆感辭令其自己又好以為善陰德事勸人語意誠切被其溫音頑夫無不爽然好讀書博極秘緯而一本於忠孝之旨聽其言塵土俱盡無一漫語為文振筆直下海立山奔雄逸不可迫視詩歌磊落豪爽如萬斛珠璣湧地而出崆峒潄西之流也顧以性不近名所存無幾散亡者多矣惜夫惜夫先生少有奇質迥絕塵俗一日遊華山至極峯下方移目忽有異物飛至與談久之且曰要知未來但觀已往語近道者理或然也晚於城南乳羅山下金水谿中穿石鑿谷得田數十畝築舍其間名小桃花源將遂家焉未幾而卒卒之日鄉之老少男女無不流涕者嗟夫先生以不世之才抱匡時之略意當如干將莫邪所向無前而逢值運會甚農夫以沒世至當新朝鼎定不次求人一時受爵王廷東主服紫者率皆際會風雲以就功名概託之管大夫魏文貞忍小圖大英雄屈己之例庸庸覲面相視為常先生一鄉薦孝廉耳無官守言責誓不可逃之義而乃求死不已求死不已至於奮激奮激不已遂至於遺落然則如先生者固世所謂大愚矣夫人情誰不愛顯榮念妻子至於綱常名教之大居平生論或以慷慨指髮自許樹立及夫情隨事遷

蓋未有不喪其懷來者。何先生之獨嶽嶽也。先生以古今為旦暮。以軒冕為泥沙。以富貴窮通生死禍福為春夏秋冬。即其數十年中。蓋已不易不成不降不辱。龍德遯世。自命千古矣。然則神州沈沒之感。青山舊國之思。惓惓徊徘徊。又未嘗不三致意焉。嗚呼。昔宋室遺民。憫中都之淪亡。至於樹冬青。哭西臺。雨雪空山。往往有之。靖難之後。葉御史痛舟江上。痛哭讀騷。自號雪庵和尚。今其書俱在。以先生觀之。乃知古今未始不相同也。往雲中郭匡廬先生來署郅邑。最心折先生。而與之遊。稱為近古大賢。豈無謂哉。兄弟五人。潛以明經仕。與安訓導。遼甯。遼學正。瀨庠生。鴻庠生。食廩少。洋先生行二。元配王。繼種王。趙王。男三。維極。維相。維梅。女二。孫男四。燭。靖。炳。孫女一。先生生萬歷二十九年辛丑九月二十九日。卒康熙十五年丙辰五月初八日。壽七十有六。以是歲十二月十三日葬於村西北黃河岸上二里之高原。東望首陽。從其志也。是宜銘。銘曰。

有美一人兮。大河其旁。在渭之浹兮。在洽之陽。雲漢為胸兮。氣吐琳瑯。筆撼五岳兮。賦奪天章。乾坤易位兮。血戰元黃。龍去鼎湖兮。日月晦光。忠孝兩窮兮。永夜傍徨。行吟澤畔兮。披髮成狂。探芝深谷兮。雜茹為裳。商華遠逸兮。希皓相將。鳳德九輝兮。千仞翱翔。下跡浮空兮。足亂蒼茫。黃止篋腹兮。白露為霜。朔回從之兮。道阻且長。天喪

斯文兮星附箕芒不遺一老兮顧我木梁掩袂流涕兮風淒雨涼孤山鶴去兮彭澤菊荒不封不樹兮中野云藏更萬古而千秋兮歷沒世以不忘

春秋論

張遠

春秋之不明議論害之也。議論之紛淆褒貶害之也。褒貶之說出於三傳公穀之刻  
深附會大略相似而公羊為尤甚。即其黜周王魯之一言已為背謬之至極。他可無  
說。已左氏最後出而最為有據。其敘事詳悉博瞻不可謂無功於春秋。獨其議論褒  
貶無以異於公穀而說者方以左氏為左邱明且親傳於夫子。左氏之非邱明不待  
辨而知之。夫子所謂左邱明恥之予亦恥之者。正如竊比老彭之意。左氏若為邱明  
且授經於夫子必其議論正大無疵智過游夏矣。今觀其書即其周鄭交質一事乃  
託君子而斷之曰信不由衷實無益也。夫周君鄭臣也。夫子作春秋所以尊周室正  
名分。左氏不責其質子之非而責其信不由衷。此戰國魯仲連不道之言。反出於親  
授經者之口哉。中有所謂孔子曰者一皆出於假託之辭。如宣孟之忠也之類。左氏  
之非邱明不待啖助趙匡暨鄭樵之辨而可知也。嗣後說春秋者無慮數十家紛紛  
論議大抵不出褒貶之說。愈嚴愈密愈刻愈深。使吾夫子如風霜剗戟如司空城旦  
焉。近世所共宗者莫過胡氏。胡氏之學術未嘗不正。議論未嘗不嚴。要之與夫子作  
春秋之意全無相涉。則亦未免習褒貶之舊聞而未嘗以春秋選春秋也。何以言之。  
春秋魯史也。列國皆有史。作史有史法。如趙盾弑其君之類。況乎魯為守禮之國。其

史比諸國尤良。觀韓宣子周禮盡在魯之言可知矣。故於列國之事來告則書不告則不書。其詞本告文。史不增損。夫子不敢不因焉。其名氏爵里日月卒葬則史有詳略。文有體例。舊史如是。夫子不得而易之也。若曰不本告文。非闕史法。悉由夫子增損而獲貶之。則列國之衆二百二十四年之事。奚啻千萬。乃寥寥如此。其中之重且大。若楚子麇卒。許世子止弑。其君賈之類。弑君父何等事也。一則實弑而書卒。一則非弑而書弑。佚篡弑之賊臣而不討。坐不嘗藥之子為弑父。夫子不若是其混亂淆訛也。且夫子之作春秋。不過列其目。未嘗列其事也。亦甯知有左氏公穀之傳其後者哉。即如此二事者。倘無傳而詳之。則楚子為得正而終。許止以篡而弑。傳千萬世無疑也。不知此特史據其國告文耳。楚以卒告。史以卒書。許以世子之自傷以死也。即以世子之言告。史亦即其所告之言以書。春秋本告文。夫子本春秋。諸如此類。不可勝數。善乎呂大圭之言曰。諸儒紛紛聚訟。其大端不過有二。一曰以日月為獲貶。二曰以名稱爵號為褒貶。不知蔑之盟不日。則曰其盟渝也。柯之盟不日。則曰信之也。將以渝之者為是。信之者為是乎。桓之盟不日。而葵邱之盟則日。或曰危之也。或曰美之也。將以危之者為是。美之者為是乎。公子益師卒不日。左氏曰。公不與小飲也。公孫敖卒於外。而公在內。叔孫婁卒於內。而公在外。公不與明矣。又何以書曰。公

羊曰公子益師遠也。然公子懼亦遠。又何以書日乎。穀梁曰不日惡也。公子牙季孫意如亦惡。又何以書日乎。至於來歸仲子之賵而宰書名。則曰貶之也。使榮叔歸成風之舍賵而王不書天。亦曰貶也。豈歸仲子之賵罪在家。宰不在天王歸成風之舍賵咎在天王不在榮叔乎。春秋書王本以正名分。而夫子乃自貶王而去其天。以是為正名分可乎。穀伯鄧侯稱名。說者曰朝弑逆之人。故貶之。滕子杞侯獨非朝弑逆之人乎。滕薛來朝稱爵。說者曰滕薛微國也。以其先朝隱公故褒之。朝隱公有何可褒乎。或曰滕侯爵也。朝弑逆之人。貶而稱子。朝桓可貶也。終春秋之世。不復稱侯。豈皆以朝桓之故乎。或曰時王所黜也。使時王而能升黜諸侯。安得為春秋之世乎。若此之類。不可以一二數。皆疑誤而難通者也。大抵春秋以事繫日。以日繫月。以月繫時事。成於日者書曰成於月者書月。成於時者書時。故凡朝覲蒐狩城築作毀。凡如此者。皆以時成者也。會遇平如來至伐圍取救次遷成襲奔叛執放水旱雨雪冰雹彗孛螽蟘。凡如此者。或以月成。或以日成也。崩薨卒弑葬郊廟之祭盟狩敗入滅獲日食星變山崩地震火災。凡此者。皆以日成也。其或宜月而不月。宜日而不日者。皆史失之也。假如某事當書月。而魯史但書其時。某事當書日。而魯史但書其月。夫子安得虛增甲子乎。春秋據事直書。而善惡自見。名稱爵號。從其名稱爵號。而是非善

惡則繫乎其文。非書名者皆貶。而書氏者皆褒也。若夫因其所書月日之前後而知其是非。因其名稱爵號之異同。而知其事實。則固有之矣。非夫子以是為褒貶也。有如莊三十一年春。築臺於郎。夏。築臺於薛。秋。築臺於秦。三十二年春。城小穀。則有以見。繞閼三時而大功屢興也。宣十五年秋。螽冬蟥生。則有以見。連歷二時而災害薦作也。莊八年春。師次於郎。夏。師及齊師圍郕。秋。師還。則有以見。閼三時而勞兵於外也。若此之類。蓋於書時見之。桓二年秋。七月。杞侯來朝。九月。入杞。則有以見。來朝方閱一月。而遽興兵以入之也。昭七年。公如楚。九月。公至自楚。則有以見。其朝義國。閱七月之久。而勞於行也。僖二年冬。十月。不雨。三年春。王正月。不雨。夏四月。不雨。六月。雨。則有以見。其閼九月而後雨也。若此之類。蓋於書月見之。癸酉。大雨震電。庚辰。大雨雪。則有以見。八日之間。而再見天變也。辛未。取郕。辛巳。取防。則有以見。旬日之間。而取其二邑。壬申。禦廩災。乙亥。嘗。則有以見。其嘗於災餘之為不欲也。己丑。葬敬嬴。庚寅。而克葬。則有以見。明日乃葬之為無備。丙午。及荀庚盟。丁未。及孫良夫盟。則有以見。魯人之先晉而後衛。己未。同盟於雞澤。戊寅。及陳袁僑盟。則有以見。晉人之先盟諸侯而後盟大夫。若此之類。蓋於書日見之。然以是為夫子以日月之書。不書寄獲貶。則誤矣。若夫名稱爵號之異同。則有以事之大小。而其辭因之以詳略者。亦有前



目而後凡者有蒙上文而殺其辭者。國難以一例盡而時變之升降世道之盛衰亦  
有因之以見者。楚一也。始書荆。再書楚子。吳一也。始書吳。再書人。已而書吳子。於以  
見彝之浸盛矣。魯鞏柔鄭完。始也。大夫猶不氏。於後則大夫無不氏者。鄭段陳佗  
衛州吁。始也。皆名之。後則雖弑君之賊亦有書氏者。於以見大夫之浸彊矣。始也。曹  
莒無大夫。於後則曹莒皆有大夫。於以見小國之大夫皆為政矣。始也。吳楚之君大  
夫皆書人。於後則吳楚之臣亦書名。於以見彝之大夫皆往來於中國矣。諸侯在喪  
稱子。有書子而預會預伐者。於以見居喪而會伐之為非禮也。杞公爵也。而書伯。滕  
侯爵也。而書子。於以見其不用周爵。而以國之大小為彊弱也。會於曹蔡先衛伐鄭  
則衛先蔡。於以見當時諸侯皆以目前之利害而不復用周班也。幽之盟。男先伯。淮  
之會。男先侯。戚之會。子先伯。蕭魚之會。世子長於小國之君。於以見伯者為政。皆以  
私意為輕重。而無復禮文也。垂隴之盟。內之。則公孫敖會諸侯。召陵侵楚之師。外之  
則齊國夏會諸侯。於以見大夫敵於諸侯。而莫知其非也。凡此者。莫非名稱從其名  
稱。爵號從其爵號。而是非善惡。乃因而見。初非夫子特以是為褒貶也。呂氏之論。最  
為有見。但彼又以春秋有夫子之特筆。其言曰。吳楚之君不書葬。是夫子削之也。晉  
侯召玉。而夫子書之曰狩。所以存天下之防。甯殖出其君名在諸侯之策。而夫子書

之曰衛侯出奔。所以示人君之戒。不曰陳黃。而曰陳侯之弟黃。不曰衛縶。而曰衛侯之兄縶。子糾不書齊。而小白書齊。突不書鄭。而忽書鄭。不但曰仲子。而曰惠公仲子。不但曰成風。而曰僖公成風。伐晉而書衛人。立王子朝而書尹氏。凡此者皆夫子之特筆。夫既有特筆。則有筆削。有筆削。則所可筆者無不筆。可削者無不削。何所筆所削者。特此數條。而大有所關者。悉仍舊史乎。不知史有史法。作史有良不良。吳楚不書葬。史為中國諱之也。天王狩於河陽。史為天王諱之也。衛侯出奔魯。此乃林父之告文。所以布其君之失德。以出奔告。故以出奔書也。陳侯之弟衛侯之兄者。悉據其告文也。子糾不書齊。小白書齊者。史蒙上文曰。公伐齊。納糾。故不再書齊也。突不書鄭。而忽書鄭者。史蒙上文曰。宋人執鄭蔡仲。突歸於鄭。故不再書鄭也。夫春秋嚴嫡庶。今以突之篡。而一則曰鄭伯。再則曰鄭伯獨於忽。不得一蒙世子之稱。豈聖人之情乎。蓋突既歸立。而後使告於諸侯。正欲泯其世子之稱。使已不得以篡。蓋夫子據舊史。史據告文。則但書之曰鄭忽。出奔衛而已。其後鄭忽復歸。本是世子。則鄭人來告。仍曰世子。此皆告實。非夫子之筆削也。天王使宰咺來歸惠公仲子之賵者。王欲成之為夫人。所以別於元妃之孟子。故有是稱。宰非冢宰。故稱名。經據舊史。是非具存。不以名稱。為褒貶也。曰僖公成風者。秦文山東諸侯。將以圖晉。秦無聘問。先假歸。

禘以通之。史亦據秦人來歸之詞耳。其伐晉而書衛人。則本於晉人之告文。其立王子朝而書尹氏。則本乎尹氏以立君布告諸侯。故史即據其告文而書之。凡此皆非夫子之特筆也。善乎劉永之言曰。夫子言知我惟春秋。罪我惟春秋。知之者知其明王者之法。罪之者罪其彰亂逆之蹟也。聖人者豈盡異於人哉。其德則聖人。其不幸而不得位。則猶夫人之子也。時無明王。誰知宗子。待之者曰季孟之間。則猶夫人之臣也。而所事之君則荒君。其君之卿大夫則僭室也。以猶夫人之臣子。而位乎荒君僭室之朝。私損益其國之信史。以明王法彰亂逆可乎。夫今之與古。其理弗異。設有一孔子生乎今之世。立乎今之朝。非君之命與其職守。而取今之國史而損益焉。予奪焉。褒譏焉。而公示之。其乃不為僂民者鮮矣。夫子對陽貨則謹諾之。過宋而微服居其邦。不非其大夫。其自稱者曰述而不作。信而好古。夫豈以其聖而傲當世乎。蓋方是時。各國亦莫不有史。其立辭亦莫不有法。趙穿之弑逆也。而書曰趙盾弑其君。則晉史之良也。崔杼之弑逆也。太史死者三人。而卒書曰崔杼弑其君。則齊史之良也。而況乎魯有周公之遺制。以秉禮之臣乎。是故法之謹嚴。莫過於魯史。其屬辭比事。可以為訓。亦莫過於魯史。是以夫子有取焉。謹錄而傳之。以寄其傷周之志焉。其知者曰是不得已焉。其不知者曰是匹夫也。而暴其君大夫之惡於天下後世。故

曰知我在是罪我在是亦夫子之謙辭云爾。夫豈曰改周制寄王法而託二百四十二年南面之權哉。謂春秋因乎魯史而筆之傳之。而王法因之而明。亂逆由之而彰。可也。謂損益乎魯史而明之彰之。則弗可也。說者謂言之重。辭之複。必有大美惡焉。若首止之會盟。葵邱之會盟。皆再書。是美之大而詳其辭也。稷之會曰成宋亂。劉單以王猛居於皇。尹氏立子朝而先之以王室亂。皆複言焉。是惡之大而詳其辭也。此實史筆之實錄。而其紀載之異焉爾。其凡有五。有據其事之離合而書之者。有重其終而錄其始者。有重其始而錄其終者。有承赴告之辭而書之者。有非承赴告之辭。聞而知之而書之者。此五者其凡也。而皆所以紀實也。或會而盟。盟而同日。是會之與盟合而為一事。或會而盟。盟而異日。是會之與盟離而為二事矣。合而為一事。則同書。離而為二事。則異書。固當然也。夫首止之與葵邱也。皆夏之會。而秋之盟。是離而為二事矣。故再書焉。此據其事之離合而書之者也。踐土之會。美矣。而盟不異書。同日也。平邱之會。無美焉。而盟則異書。異日也。皆紀實也。非美之大而詳其辭也。將書其取鼎也。於稷之會。則始之成宋亂。此重其終而錄其始也。既書曰宋災。伯姬卒也。於澶淵之會。則終之以宋災。故此重其始而錄其終也。會未有言其故者。於此二者而言之。特以明其所重也。他如書實來。則先言公如曹。書齊侯伐北燕。則遂書。

暨齊平皆是也。子朝之亂，叔鞅至自京師而言之，未知其孰是。故曰：王室亂，此非承赴告之辭，聞而知之而書之者也。夫時有遠近，則史有詳略。史有詳略，則辭有同異。如自文以上，日食有不書日者；文以下，悉書日焉。文以前，君行八十，書至七十，文以後，公行九十，書至者六十四。凡此者皆是也。愚按劉氏之言，最為確當，誠可破千年之混淆，得春秋之指者也。而說者猶以筆則筆，削則削，游夏不能贊一辭為言，不知此乃出於司馬遷之臆說。孟子曰：其事則齊桓晉文，其文則史。其義則某竊取之矣。學者不信孟子，而信司馬氏耶？蓋春秋為夫子末年之書，感亂臣賊子之紛紜，傷周室之凌夷，而哀吾道之不可行也。故取魯史之舊文，託始於隱公而終之以獲麟。若曰：此我魯賢君而弑於賊臣也，使人知春秋為臣子弑君父而作，故始之若曰：吾道之終窮也，故終之。使天下後世知有史書之重，而亂賊之不可逃也。故春秋成而亂賊懼，不然，則與晉乘楚檮杌同於泯滅而無聞矣。此則夫子作春秋之意也。是以獲麟之後，所紀二年之事，其中書法無以異於獲麟之前。此又夫子未嘗筆削之明驗也。近世有嚴啟隆者，其所輯春秋皆不本褒貶舊習，甚有可擬，但多以己見與左氏角。夫左氏未嘗無差失，然以數千年之後，必以某事為某事以爭之，則鑿矣。去聖久遠，經學支離，淺見寡聞，敢議先哲，亦曰折中先輩當仁不讓而已。後之君子必以獲

貶論春秋焉則斷爛朝報之譏雖百喙何說哉

破山集序

有示予破山集者其詩恬適雍容多達生之言予訪之讀書僧舍入門聞然繼聞琴聲披帷而入相與談詩煮茗焚香一彈再鼓而罷以為直詩人也一日者羅浮鐵橋道人訪予旅次破山適在座道人談劍術錚錚風動氣蓋一世破山從容論鎗法稍一舉手便有兔起鶻落之勢道人大加歎賞相與結交而去始知破山於武事無不精絕嘗於歲暮渡江遇盜十許人舟小如葉了無他客盜意吞之破山舉竹篙連溺數人盜驚懼而走又長於鉛彈能以小石擊飛鳥五十步內無不引手中者嗚呼予行天下訪異人交破山久乃直以詩人目之然則世何嘗無奇士在求者何如耳求之非其人與非其道其奇不可見也彼奇士者自負其奇甯伏處草野困頓饑寒老死則老死耳決不肯輕出求售為不知者屈世之求士者苟非其人與非其道雖日從之遊而不知也況其遠者乎破山一名白也號破樵山人因以名其集予恐世之人徒以詩人目之也為極言其材之可用如此破山世家子始富今貧美鬚眉白哲年乃三十餘也

周青士詩序

予浪迹四方交遊多丈人作一時之遺民故老高人逸士雖未識面亦未有不知其姓氏者客吳以來即知有周青士每往返鴛鴦湖憩楊李詢青士於友人友人云青士多村居或宿僧廬或山莊解舍與諸酒人作歌詩相娛狎城市中不數數到也予聞言太息久之作望岫息心之想丁卯春予旅食京師偶造友人廬觀壁間有青士詩竊疑青士詩何以至京師既而笑曰吾以衣食計降志傲逐於風沙馬矢中宜也此中豈有周青士哉一日者梁溪顧君偕一長者謁予通姓名果青士也蹶然驚喜因道疇昔通款曲且述其所以至止之由蓋青士亦以衣食計應某太僕之招客京師者幾二年都中公卿爭取重之而青士落落如故志固未嘗降也自是乃數數過余出其詩數十卷命程其甲乙且屬序之余重長者言不敢辭不敏遂受以卒業焉青士詩不規模一家言出入唐宋間置是於宋遺民謝舉羽林景職中殊無多讓然以衣食故不能如臯羽景職之介於石為可憫也予亦倦遊青士且歸矣予先出都青士來謁別期以秋杪相見於五湖鴛鴦水中把酒持螯一洗長安馬首之塵遽歸遲青士久不至弭舟鴛湖訪之始知青士歸於中途死矣是尤可憫也嗟乎青士素高潔絕無流俗奔馳之想不過以八口計乃以遲暮之年一到京都而竟以道死後之讀其詩者亦論其世憐其志可也青士歿十有餘年詩藏於家謀於其友之素好者鏤

版以行之。因敘曩日交契之由。以卒所請。余亦窮髮種種矣。饑來驅人稅駕。無期序青士詩。不覺掩卷者久之。

### 余生詩序

存亡興替之際。時移事遷。必有志節之士。留連慷慨。不能已已。此秦離之章。麥秀採薇之作。所由起也。魯之兩生。漢之龔勝。晉之陶潛。宋之鄭所南。彼所謂確乎不拔。匹夫不可奪志者歟。後之論世者。未嘗不高其行誼。未有少其所為者。蓋以維持世道。扶植綱常。固興時之所不廢也。青神余生先生。名本。肅敏公之耳孫。少有雋才。為南京博士弟子員。遭流寇之亂。流離播遷。逮鼎革後。遂流寓於維揚。姑蘇間。擯絕人事。其牢落骯髒。鬱離憂之泥。一託之於詩。慕陶潛之為人。故其詩多五言古體。常寄食僧寮。所與遊皆幽人逸士。有故人持百金為壽者。悉付之酒家。日邀客飲其中。酒家告金盡。則已不計也。嘗過友人家。有持趙子昂像求售者。指而痛詈。且舉手裂之。馬座客皆駭。而先生以為固然。其高致有如此者。嘗與閩人余不遠。吳人汪秋原及余善。年八十二。以疾終於維揚僧舍。疾革時。貽書與秋原訣。且以其所著詩囑秋原屬余敘。以余年未老。先生無子故也。嗟乎。予與先生交幾二十年。嘗觀其風度。聆其警銳。今一旦溘然而海內之故老亦淪亡殆盡。所賴者殘篇遺草。尚可以長留天



壞儻亦漭漫無存俾志節之士等於寒煙蔓草閱然漸滅不尤可慨耶時不遠已歿獨秋原在老矣因與校其遺藁存十之五六彙為一帙釀金刻之距先生之歿九年矣不遠將樂人八十餘卒無子秋原休甯人七十餘亦無子皆能詩余聞人張遠也

### 黃巖觀瀑記

予淹星渚凡七閱月聞黃巖望瀑之奇每欲往而中止旱久而泉縮故也茲春忽雨經雨晝夜登樓遠望勃勃如狂於是遊始決是日也天微陰尚有以雨為言者予不聽出小西門緣湖行至章水橋望文殊壩如明星瀑如玉尺介積翠間蜿蜒而動且仰且行觸石幾仆不五里至錦屏鋪渡澗抵開先寺向僧假松枝作杖從寺前小徑南向溯溪聲而上瀑忽隱不見壩見漸大路險甚累足而行里許如仰視壩亦不見見香鑪峯又里許有石斜出可坐數人少憩石上壩忽見彷彿一白鶴引吭而立過此則徑愈仄峯愈近又三四里夾路皆杜鵑花爛漫五色峯壩俱隱正夷猶倚仗不覺花塢間飛瀑如練矣時喜甚無暇入寺隨穿花徑登壩壩峙孤峯下臨無際與瀑相對於是踞坐石上平臨瀑布約百餘丈十有二疊噴薄澎湃殊覺動人獨疑李太白銀河落九天之句未免太諛耳徘徊久之不忍遽去俄而白雲擁至羣峯皆失乃返舊路逶迤數十步入黃巖寺復渡澗抵空生閣閣居雙劍峯之上下臨無際瀑布

之源出焉上人屏照獨居之上人謂余曰吾自西林抵此數年登者惟兩人君其一也不宜遽返因宿閣上談竟夕焉是夜雨如注凌晨開窗萬壑雲埋泉漫山徑余欲借芒鞋踏雲而下上人不可為詩見留須臾忽霽隨同上人再往觀瀑天崩雷殷射以日光結成五彩如虹下飲如龍奮飛千變萬化真天下奇觀始信青蓮之句為不虛相與歎羨欲賦詩而不能也已而日斜林表乃取舊徑返開先納杖山僧而還

陳處士傳

處士名守愚字睿思長樂人克一先生家孫也少聰穎異於常兒好嬉游不專心於塾塾師切責之終不可馴致一日者忽詣塾取僑輩所為舉業文觀之謂師曰此易易耳為用學為師即試之輒大驚亟許可然終不屑也嬉游如故既長博學工詩詞高自標置視世俗之士無一當意者與羣少年狎縱酒歌呼使氣罵座人皆目為狂人常登烏石山絕頂仰天大笑墜崖下幾死族戚亦多譏誚之處士自若也狂益甚性至孝幼孫家中落事母備極甘旨年二十餘嬉笑若小兒狀以悅母其事克一公亦如之居母喪哀毀骨立祖歿哭盡哀有哭母哭大父二詩多至百韻讀者皆為感悼又常與羣兒放紙鷂作放鷂詩三十餘首人以方之徐文長云生平寡許可獨與余善余詩文皆能口誦之每聚首必歡笑達旦或談詩書或論時事娓娓有原委余

不見其狂也。庚午秋，余返閩中，處士過從尤數。將還吳道至洪江，泣謂余曰：「吾與君此別永訣矣。君其為我作傳，死且不朽。」余謾應之。竊疑人以處士為狂人，殆不誣耶？未幾，果以其年冬死。年甫四十也。未聞訃時，余夢處士容其瘁，促余傳其急。既兩月，聞其卒，噫亦異矣。余與處士從表兄弟也，知之諗，故為之傳。

論曰：孔孟皆惡鄉之愿人，獨有取於不屑之士。良以狂者識高，意廣，得聖賢者師之，則可以裁其太過，進於中行。非若無非刺者之見，稱於流俗也。若陳子者，豈非通國皆稱狂人哉？余與之處數十年，見其事親孝，識見高，交遊篤，特以縱酒狂歌，不自貴重。所以見嫉於禮法之士。夫鄉黨所至，稱者不過習舉業，工利祿，以徵青紫耳。迹其所為，齷齪趨趨，又出鄉愿者下。其目陳子為狂人，宜已。陳子大父克一先生，君子人也。陳子嘗侍側，談經史，終日不倦，亦不以陳子為狂人。則是陳子者，殆古狂，非今狂也夫。